

# WANTOK

MUSPEPA BILONG YUMI OL PAPIA NIUGINI STRETI 30 YIA NAU

32 pes

Namba 1,360

Wik i stat long Fonde Julai 20, 2000

70t

**Insait**


**Ol palamen  
ripot  
-pes 2**

**Mekere dinau  
long Sentrel Beng  
-pes 3**

**PEC i laik rausim  
Gavana Kas -pes 8**



**Lukim ol  
toksave  
bilong senses  
Insait**



• Bikpela ren na wara 1 tait long dispela wik Mande na go insait bagarapim Raihu haus sik long Sandaun provins. Long piksa wara i pulap long floa bilong wod bilong ol liklik pikinini. (Stori pes 5). Foto: Bruda Gary.

## 2,593 pipel bilong PNG i gat HIV

**WENCESLAUS MAGUN  
i raitim**

LONG Mas 31, 2000, samting olsem 2,593 pipel bilong Papua Niugini i kisim sik HIV, Helt Minista, Ludger Mond i tokim Palamen aste.

Mista Mond i tok HIV sik em i wanpela bikpela birua bilong sosel na ekonomik developmen bilong PNG na ol memba long Palamen i mas luksave long dispela.

Mista Mond i tok 94 pesen (%) bilong ol lain i kisim dispela sik long pasin bilong slip wantaim narapela man o meri taim ol i no was long bodi bilong ol yet. Em i tok 4 pesen (%) bilong ol dispela lain i kisim dispela sik em ol nupela bebi husat i kisim dispela sik long mama bilong ol.

Em i tok ol sik HIV long ol bebi em i nupela samting tasol dispela namba i wok long surik i go bikpela.

Mista Mond i tok insait long las 18 mun dispela sik i dabol long 100,000 i go antap long Simbu, Westen, na Manus provins.

Em i tok maski dispela sik i go antap, tes bilong painim aut dispela sik em i no ron gut. Em i tok long Gulf, Bogenvil, na Sandaun, ol i mekim dispela tes long taim ol i kisim blut tasol.

"Long sampela seksen bilong ol komyuniti bilong yumi, mipela i stat long lukim wanpela insait long faipela manmeri i gat dispela sik," Mista Mond i tok.

Em i tok namba bilong ol pikinini

husat i kisim dispela sik long mama bilong ol i wok long go antap.

Mista Mond i askim olgeta lida long olgeta level long mekim bikpela wok long sapatim ol provinsel eksen plen ol helt woka i developim na karim aut long ol provinsel level.

Em i tok wanpela hevi bilong tokaut long dispela sik long PNG em bikos PNG i gat kain kain kalsa na tu bikpela ol maunten, wara, na solwara we i hat long go long ol wan wan komyuniti na skulim ol long dispela sik.

Antap long dispela, Mista Mond i tok, em hevi bilong rit na rait na moa long 800 kain kain tokples.

Mo a yet, ol helt woka i painim hat liklik long skulim ol pipel long HIV/AIDS bikos long ol kain kain bilip ol pipel i gat long dispela sik, Mista Mond i tok.

Em i tok tu olsem narapela hevi em ol kain kain bilip bilong ol lotu insait long kantri tu i wok long kamapim sampela hevi long skulim ol pipel long sik HIV/AIDS.

Mista Mond i tok HIV/AIDS i wok long bagarapim ol yangpela manmeri bilong PNG husat inap long kamapim ol gutpela wok developmen insait long kantri.

"AIDS em wanpela sik i go pas long kilim planti lain insait long Mosbi Jenerel Haus Sik Medikel Wod. Ol dokta i bilip olsem dispela namba bai i go bikpela tru insait long narapela 12-pela mun," Mista Mond i tok.

Em i tok planti pipel bilong PNG i gat dispela binatang bilong HIV/AIDS tasol ol i no save olsem ol i gat.

## Sir Kaputin bai tokaut long posisen bilong PNG long Fiji

FOREN Afeas Minista, Sir John Kaputin i tok, em bai tokim Palamen na ol pipel bilong Papua Niugini long posisen o sanap bilong PNG long nupela gavman bilong Fiji Fonde tude.

Sir John i tokaut long dispela bihain long memba bilong Kokopo Sir Rabbie Namaliu i askim em long tokaut long posisen bilong Nesenel Gavman long dispela hevi we i bin kamap long Fiji sampela taim i kam inap nau. Fiji i go insait long rot bilong makim nupela gavman long dispela wik bihain long olgeta toktok na wok bilong senisim gavman i kamap pinis.

Sir Rabbie i laik save sapos

PNG gavman bai joinim Nu Silan na Australia gavman long putim sampela tambu long Gavman bilong Fiji o nogat na bihainim wankain pasin long rausim Fiji i go ausait long ol komon wol kantri.

Sir John i tok PNG em i wanpela indipenden kantri na Gavman bilong PNG bai i no inap bihainim wanem disisen Gavman bilong Nu Silan na Australia i mekim egen-sim Fiji.

Tasol em i tok em bai tokaut long disisen bilong gavman bilong PNG long dispela samting bihain long Nesenel Eksekutiv Kaunsel i glasim na givim tok orait long ripot bilong em.



• Sir John Kaputin.

**Nestle MILO IKEN WOKIM GUTPELA SAMTING LONG YU**



# Sir Mekere kisim K600m dinau abrusim mi, Skate i tok

## YAKAM KELO i raitim

OPOSISEN lida Bill Skate i tok Praim Minista Sir Mekere Morauta i kisim K600 milien long Sentrel Beng long las yia tasol em i no tokaut klia long ol pipel bilong Papua Niugini.

Mista Skate i tok ripot bilong Sentrel Beng, Quarterly Economic Bulletin March 2000 i soim olsem Gavman bilong Sir Mekere i bin kisim K600 milien insait long mun Septemba inap Novemba las yia. Na dispela namba bilong mani i abrusim mak bilong mi bin dinau long Sentrel Beng, Mista Skate i tokaut.

Ripot bilong beng i soim ol gavman bilong mi (Skate) i bin kisim dinau long Sentrel Beng mak olsem K574.7 milien we i

aninit long dispela gavihan bilong Mekere, em i tok.

Em i tok taim Sir Mekere i kisim dispela mani pinis, orait ol i hariap taitim lo bilong Sentrel Beng (Central Bank Act) long stapim gavman long i noken kisim dinau long beng.

Dispela em i wanpela hait pasin PraimMinista i mekim na i no tokaut long ol pipel bilong Papua Niugini inap ripot bilong beng yet i soim, em i tok.

Mista Skate i tokaut tu olsem taim Sir Mekere bin wok olsem Gavana bilong Sentrel Beng long bipo, em i bin givim K400 milien dinau long gavman bilong Paias Wingti long 1993 na 1994 taim kantri (Beng) i nogat mani long risev long givim dinau long gavman. Ol dispela pasin i mekim na

mani i bin sot na long Oktoba 1994 strong bilong mani (Kina) i pundaun. Olsem na long 1994 inap 1997, totol dinau bilong PNG i sanap olsem K1,424.3 milien i go antap long K2011.5 milien, Mista Skate i tok.

Oposisen lida i tok ol hevi bilong bikpela dinau i kamap long Sentrel Beng em long taim Sir Mekere yet i bin Gavana bilong Sentrel Beng na Seketeri bilong Fainens. Na ol hevi bilong pastaim i save bungim i kam antap long tude, em i tok.

Em i tok Praim Minista Sir Mekere i wok long mekim planti toktok olsem strong bilong mani i go bek antap nau. Na i wok long karamapim ol rong gavman blong em i mekim.

Tasol em (Sir Mekere) i mas save olsem gavman bilong em i kamap long taim we olgeta samting i bin orait na ol bikpela hevi i pinis. Hevi bilong solwara bagarap long Aitape, hevi bilong bikpela drai na ais i pundaun long PNG i pinis, Esia maket prais i go antap tru na ol arapela hevi moa i bin pinis. Nau prais bilong oil, timba na log eksport i bikpela we i no bin olsem long 1998, Mista Skate i tok.

Oposisen lida i askim tu Praim Minista long tokaut long mani bilong Caveman Ailan we i gat ripot olsem wanpela pasbuk i stap long hap na gavman i mas tokaut long mani bilong dispela pasbuk i go olsem wanem.

## Abaijah bai salensim asembli disisen long kot

### WENCESLAUS MAGUN i raitim

RIJINOL memba bilong Milen Be provins, Dame Josephine Abaijah husat Milen Be Provinsel Asembli i rausim em olsem Gavana bilong provins na makim memba bilong Samarai Murua, Titus Philemon olsem Gavana i tok, em bai salensim dispela disisen long kot.

Mis Abaijah i tok em i tokim ol loya bilong em pinis long mekim wanpela ripot long dispela samting i go long Kot.

Long wankain taim, em i tok, em i plen long go luktuk raun insait long provins na tokaut klia long disisen bilong em na paitim toktok long dispela hevi wantaim ol memba bilong ilektoret bilong em.

Em i tok ol pipel bilong Milen Be bai luksave olsem wanem samting em i stret bai kamap ples klia.

"Mi save olsem ol lain i votim mi i no laikim dispela politikel hevi long provins we Mista Philemon wantaim ol sapota bilong em i resis long kisim posisen bilong Gavana," Mis Abaijah i tok.

Mis Abaijah i tok pastaim em i bin tingting long larim Mista Philemon na ol sapota bilong em long ronim Milen Be Provinsel Gavman. Tasol bihainim long em i glasim rot ol i bin bihainim long rausim em long sia bilong Gavana, em i luksave olsem ol i no bihainim stretpela rot. Long dispela as, Mis Abaijah i tok em bai salensim pasin bilong ol long Kot.

Em i tok tu olsem i gat bikpela wok bilong stretim ol lo bilong Provinsel na Lokol Level Gavman. Wanpela bilong planti ol bikpela hevi em hevi bilong mani.

Em i tok hevi bilong ol lo bilong dispela nupela rifom sistem bilong Provinsel na Lokol Level Gavman i mekim na sampela hevi i bin kamap pinis long sampela provinsel gavman olsem long Sentrel Provinsel Gavman na nau long Milen Be.

## Nupela eksekutiv komiti bilong Leitana Kaunsil

Leitana Kaunsil ov Eldas long Buka i gat ol nupela komiti nau. Siaman bilong ol Joel Banam i tokaut long ol nupela eksekutiv long dispela wik.

Joel Banam i holim yet wok bilong siaman na bai em i lukautim go pas long Taktok na Painim Belisi na Gutpela Sindaun.

Mark Naboen i Deputi siaman na bai lukautim Edministresin bilong Kaunsil.

Elai Kikit em i nupela Spika bilong Asembli.

Ol arapela komiti em hia; Ignatius Sopolu - Woks na Trensopot

Simon Hamal - Edukesen Julius Nahis - Egrikalsa na Forestri

Jack Wandau - Marin Risos Benjamin Murana - Komes na Industri

Herman Haliuhu - Kaunsil ov Siefs Jerry Kavop - Viles Kot na Lo na Oda

Mark Rumana - Ol Meri na Sios Henry Karolo - Yut na Spot

Joseph Gatana - Helt Mista Banam i makim ol wokman insait long opis tu. Sam Besuin i ekt- ing Sief Eksekutiv. Opisa bilong Kaunsil. Mista Jude Thamo i Dairekta bilong Projek Implementesin na Monitoring Yunit

(PIMU) Muriel Mangan nau i mekim wok bilong Akaun Klek.

Mista Banam i tok ol dispela senis bai helpim long strongim wok bilong Leitana Kaunsil ov Siefs. Em i tok bipo ol i save tingting tumas long wok politik. Tasol nau i gat gavman bilong Bogenvil husat i ken mekim ol dispela wok olsem na Kaunsil bilong em bai i spendim moa taim long helpim sindaun bilong ol pipel.

Em i tok ol rot long Buka i bagarap na wok i mas kirap nau long stretim dispela samting. Em i tok bihainim long Malangan Agrimen ol i pasim tok long stretim ol samting insait long Buka. Tasol i kam inap nau i nogat wanpela samting i kamap.

Mista Banam em i Siaman bilong Fainans na Edministresin, Plening na Lokal Level Gavman Komiti insait long Interim Bogenvil Provinsal Gavman (IBPG). Na em i askim Morata gavman long givim mani long ol wok ol i bin promis long mekim.

Em i salim pas i go long Praim Minista, Mekere Morauta na askim gen long mani bilong putim kolta na stretim ol rot long Buka.

Em i askim komiti memba bilong em Ignatius Sopolu long wok wantaim man i holim wok bilong Trensopot insait long IBPG na toktok strong long nesene gavman i mas bihainim promis bilong en na putim kolta long Buka rot.



SENSES Direkta Mista John Kalamoroh i laikim olgeta manmeri pikinini insait long Papua Niugini long wok yet wantaim ol senses wokmanmeri bilong ol.

Senses i bin pinis long las Sarere na stat long dispela wik. ol senses wokmanmeri long olgeta hap bilong Papua Niugini i go bek ken long kauntim ol pipel ol i no bin kauntim long taim bilong senses las wik.

Long Tok Inglis ol i kolim dispela kain wok olsem mop-ap opareisen.

Pastaim tru, Mista Kalamoroh wantaim ol lain bilong em i bin makim wanpela wik tasol long mekim mop-ap opareisen.

Nau bai ol senses wokmanmeri i mekim mop-ap opareisen long 4-pela wik insait long ol ples kanaka na rural eria.

Long ol taun, bai ol i mekim mop-ap long 2-pela wik.

Mista Kalamoroh i tok aste olsem em i sukurim o ekstendim taim bilong mop-ap i go long 4-pela wik olgeta bikos wok bilong kauntim ol pipel i bin stat leit long planti hap bilong Papua Niugini. Ren tu i stopim wok bilong senses long planti hap bilong kantri.

Mista Kalamoroh i tok em i sori long ol senses wokmanmeri bilong em bikos wok bilong senses i no isi na em i askim ol long hatim wok ken long 4-pela mo wik.

"Plis helpim mipela ol senses wokmanmeri bilong yu long mekim gut dispela wok na pinisim gut senses bilong kantri bilong yumi," Mista Kalamoroh i tok long senses hetkwota bilong em long Pot Mosbi.

Em i tok ken olsem toktok ol senses wokmanmeri i kisim long ol pipel bai i helpim Gavman na ol lotu long skelim gut mani bilong developmen namel long wanem ol ples i nogat ol samting olsem rot, skul, bris, wof bilong ol sip, ples balus, hausik na ples bilong kisim gutpela wara bilong dring na kuk.

Mista Kalamoroh i tok olsem long taim stret bilong senses long las Sande Julai 9 i go inap long las Sarere Julai 15. ol senses wokmanmeri i no kauntim ol manmeri pikinini taim i nogat man i stap long haus.

Em i tok olsem ol arapela lain i no bin laikim ol senses wokmanmeri long kauntim ol bikos ol man nogut i bin paulim tingting bilong ol na tokim ol olsem senses em i samting nogut.

Mr Kalamoroh i tok ol man i noken kusar na giaman nambaut long wok bilong senses.

● Gavman bilong Papua Niugini na Gavman bilong Australia i sapotim 2000 Nesen Senses.



# NIUGINI AILAN NIUS

## Is Niu Briten laik kirapim wanpela intanesenel hotel long Kokopo

IS Niu Briten provinsel gavman i lukluk long rot bilong wok bung wantaim Airways Hotel na Apatmen Limited long wokim wanpela intanesenel stendet hotel long Kokopo.

Provinsel Asembli i no longtaim i go pinis i givim tok orait long deputi gavana na Siaman bilong DPI na Komes, Leo Dion na provinsel gavman bisnis han, Is Niu Briten Developmen Koporesen, long lukluk i go insait long dispela.

Mista Dios i tokim asembli olsem dispela em hap wok bilong Is Niu Briten gavman long promotim foren invesmen insait long provins bihainim hevi bilong mani kantri i wok long bungim.

Em i tok, dispela bai bringim moa turis i go insait long provins na kamapim moa wok bilong ol pipel.

Mista Dion husat bai go pas long toktok wantaim Airways Hotel bai givim riopot bek long asembli bipo long ol i pasim tok long kirapim dispela join vensa projek.

Em i tok ol i plen long wokim dispela hotel klostu long Ralum Sivik Senta na Ralum Golf Klub.

## Brown stapim K2 milien Gazelle Distrik hetkwata projek

**WENCESLAUS MAGUN i raitim**

MEMBA bilong Gazelle, Sinai Brown i stapim K2 milien Gazelle Distrik hetkwata projek we olpela memba Nakikus Konga i skelim mani long wokim.

Mista Brown i stapim dispela projek long wanem em i bilip ol inap yusim samtipela bilong dispela mani long kirapim ol arapela projek olsem stretim ol rot insait long distrik.

Long dispela taim, Mista Brown i tok, ol bai larim dispela projek bilong nupela distrik hetkwata i stap pastaim na lukluk long nupela developmen plen bilong distrik we em i kamapim.

Bihain long wanpela kibung wantaim ol provinsel administresen eksekutiv, Mista Brown i tok, long kirapim wanpela nupela opis long K2 milien em i bikpela mani tumas.

Em i tok dispela opis inap kos samting olsem K500,000 na ol i ken yusim K1.5

milien long kirapim ol arapela projek we ol pipel i laikim long dispela taim olsem stretim ol rot i bagarap.

Long taim Mista Brown i kisim opis, em i no westim taim. Em i laikim moa mani i go insait long stretim ol rot, trening program bilong ol LLG lida, pablik sevans na hapim level bilong ol distrik edministreta.

Em i tok sapos Gazelle Distrik i laik wok long wanpela gutpela plen, em i laikim bai i mas gat ol pipel i gat moa save na wok ekspiens long kamapim wanpela tim husat bai i gat wok long lukim ol developmen projek i kamap.

Mista Brown i tok, moa long 80,000 pipel bilong Gazelle i mas kisim gutpela sevis long gavman olsem gutpela rot sistem.

Em i tokim provinsel edministresen pinis long karim aut wanpela wok painim i go insait long ol rot insait long distrik long painim aut wanem ol rot ol i mas stretim kwik long wanem ol i bagarap olgeta.



• Antioch yut bilong St Mary Katolik Sios long Kimbe taun i lukluk long Jubili Yia 2000 skapsa autsait long haus lotu bilong ol.

## Brown stretim K1,250,000 Gazelle Distrik Baset

GAZELLE Distrik Joint Plenning na Baset Praioriti komiti, i glasim baset bilong dispela yia long mak bilong K1,250,000.

Dispela Baset, we memba bilong Gazelle, Sinai Brown i kamapim i no karamapim K200,000 diskresineri fan bilong memba.

Tasol em i strongim ol polisi Mista Brown i bin toktok long en long taim em i bin raun kempen long taim bilong ileksen. Ol dispela polisi em long lukluk long stretim ol rot i bagarap na glasim ol 'Top-Up' sistem insait long edukesen rifom.

Long taim em i pasin baset bilong em las wik,

Mista Brown i tok bikos em i gat bikpela laik long developim Spot na Musik, em i putim sampela mani insait long baset bilong em long dispela tupela projek.

Yusim dispela olsem stia, Mista Brown, glasim baset bilong em na katim mani long edukesen i go long 35.02 pesen long 67 pesen we i bin stap bipo na hapim mani insait long infrastraksa long 27 pesen i go antap long 40.92 pesen.

Em i skelim K76,000 i go insait long Musik na Spots na ol arapela samting bilong amamas, na hapim mani bilong Helt long

K40,000 i go antap long K100,000.

Mista Brown i skelim K393,213 i go long Tom-Vunadidir LLG long wanem ol i bin givim em planti vot long taim bilong ileksen.

Moa yet, aninit long rivais baset, 8-pela wod insait long Raluana, long namba wan taim i kisim K49,500 long dairek projek fanding, na i no K1000, ol i save kisim long wan wan wod.

Mista Brown i plen long makim wanpela mausman o meri bilong dispela eria i go insait long Gazelle Joint Plenning na Baset Praioriti komiti.

## WANTOK NIUSPEPA BILONG OL PNG STRET

P. O. Box 1982, Boroko  
Telepon namba: 325 2500  
Feks namba: 325 2579

### PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00



## Is Niu Briten bai yusim tupela kain mani

IS Niu Briten provinse bai yusim tupela kain mani long mekim wok bisnis. Ol bai yusim Kina na Toea na Tambu sel mani.

I no long taim i go pinis, Is Niu Briten provinsel asembli i tok orait long karim aut wanpela stadi i go insait long we bilong kamapim na yusim Tambu sel mani, we ol i save yusim long baim meri.

Deputi Gavana na Siaman bilong Dipatmen bilong Praimeri Industri na Komes, Leo Dion, i tok, bikos kos bilong ol samting i wok long go

antap, provinsel gavman i laik painim ol arapela rot bai ol pipel i nogat Kina na Toea i ken yusim tumbuna mani (Tambu sel).


Mista Dion i tok prais bilong ol samting i dia tumas na dispela i mekim ol pipe i painim hat long painim inap mani long baim ol samting. Na olsem ol i mas gat sans long yusim Tambu sel long baim ol samting insait long provins.

Em i tok provinsel gavman i gat plen long kamapim lo bilong yusim ol Tambu sel mani na bai mekim wankain long Kakal na


Miss mani we ol pipel bilong Mengen na Baining i save yusim sampela taim bihain.

Divisen bilong Komes na Industri bai karim aut wanpela wok painim i go insait long dispela long sampela taim bihain.

Memba bilong Gazelle, Sinai Brown, husat i save baim Tambu sel mani long Solomon Ailan i tok em i amamas long dispela tingting i tok orait long yusim dispela mani long provins bai helpim long strongim kalsa na pasin tumbuna bilong provins.



# SEPIK NIUS



## Ol pipel ting tupela krismas bilong Aitape bagarap

*Toktok bilong memba Eddy Saweni*

ADAM ELLIOTT i raitim

LONG tingim bek bikpela bagarap we i bin kamap long Aitape tupela krismas i go pinis, ol pipel bilong Aitape na Sandaun provins i sindaun na lukluk i go bek long ol pastaim na tude. Dispela mun Julai i makim tupela krismas bipo we dispela birua bilong solwara i kamap na bagarapim laip na sindaun bilong planti manmeri pikinini long ples Malol, Sisano, Barupu na Arop.

Memba bilong Aitape Lumi Eddy Saweni i bin bung wantaim ol pipel bilong em long tingim bek dispela taim long las wik.

Insait long toktok bilong em long ol pipel em i tok, mi gat bikpela wari long yumi ol pipel bilong dispela eria. Mi mas tok strong long wari bilong mi long wanem sampela bilong ol developmen we i mas kamap pastaim we ol arapela sevis bai bihainim na kaikai bilong restoren i ken go long ol pipel long dispela eria

i no bin kamap aninit long restoren program. Sampela bilong ol dispela sevis i as tru bilong senis i ken kamap long laip bilong wanwan manmeri na pikinini.

Mista Saweni i tokaut long ol dispela samting em:

- Rot bilong bungim olgeta kea senta o risetelmen eria. Ol dispela rot em: Aitape, Ramo rot, Ramo Barupu rot, Barupu Wipom rot, Ningian Arop 1 na Arop 2 rot, Wipom Rowoi na Olbrum rot na Aitape Vanimo rot.

- gutpela wara saplai long olgeta risetelmen eria. Mi givim pinis long 1999 K50,000 long provinsal na distrik edministresen long lukluk long baim ol dafa tenk na givim i go long ol pipel bilong disasta eria we i no gat yet gutpela wara saplai o pinisim gut wara saplai aninit long restoren wok.

- Trensport olsem ka bilong helpim ol pipel bilong disasta eria long i go kam long Aitape taun. Mi wari long lukim olsem ol pipel

i wok long yusim yet solwara long kisim ol samting i go kam long risetelmen eria. Mipela i no save narapela taim bai naarpela hevi i kamap gen. Olsem na mipela i mas redim narapela wei long ol pipel yusim rot na i no solwara olsem wanpela we tasol bilong trenspot i go kam long Aitape na Vanimo.

Mista Saweni i tok em i sori long harim olsem Aitape daosis rihebiiltesen opis bai pasim wok bilong ol bikos ol mani i kam long ol dona ejensi i pinis nau. Husat bai i go pas nau long lukluk long painim mani na stretim ol wok i no pinis yet, memba i askim.

Opis bilong mi wantaim distrik edministresen bilong Aitape Lumi edministresen i no inap kisim dispela wok inap rihap komiti yet i painim moa mani na bai opis bilong mi na Aitape Lumi edministresen i ken yusim long traim long pinisim ol wok i hangamap yet, Mista Saweni i tok.

### Wes gat plen long kamapim ol rurel haus kalabus

Minista bilong Koreksenal Sevises (CIS) na memba bilong Vanino Green, Micah Wes i tokaut olsem i gat tingting long kamapim ol rurel haus kalabus taim em i bekim sampela askim bilong memba bilong Tari Pore, Tom Tomispe.

Mista Wes i tok nau yet ministri bilong em i nogat mani na olsem em i no inap lukim ol dispela tingting bilong

em i karim kaikai tasol em i tok em bai toktok wantaim CIS Komisina na ol bai lukluk long dispela. Misra Wes i tok tingting bilong kamapim ol rurel haus kalabus bai helpim ol distrik long wanem ol kalabus i ken klinim ol distrik na i no olgeta long ol provinsal haus kalabus long wanem spes bilong ol provinsal haus kalabus tu i save pulap panti taim.

Minista Wes i mekim wankain tok gen taim em i tokaut pastaim long Vanimo we em i bin go raun lukim haus kalabus long hap. Em i bin tokim ol CIS opisa na ol bikman na sapota bilong em olsem em bai gat dispela plen long kirapim gut ol rurel haus kalabus. Bai ol kalabus lain i ken stap long distrik na mekim wok gut na helpim komyuniti tu wantaim.

## Wara bagarapim Raihu haus sik

BIKPELA ren i mekim wara i tait i go insait long Raihu haus sik long Aitape distrik long Mande nait we mak olsem 30 sikmanmeri i bin kirap lusim haus sik bet na go antap long drai ples.

Moa long 60 woklain i bin wok long nait long rausim ol marasin, ol samting bilong haus sik na ol sikmanmeri i go antap long ol ples we tait wara i no inap go long en. Level bilong wara i bin go antap long mak olsem 1 mita.

Bruda Gary Hill, wanpela Helt Ekstensen opisa long Raihu haus sik i tok wod bilong ol pikinini, edministresen opis na Eks-Rei (X-Ray) rum wantaim Patoloji dipatmen i bin bungim hevi long wara i kam insait.

Bikos mipela i bin laki long i gat planti lain i kam long helpim na sevim ol samting long haus sik, planti samting i no bagarap. Sapos ol lain i no kam helpim mipela, mipela inap lusim planti samting, Bruda Gary i tok.

Bruda Gary i tok level bilong wara i kam antap long 2 kilok moning. Ol sik pikinini i stap nau long Obstetrik wod inap wara i drai na ol woklain i klinim gut ples.

Ol sik pikinini long dispela wok i bin kisim marasin long sik malaria na ol arapela sik. I

gat wanpela yangpela boi we ol dokta i bin katim lek bilong em. Mipela i bin laki bikos pawa i no bin dai long nait olsem na mipela i mekim ol wok gut, Bruda Gary i tok.

Rot i go long Raihu haus sik i bagarap tru long tait wara we ol 4 wil ka tasol bai i ken ron i go kam. Raihu haus sik i stap olsem 5 kilomita longwe long Aitape taun.

Hevi bilong wara i tait na bagarapim ol samting long Raihu haus sik i no nupela. Insait long 20 krismas olgeta wara i save kamapim dispela hevi long Raihu haus sik na Helt Edministreta i bin traim long painim

mani bilong sanapim haus sik antap long pos.

Planti bilong ol dispela haus sik bilding i sanap olsem moa long 40 krismas na planti samting i olpela tru. Sapos mipela i klinim ol samting hariap bai i nogat planti bagarap tumas tasol mipela bai senisim ol taim i gat mani i redi, Bruda Gary i tok.

Maski ol samting i bagarap, Bruda Gary i tok ol bai op yet na wok yet long klinim ol ples na ol samting we wara i bagarapim inap long neks wik na traim mekim olgeta samting i go bek wankain gen.

20t  
WANTAIM VAT  
Hubba Bubba  
NOKEN PEIM MOA

WIN! WIN! WIN!  
TOYOTA HILUX 4WD TO BE WON!  
AND 25 PEOPLE TO WIN K1,000 EACH  
DRAWN ON 15th SEPTEMBER 2000  
SEND IN ANY 3 EMPTY WRAPPERS OF HI-WAY HARDMAN OR HI-WAY BEEF IN AN ENVELOPE WITH YOUR NAME AND ADDRESS TO: EMTV P.O. BOX 443 BOROKO, NCD.  
Paradise  
TOYOTA  
HI-WAY  
HI-WAY HARDMAN  
Strongpela Biskot!  
HI-WAY BEEF THE BIGGEST! 140g NET

# SAUTEN RIJON

## Not Flai i strongim progrem bilong helpim ol disabel

**IAN KAKARERE i raitim**

Sampela papamama, ol tisa, sios woka, komyuniti woka na helt woka long Not Flai eria i kisim tu wik skul long pasin bilong lukautim ol disabel manmeri.

Dispela spesel skul i bin kamap long Peter ToRot Faundesen Senta long Kiunga we ol 25 manmeri husat i mekim wok bilong helpim ol disabel manmeri i bin kamap.

Sista Monique Michaud husat i go pas long wok bilong Callan Sevis long Kiunga i tok Katolik Daiosis bilong Daru-Kiunga i kirapim wok nau long helpim ol disabel pipel long hap bilong Westen provins.

Sista Monique i tok dispela projek i hap bilong Callan Sevis bilong ol Disabel manmeri. Hia long PNG het-kota bilong ol i stap long Sen Benedik Tisa Koles long Wewak.

Dispela senta long Wewak i mekim wok bilong skulim ol manmeri long helpim ol pikinini husat i aipas o yau pas o i disabel.

Sista Monique i tok as bilong kirapim ol dispela projek long daiosis em long givim sevis i go long ol

pikinini na ol bikpela manmeri tu olsem bai ol i ken painim gutpela sindaun long laip bilong ol.

Em i tok ol i givim skul long ol pipel long mekim ol dispela kain wok;

- go lukim ol disabel long haus bilong ol na skulim ol mama na wasman long pasin bilong lukautim disabel;

- pasin bilong ekseais na helpim masel na bodi bilong disabel;

- helpim disabel long sindaun bilong em insait long komyuniti;

- pasin bilong lukautim ai na yau;

- sekap long ol liklik bebi taim mama i kisim ol i go skel;

- stretim rot bilong disabel i lukim dokta;

- painim ol samting bilong helpim ol aipas na yaupas na ol arapela disabel.

Sista Monique i tok Katolik Helt na Edukeseb Ejensi bai wok wantaim ol arapela sios na gavman husat i mekim wok bilong helpim ol disabel.

Evanjelikel Sios bilong PNG i save mekim wok bilong lukautim ai long Rumginae Helt Senta.

Em i tok Katolik Sios long Kiunga bai givim wanpela haus long mekim wok bilong helpim ol disabel pikinini.

Sista i tok las yia ol i bin mekim ok painimaut na ol i lukim olsem i gat planti disabel pikinini long ol ples na ol setelmen klostu long Kiunga taun.

Em i tok ol i statim wok long Kunga na bihain bai ol i skruim wok i go long ol arapela ples insait long provins.

Sista Monique wantaim wanpela moa nes husat i kisim trening long Callan Sevis Wewak i mekim dispela wok nau. Narapela komyuniti helt woka long Katolik Helt Sevis i go trening long Wewak long ol wok bilong helpim ol disabel.

Wanpela praimer skul tisa long Kiunga Montfort praimer skul i stap nau long Rabaul long skul long helpim ol yaupas.

Sista Monique i tok olgeta dispela wokmanmeri bai helpim long skulim ol papamama, ol tisa, nes na arapela manmeri long stretpela pasin bilong ol helpim ol disabel.

Patrick Moon bilong Callan Sevis na Rody Ukrin bilong Rumginae Helt senta i helpim long givim skul long ol pipel husat i kam stap insait long dispela tupela wik kos.

## Baing askim Oro pipel long opim rot long Kokoda Treil

**YAKAM KELO i raitim**

KALSA na Turis Minista Andrew Baing i askim Oro provinsal gavman na ol pipel bilong ol long opim rot long Kokoda Treil.

Mista Baing i tok em i no inap surik long tok pret o tok hat bilong ol pipel bilong Oro wantaim Gavana bilong ol Sylvenius Siembo long pasim Kokoda Treil.

Em i askim ol long opim gen dispela rot o nogat bai Turis Promosen Atoriti (TPA) bai salim ol turis i go long ol arapela provins we i gat ol rot na samting ol turis i ken go long en na lukim.


Em i tok long las wik tasol TPA i salim 80 studen bilong Australia i go long Madang bikos Kokoda Treil i pas. Ol i laik wokabaut long Kokoda

Treil. Tasol TPA i salim ol i go long Madang. Olsem na TPA bai mekim olsem yet long salim ol turis i go long ol arapela provins we ol pipel i ken amamas long salim ol samting ol i gat long ol turis na mekim mani bilong ol.

Oro Gavana Mista Siembo i bin sapatim ol lain bilong ples long singautim kompensesen long nesenel gavman long Kokoda Treil. Tasol dispela tok-tok bilong ol i no kisim bekim bilong gavman olsem na ol i blokim rot.

Tasol Mista Baing i tok em bai singaut wantaim ol na toktok long ol hevi bilong ol tasol ol i mas opim bek dispela rot. Tasol em i tok dispela kain hat pasin bilong ol Oro pipel long pasin Kokoda Treil i no inap mekim em i surik long stretim singaut bilong ol.

Em i no maket ples • Edministreta bilong NCDC i toktok long ol lain husait i save salim buai na kaikai long Erima, Nesenel Kepitel Distrik bihain long NCDC i no luksave long dispela ples olsem maket na dispela pasin bilong kaikai buai long hap i tambu tru. Mista Kipit i tok sapos ol i laik salim ol samting bilong ol, ol i mas go long 6 mail o 9 mail. Tasol planti maket man na meri i no amamas long dispela bikos ol i tok olsem taim ol i go long dispela tupela ples ol manmeri bilong dispela hap i save rausim ol. Tasol Mista Kipit i tok i nogat wanpela man o meri i bosim ol maket, NCDC tasol bosim ol. Dispela pasin bilong salim kaikai na buai long ples nabaut na i no save maket i mekim Mosbi i luk bagarap. *Poto: IVAN BAYAGAU.*



## Nesenel Senses i stat nau

Bikpela wok bilong kaunim ol manmeri insait long kantri i stat nau. Ol opisa bilong Nesenel Senses i stat mekim dispela wok long olgeta hap bilong kantri long Mande Julai 10.

Long sampela hap bilong kantri i bin gat ol hevi i kamap na wok i no stat long Mande. Long Bogenvil i bin gat tok lukaut i kamap long Mista Joe Kabui olsem i no gat senses bai i kamap long

Bogenvil inap nesenel gavman i harim krai bilong ol.

Long sampela ples ren i pundaun na balus i no inap karim ol pepa bilong mekim wok.

Opis bilong Papua Niugini Tred Kongres i askim

olgeta wokman long kantri long sapatim dispela bikpela wok. Jeneral Seketeri, John Paska i tok dispela wok bilong kaunim ol pipel em i bikpela samting na ol pipel i mas stap isi na bekim ol

askim bilong ol Senses Opisa.

Mista Paska i tok ol toksave i kamap long Senses bai i helpim gavman na ol kampani long plenim wok bilong ol long ol yia i kam bihain.

Em i singaut tu long ol plisman na meri na ol arapela han bilong gavman long was gut long ol dispela opisa husat i mekim dispela wok bilong kaunim ol pipel long Papua Niugini.




Tablebird Kwikkai 900 gr	K5.25
Cosifits Nappies	K12.75
Roots Rice 1 kg	K1.37
Snowwhite Bleach 500ml	K1.48
Cold Power 200gr	K1.33
Globe Corned Beef	K2.79
Paradise Hiway Hardman 125gr	K0.40



Weet Bix 375 gr	K3.45
Mortein Mosquito coils	K .95
Flame Plain Flour 1 kg	K1.11
Maggi Noodles 85 gr	K .50
Rosella Tomato Sauce 300ml	K1.90
Gental Toilet Rolls	K0.53
Sunshine Milk 1litre	K1.39

Planti moa kaikai prais i go daun long en!

Ph: 325 7566, 325 0863 Fax: 325 7096



# HAILANS NIUS



## CIC givim K72,000 long bus ples Daribi

JAMES KILA i raitim

OL PIPEL bilong Daribi insait long bus ples insait long Karamui eria bilong Simbu provins i bin amamas tru taim CIC i bin givim ol dinau mani mak bilong en i olsem K72,000.

Dispela em namba wan taim tru kain helpim bilong mani i bin go insait long dispela ples we i stap longwe tru long bus. Nogat rot i go olsem long Karamui na DARibi. Ol liklik balus tasol i save flai i go.

Dispela K72,000 em CIC i bin givim i go long 22-kopi fama long helpim ol long karimaut wok kopi developmen long eria bilong ol. Bihain long sampela yia ol bai bekim bek dinau. CIC i gat bikpela bilip tru long ol dispela pipel bikos ol lain tru bilong wok hat long planim kopi na lukautim gaden bilong ol.

Insait long wanpela selebresim i bin kamap long liklik ples balus long Negabo long las wik Fonde, CIC i bin askim Gavana bilong Simbu provins, Pater Louise Ambane, memba bilong Karamui-Salt-Nomane, Simeon Wai long stap insait long dispela.

Dispela go bilong tupela lida long Daribi em i namba wan taim tru. Planti ol pipel long hap tu i no save long pes bilong memba bilong ol Mista Wai. Dispela bung em namba wan taim tru long ol i lukim ples bilong em. Ol i save harim nem tasol.

Wanpela komyuniti lida, Tulip wosu i tokim tupela lida taim em i givim toktok olsem ol pipel bilong em long Daribi i olsem lus sipsip. Nogat gavman sevis i save go long ol. Nau tasol CIC i go insait na helpim ol, olsem na ol i amamas tru.

CIC i bin helpim ol dispela pipel lon dispela bus ples long wanpela freit subsidi skim progrem bilong en. CIC i helpim long peim 40 pesen pe bilong balus, an ol kopi groa i peim 60 pesen. Dispela freit subsidi i helpim ol fama long bus ples i karim kopi bilong ol i go salim long taun.

Tupela lida i bin sanap long givim ol dinau mani we CIC ol i brukim i go long 22 kopi groa insait long Daribi.

Pater Louise Ambane na Mista Simeon Wai i bin givim toktok bilong ol long sait bilong wokim rot i go long ol dispela pipel we wok bilong ol i save strong insait long kopi.

Tasol wanpela bikpela samting ol pipel insait long dispela eria i strong long en em kopi. Olsem na ol i singaut tu long tupela lida ya long sapotim ol na givim sampela mani long sapotim wok developim long eria bilong ol.

Daribi em i stap longwe tru long taun. Planti ol manmeri long dispela eria i no save lukim taun o siti. Wan wan bilong ol tasol i save go salim kopi long Goroka na Kundiawa na bringim mani i go bek long helpim ol femili bilong ol.

Moa long 500 manmeri i wokabaut abrusim ol bikpela wara, bus na maunten na i bin kamap long Negaho ples balus long lukim wanpela bikpela samting tru i bin kamap.

Mista Wai i bin tokim ol pipel olsem em bai givim wanpela K50,000 helpim insait long wanpela rivo-lving fan long baim kopi palpa masin bilong ol dispela pipel.

Pater Louise Ambane i bin givim strongpela tok tru i go long ol pipel olsem ol i mas bringim kopi bilong ol i go long Kundiawa na salim. Dispela bai i ken helpim na sapotim lokal prodaksin.

Tasol, Mista Wosu i makim maus bilong ol pipel na i tok olsem planti taim ol pipel bilong Daribi i save bringim kopi i go long Kundiawa, tasol ol raskol i save hensapim ol na stilim mani na kopi bilong ol. Narapela samting tu ol pipel i laikim gutpela prais olsem na ol i save go long narapela hap na i no Kundiawa.

## Payam Komyuniti Skul sot long skul sapla

TIMOTHY AIMS i raitim

OL bod ov menesmen bilong Payam Komyuniti Skul long Pogera gol maining eria i tokaut olsem ol bai pasim skul sapos edukesen i opis i no salim namba wan na seken kwata skul subsidi bilong baim ol skul saplai i kam hariap.

Mausman bilong bod Peap lapia i tok ol i wetim yet ol saplai bilong skul long mekim

ol wok bilong skul long tupela kwata nau na ol bai pasim skul sapos edukesen atoriti i no salim ol dispela saplai i kam.

Mista lapia i tok i nogat ol buk na samting bilong skulim ol skul pikinini, nogat sok bilong rait long blak bod na nogat ol laibri bruk bilong ol skul pikinini i yusim.

Em i tok distrik edukesen atoriti i save long dispela tasol i no mekim wanpela bekim yet

long dispela hevi.

Em i tok tu olsem skul i bin kisim toksave long kamapim gret 7 na gret 8 tasol ol tisa i no inap skul insait long klasrum we i nogat wanpela samting long en.

Dispela i no olsem skul we i nogat lait, ol skul buk, em i tok.

Em i askim edukesen opis long mekim sampela samting long dispela hevi bilong ol insait long tripela wik taim.

Nogat bai ol i pasim skul na salim ol studen i go bek long haus.

Em i tok tu olsem 10-pela arapela skul insait long distrik i gat wankain hevi tu.

Payam Komyuniti skul i gat 13 tisa olgeta na i gat 600 skul pikinini.

Em i singaut tu long Enga Gavana Peter Ipatas long lukluk tu long dispela hevi bilong ol.



### Skul i stap nating...

• Ol sumatin long Goroka Yunivesiti tu i holim straik long sapotim ol hailans tisa long straik bilong ol long apim pei i go antap long dispela wik. Ol tisa i tok ol i save planti hatwok tasol pei ol i kism i no inap na gavman i mas hapim pei i go antap. Ol sumatin tu taim ol i pinis long skul bai ol i kamap tisa olsem na ol i stretim ples pastaim bikos bihain bai ol i go kamap tisa tu. Gutpela tasol ol i lusim stadi long straik.

## K1.5 milien EDF em bikpela mani, lpatas i tok

GAVANA bilong Enga provins Peter Ipatas i salensim ol Enga open memba olsem wanwan ilektoret long provins i nogat gutpela lidasip.

Mista Ipatas i tok planti taim ol open memba i save lusim ilektoret na go nambaut na i no save kam bek na mekim wok long wanwan distrik bilong ol.

Mista Ipatas i tok dispela K1.5 milien wanwan open memba i save kisim em bikpela mani tru na ol memba i mas yusim stret long ol wok bilong distrik. Bikos ol memba i no yusim gut dispela EDF mani, ol ilektoret i no lukim gutpela senis i kamap long dispela rurel developmen fan.

Gavana i tok rifom i no tok long putim bikpela mani long poket bilong ol memba, tasol mani i mas go long ol kaunsil long ol rurel eria na distrik.

Mista Ipatas i tok em i wari tru log lukim olsem bikpela mani i save go long han bilong ol open memba tasol ol i save abrus tru long salim dispela mani i go long strongim ol wok bilong risos na divelomen long ol ples na distrik long provins.

Mista Ipatas i mekim dispela toktok long taim bilong pasim woksop long rifom implimentesen long Amapyak las mun.

2000 CENSUS ADVERTISEMENT

HARIAP! PIK BILONG MI I HEVI!

... AND DIS WAN, HER NAME IS BIYUTIFUL!!

GULP! THERE'S.. AHM... A MISUNDERSTANDING HERE! THE CENSUS IS FOR HUMAN BEINGS ONLY!

HEH HEH HEH! MOPPING UP FOR TOWNS, 2 WEEKS FOR THE BUSH, 4 WEEKS

There are people who are talking about submitting names of all sorts of things, like pigs and dogs, to the census officers. We are doing our best to get the message across to the people that this exercise has nothing to do with the elections. census officers Kundiawa and

## 2000 National Census Hotline

Ol i no kaunim yu? Em i no let. Apim telefon tasol na ringim Fri kol  
Census Hotline - 180 1000

Givim adres bilong yu. Mipela bai kam na kaunim yu.

Kaunim mi tu!





# MADANG NIUS



## Ol kaunsel presiden laik rausim Kas

OTTO AVOROSI i raitim

I GAT strongpela tingting insait long Madang politiks long rausim Madang Gavana, Jim Kas.

Dispela tingting bilong rausim Gavana Kas em Kaunsel presiden bilong Almami, Syral Loman, Karkar Daniel Amai na Ambenob, Jack Nagg i go pas long en.

Namba wan taim Mista Nagg i givim notis long Gavana Kas long risain bai em i noken bagarapim gutpela nem bilong em.

Bihain long dispela Mista Loman i bringim wanpela notis bilong vot i nogat bilip agensim Mis kas, we Mista Amai i sekenim.

Dispela ol pasin i kamap bihain long Gavana Kas i bungim wanpela ka eksiden we i lukim wanpela bisnisman bilong Simbu husat i bin kam lukim Mista Kas long wok bisnis i bin dai long dispela ka eksiden.

Dispela birua i bin kamap long Madang-Bogia Haiwe, klostu long Baitabak Hai Skul.

Mista Kas i yusim posisen bilong em olsem saiman bilong asembli long daunim dispela ol pasin. Em i tokim ol memba bilong Provinsel Asembli olsem ol i mas bihainim ol rot bilong palimen long bringim dispela tingting bilong ol i go.

Mista Kas i tok tu olsem em i no save long K30,000 we Provinsel Gavman i bin yusim long baim ol famili bilong dispela bisnisman husat i bin dai long dispela birua bilong ka.

Em i tokim ol memba olsem ol gavman ejensi i lukluk long dispela eksiden na em i no inap toktok long dispela samting.

Las Fraide Siaman bilong Edukesen na Nesenal Memba bilong Raikos, Stahl Musa, Siaman bilong Neserel Risoses, Peter Bais na Gavana Kas tasol i bin kamap long asembli. Olgeta ol memba bilong provinsel asembli i no bin kamap.

Ol memba bilong Provinsel Eksekutiv Kaunsel wantaim Siaman bilong Lokol Level Gavman na Lord Meya, Amanasenek, i bin stap long provinsel asembli haus tasol i no kamap long asembli miting.

Mista Kas i surikim asembli i go long wanem taim em i gat laik long kolim asembli.

Mista Nagg i bin kros ausait long provinsel asembli na i tok, 'em i wanpela plen samting long wanem ol dispela kabinet memba i tingting long lukautim wok bilong ol na i no sindaun bilong ol pipel bilong Madang.'

## Madang provins gat nupela helt bod

Madang provinsel gavman opis i sanapim pinis wanpela nupela helt bod long helpim provinsel gavman long lukluk long helt hevi stap long provins na tok save long provinsel gavman bai i ken wokim samting na kamapim polisi bilong helpim dispela ol hevi.

Wok bilong dispela helt bod em long lukluk na givim tingting long provinsel gavman bai provinsel gavman i ken kamapim dispela Nesenal Helt Plen insait long provins wantaim provinsel helt plen bilong Madang provins yet.

Narapela wok dispela helt Bod bai i mekim em long lukluk long olgeta samting long helt bilong ol pipel long provins na tu ol i ken mekim wok painim aut i go insait long hevi bilong helt insait long provins taim gavana i tokim ol long mekim dispela kain wok.

Dispela helth bod bai lukluk na mekim

save olsem olgeta tingting i stap aninit long Nesenal Helt Plen i kamap gut na karim kaikai, na wankain plen i stap long provins tu mas karim stretim gut na lukim olsem dispela ol ting i go het olsem stap long pepa. Dispela nupela helt bod i bai i sindaun wantaim na givim tingting i go long baset praiioriti komiti long taim bilong mekim baset na toktok long wanem samting i sot na hamas mani ol i laikim bilong stretim dispela kain hevi.

Ol nupela memba bilong dispela bod i stap olsem provinsel edministreta Clant Alok (siaman) Mista Augustine Dungstan, Max David, Don Kudan, Nalon Deer, Peter Nombo, Susan Wolok, Glen Castro, Peter Alingou, John Levi na Steven Demok.

Long taim ol i makim dispela nupela helt bod, nambatu edministreta Galun

Kasas husat i makim maus bilong Gavana Jim Kas husat i no stap long dispela bung i tokim ol bod membas olsem wok bilong ol i bikipela samitng tru na ol i mas wok gut tru na givim palnti taim long dispela bikipela wok.

Mista Kasas i tok olsem em i save olsem ol dispela bod memba i gat planti ekspiriens na ol bai givim gutpela tingting long gavman long sait bilong stretim helt bilong planti maneri husat i kamapim bikipela hap populesen bilong Madang. Dispela bikipela hap populesen i stap long ol hap bikbus nabaut na dispela bod bai traim helpim ol dispela lain kisim gutpela helt sevis.

Siaman bilong nupela helt bod Vlant Alok i tok bod bai mekim hat wok na traim bes long helpim gavman long wanem kain hevi bilong helt ol pipel i kisim long sait bilong helt insait long Madang provins.

## Wama tenkim Luteran Sios long Yagaum Haus Sik

MEMBA bilong Madang, Jacob Wama i tenkim Luteran Sios bilong Papua Niugini na Madang Yagaum Luteran Sios long ronim Yagaun Haus Sik insait long 50 yia aniveseri bilong dispela haus sik selebresen.

Mista Wama i tok long taim bipo i kam inap tude, sios i putim mani na taim long bringim helt

sevis i go long ol pipel moa yet long ol pipel i stap long ples.

Mista Wama i tok long 50 yia aniveseri bilong Yagaum Haus Sik long Julai 22, 2000, em bai tenkim ol lain husat i kisim taim long developim helt sevis olsem Yagaum we i save helpim ol pipel bilong Madang Provins.

Mista Wama i gat plen long

developim Yagaun Haus Sik. Las yia em i putim mani bilong banisim haus sik. Em i tok em bai putim mani tu long stretim ol samting bilong haus sik.

Mista Wama i tok Yagaum i gat nem bilong givim gutpela sevis na ol i mas lukim bai dispela gutpela nem i stap yet.



• Ol pipel bilong Kamba i givim sampela presen long memba bilong Madang Open, Jacob Wama taim em i go opim nupela klasrum bilong ol. Foto: OPIS bilong MISTA WAMA.

## PAPUA NEW GUINEA'S SILVER JUBILEE

# School Essay Competition



## About the Competition

<b>Category 1:</b>	ALL STUDENTS IN GRADE 3 & 4.
<b>Essay Topic:</b>	"Who was the Prime Minister 25 years ago?" Tell us more about him.
<b>Essay Length:</b>	200 Words
<b>Prizes:</b>	1st prize: K300.00      2nd prize: K100.00      3rd prize: K50.00
<b>Category 2:</b>	Level 1 ALL STUDENTS IN GRADE 5 & 6 Level 2 ALL STUDENTS IN GRADE 7 & 8
<b>Essay Topic:</b>	"What is Independence and what it means to me?"
<b>Length of Essay:</b>	500 words minimum
<b>Prizes:</b>	1st prize: K500.00      2nd prize: K250.00      3rd prize: K125.00 awards to each level
<b>Category 3:</b>	Level 1 ALL STUDENTS IN GRADE 9 & 10 Level 2 ALL STUDENTS IN GRADE 11 & 12
<b>Essay Topic:</b>	"How would you see PNG's Growth in the next ten (10) years?"
<b>Essay Length:</b>	1000 words minimum
<b>Prizes:</b>	1st prize: K1000.00      2nd prize: K500.00      3rd prize: K250.00 awards to each level

Send entries with full contact details including the name of your school and current grade to:  
National Events Secretariat  
Moreuta Haus, P.O. Box 639, WAIGANI, NCD.

Entry into the competition will be deemed as acceptance of the terms and conditions. The Judges' decision will be final.  
All entries to be received by 25th August, 2000 no later than 4.00pm on the date.

Winners will be notified by the National Events Secretariat.



# Lae Nius

## Lae plis holim raskol bilong Kavieng

FRANCO NEBAS i raitim

PLIS long Lae long las wik i holim pasim wanpela saspek husat em wanpela bilong ol lain i bin kilim wanpela plisman long Maliata lodge long Kavieng las mun.

Plis bosman long Lae Mista Awan Sete i tok dispela saspek em plis i bin holim long Tent Siti blok bihain long ripot i go long ol plis. Ol plis i bin wokim wok painimaut long Kavieng bihain long kisim war- raat na arestim em.

Mista Sete i tok nem bilong dispela saspek em Peter Rus bilong ples Musau long Kavieng. Rus i bin kalap long sip MV Mingingulai na ronawe i go long Lae.

Mista Sete i tok em i gat arapela sas we ol plis long Rabaul i laikim em tu long wokim wanpela stil pasin taim em ronawe i go long Kavieng. Rus nau i stap long Lae plis sel wetim ol plis long Kavieng bai kam kisim em i go long sanap long kot.

Sete i tok tupela plisman long Kavieng long dispela wik bai flai i go long kisim dispela saspek i go long sanap long kot.

Long wankain taim yet ol plis long Lae i wok long painim wanpela yangpela meri krismas bilong em 17 husat ol raskol i bin holim pasim em na ronawe wantaim em i go.

Lae plis sief Mista Sete i tok dispela hevi i bin kamap long Sande long 2 i go long 3 kilok moning we sampela yut i kam wantaim gan na holim pasim meri ya long haus bilong em long Peter Blok long Kamkumung.

Ol plis i bilip olsem dispela lain i kisim dispela meri i go bihain long banana fam bilong memba bilong Lae Bart Philemon na namel long Busu na Butimam ples.

Mista Sete i singaut i go long ol komyuniti husat i stap long dispela ol eria long toksave long plis sapos ol i bungim dispela ol lain wantaim meri.

Plis wantaim ol lain bilong meri i wok long mekim wok painimaut yet long

painim dispela ol lain wantaim meri. Nem bilong dispela meri em Gali Hagai bilong ples Patep long Mumeng eria.

Plis tu long dispela taim i painim wanpela bodi bilong wanpela man long las wik Tunde long drai wara long Wes Taraka. Mista Sete i tok ol plis i bin painim dispela bodi bihain long ol i ronim wanpela stil ka we ol raskol i stilim long wanpela tisa long Yunitek.

Ol i stilim dispela ka long Taraka Bakeri taim dispela tisa i laik baim sampela kaikai long stua ya.

Ol i kalap long ka na long sem taim ol plis patrol ka we i no gat soim bilong plis i kam bungim ol. Ol raskol ya i paia long plis na ron i go olsem long Wes Taraka we ol i stopim ka long drai wara na ronawe long lek.

Ol plis i holim pasim draiva tasol arapela ol i ronawe. Long dispela taim yet tu ol i painim dispela bodi we em i sting i stap long dispela hap. Plis i wok long bungim ripot yet long dispela bodi.

## Rausim diwai kros long palamen: Napo

MEMBA bilong Bulolo Samson Napo i muv mosen long rausim wanpela diwai kros we i save sanap hap long het bilong haus palamen long Mosbi. Na dispela mosen i kisim sapot bilong planti memba bilong palamen we palamen i mekim disisen long rausim diwai kros ya.

Pastaim long dispela toktok bilong diwai kros ya i bin kamap long haus palamen, Spika bilong palamen Bernard Narokobi i tok dispela i bin disisen bilong em long sanapim dispela diwai kros long het bilong haus palamen.

Tasol aste palamen i luksave olsem ol memba long palamen i gat pawa long pasim disisen na mekim kain samting olsem. Olsem na ol i muv long rausim dispela diwai kros.

Opis bilong Spika i no tokaut yet long wanem taim ol bai mekim dispela wok bilong rausim diwai kros ya i kam daun.

Dispela diwai kros tu i bin kirapim planti toktok i kam long pablik long sampela taim inap ol i lukim toksave bilong Spika. Na dispela i stapim ol kain toktok na tingting we wanwan pablik i gat long lukim diwai kros antap long het bilong palamen.

## Baing laik lukim PNG na Esia i join wantaim long turis bisnis

YAKAM KELO i raitim

TURIS em bikpela bisnis tru long ol bikpela ovasis kantri na inap pulim moa mani bilong ronim PNG tu, Minista bilong Kalsa na Turis Andrew Baing i tok.

Mista Baing i mekim dispela toktok taim em i kam bek long bikpela bung bilong ol turis Minista long Seoul, Saut Korea long las wik.

Dispela bung i lukluk long kamapim wok bung wantaim long kirapim turis bisnis insait long Esia Pasifik rijon.

Insait long dispela bung, ol turis Minista i sainim wanpela bung wantaim pepa bilong strongim na kirapim turis industri insait long Esia Pasifik rijon.

Mista Baing i tok opis bilong em i amamas long lukim PNG Travellers Association i bung wantaim ol aso-

sisen bilong Esia kantri long stretim gut wok ol wok bilong turis i go i kam long tupela kantri wantaim.

Mista Baing i tok sapos PNG na Esia Travellers Association i bung wantaim ol inap serim planti bikpela samting olsem save na wok bilong kirapim na strongim turis bisnis long Esia Pasifik rijon.

Minista Baing i tok long arapela kantri turis industri i olsem namba tu na namba tri bisnis we i save pulim bikpela mani i kam long kantri. Olsem na long, mipela i gat olgeta gupela samting long mekim na kirapim turis i kamap olsem namba wan o namba tu bisnis strong bilong kamapim mani insait long kantri na wanwan manmeri.

Insait long dispela bung bilong ol turis Minista Minista Baing i bin soim sampela piksa na mekim ol toktok long wanem samting PNG i gat long kirapim wok bilong turis insait long kantri.



### Mipela laikim samting olsem...

SIL wokman na meri pikinini bilong em wantaim ol manmeri long ples i sindaun na harim toktok bilong ol bikman long opening bilong Sangkwep bris long Boana distrik. Foto: FRANCO NEBAS.

## Famili bilong Pama Anio i tok tenkyu long ol lain help

OL famili bilong namba wan Morobe Primia Pama Anio i mekim bikpela tok amamas i go long olgeta lain husat i bin mekim bikpela wok long lukautim bodi leit Pama Anio i go inap bodi i go daun long graun long las wik.

Famili memba John Peka i tok ol i amamas tru na i laik mekim bikpela tok tenkyu i go long planti lain long provinsal gavman level i go daun long Difens Fos, sios na wanwan wokmanmeri na ol wanwan famili memba tu wantaim.

Peka i tok bikpela tok tenkyu na amamas bilong ol i go long Morobe provinsal gavman na Morobe edministren long salim bodi bilong Pama Anio i go long Mosbi long Finerol Hom na i go bek long Lae, MV Geamsao long karim bodi i go long ples long planim, Luteran Sios long go pas long lotu program, Kenel Joseph Fabila na PNG Difens Fos

long Igam Bareks long 21 gan salut, Lae Samba ov Komes, Tolec Electronics, Steven Trading, Niugini Oil, wanwan famili, Bami Sorengkene na James Kabi.

Peka i tok olgeta lain i mekim wanwan wok we i bungim kamap long gupela ron bilong lukautim bodi bilong leit Pama Anio i go inap ol i planim em long ples bilong em las wik.

Peka i tok i gat planti arapela lain moa long Lae Siti na Morobe provins em i no inap tingim nem tasol bikpela tok tenkyu bilong famili i go long yupela tu.

Em i tok long sait bilong soka, ol i lusim wanpela bikpela lida bilong kirapim soka na go pas long lukim soka i ron gut insait long provins na kantri. Em i wanpela gupela soka edministreta bilong provins, Peka i tok.

**PHONE:** (675) 472-3912      **FAX:** (675) 472-3919

**IMPACT SIGNAGE PNG**

- COREFLUTE SIGNS
- METAL SIGNS
- BUMPER STICKERS
- T-SHIRTS
- STUBBY COOLERS
- BILLBOARDS
- BUNTINGS
- POINT OF SALE

**FOR ALL YOUR PRINTING NEEDS**

P.O. Box 9705, Lae, M.P. 411, Papua New Guinea - Email: Impact@global.net.pg

## Popondetta tok gutbai long famili bilong Venables



• Pater Cameron Venables wantaim famili bilong em, Kate i holim Emily na Gabrielle wantaim papa. Foto: HELEN REI.

POPONDETTA Angliken daiosis i no long taim i go pinis, i bin tok gutbai long Pater Cameron Venables na foapela memba bilong famili bilong em. Pater Venables i bin wok long daiosis long las foapela yia.

Pater Cameron i gat 35 krismas, na em i kam long kantri Inglen. Em i bin mekim planti wok insait long yut ministri bilong daiosis insait long las foapela yia. Ol famili bilong em i bin kam joinim em long las tupela na hap yia.

Em i bin kam long PNG long 1986 na insait long las foapela yia, em i bin wok wantaim ol yut insait long komyniti developmen.

Em i bin kamap pater long 1991. Ol Angliken Franciscans long Inglen i bin stretim rot bilong em long kam long PNG. Wantaim save bilong musik na drama, em i laik helpim wantaim yut ministri long PNG.

Long Februari 1996, Bisop bilong Popondetta daiosis i bin askim em wok wantaim ol yut we em i bin mekim long tupela yia. Long 1998, em go bek long Brisben na maritim long Australia. Nau ol i gat tupela pikinini bilong em, Gabrielle husat i gat faipela long 1998, na Emily husat i gat 18 mun. Em i kam long PNG long 1998, na em i kam long Popondetta jenerel haus long 1999.

Insait long tupela yia em i statim wok, Pater Venables i givim wanpela wok long wan wan peris insait long Oro provins. Long olgeta 6-pela mun, em i bungim ol yut na skulim ol long pasin bilong mekim gut wok.

Em i tok yut ministri em i moa long mekim musik long wanpela Sande. Visen bilong em em i moa bikpela. Wok bilong yut em long helpim ol pipel long gro na skulim ol pipel long prea long tokples bilong ol yet bikos em i kam long lewa bilong ol stret.

Sampela ol wok bilong yut ministri em bilong painim aut ol lida na helpim

ol pipel long beten insait long grup we i helpim long developim bilip bilong ol.

Pater Venables i tok ol i no save toktok long topik bilong seks tasol em i presen God i givim.

Em i bin helpim yut ministri long luksave long ol sevis komyniti i laikim na i no sindaun nating na wetim ol arapela lain long kam helpim ol.

Pater Venables em i wanpela ki man husat i bin go pas long karim aut awenes kempen long hevi bilong HIV/AIDS insait long daiosis we ol i no bin mekim bipo. Kaikai bilong wok bilong em i lukim 2000 pipel i kisim dispela skul long ol yia i go pinis.

Wantaim save bilong anthropoloji, Pater Venables i save laik wokim ol drama we em i bilip i ken skulim gut ol pipel long wanem skul em i laik telemautim.

"Long pasin kalsa, em i hat long toktok long seks na HIV/AIDS, tasol, dispela disis i wok long kisim laip bilong ol pipel na pasin bilong yusim drama i gat bikpela pawa long ol pipel," Pater Venables i tok.

Em i ogenaism tu ol woksop long pasin bilong yusim na i no yusim gut ol drugs olsem bia bilong ples. Em i bungim ol yut bilong 17 peris long Julai 1998 na skulim ol wantaim helpim bilong ol Nesenel Narcotics Bureau.

Em i helpim ol yut long kisim skul bilong bukkiping na akaunting bai ol i ken menesim mani bilong wan wan peris bilong ol.

"Tingting em long givim ol pipel save long lukluk long 1999, ol Angliken i gat wanem kain bilip long yia 2000 na long taim Jisas bai i kam bek," Pater Venables i tok.

Em i lainim planti samting long em yet i wanem kain man na as bilong yut ministri. Em i lain long lus tingting long kalsa na kala.

## Ol Katolik bisop tingim bagarap bilong tsunami

### WENCESLAUS MAGUN i raitim

OL Katolik bisop bilong Papua Niugini na Solomon Ailans i tingim bikpela haiwara bilong solwara we i bin kilim moa long 2000 pipel long Aitape long Julai 17, 1997 wantaim bikpela sori long dispela aniveseri.

Jenerel Seketeri bilong CBC, Lawrence Stephens i tok Katolik Sios bilong PNG na SI i tingim dispela de Julai 17 wantaim bikpela sori na tu i salim bikpela tok tenkyu i go long olgeta pipel

bilong PNG na ol arapela kantri long helpim ol pipel husat i bin bungim dispela bikpela birua.

Mista Stephens i tok pasin ol pipel long PNG na long arapela kantri i mekim long helpim ol pipel bilong Aitape, i bin gutpela tru.

Em i tok Katolik Sios i go het long tingim ol famili bilong ol lain i bin bungim dispela bikpela birua long santu misa na prea.

Em i tok Sios i tenkim tu Aitape Daiosis long wok ol i bin mekim long lukautim ol mani, kaikai, klos, meteriels bilong wokim ol

nupela skul, haus sik, na ol wokmanmeri husat i bin karim aut wok bilong stretim bek sindaun bilong ol pipel long ol ples sunami i bin bagarapim.

Mista Stephens i tok Aitape Daiosis i soim piksa long ol arapela ogenaimesen long pasin bilong mekim gutpela wok na lukautim ol pablik mani na ol arapela samting bilong helpim ol pipel.

Em i tok kaikai bilong gutpela wok bilong Aitape Daiosis i kamap ples klia long olgeta wok ol i mekim pinis na ol pipel bilong Aitape nau i amamas.

## Tripela gol bilong yut ministri

### HELEN REI i raitim

I GAT tripela gol bilong kirapim yut ministri, Pater Venables i tok.

Dispela tripela gol em long: • Opim visen; • Yusim wanem kain pawa man i gat na i no wet long gavman long kam helpim; na • Lidasip.

Long kisim ples bilong Pater Venables, daiosis i makim Steven Raurel olsem nupela yut kodineta.

Insait long taim Pater Venables i stap long PNG, em i holim tu ol arapela posisen olsem seketeri bilong daiosis na peris pater bilong Resurrection Peris.

Em i wok tu wantaim Aiporongo daiosis insait long ol lidasip trening.

"Insait long las 12 yia, i bin gat bikpela senis i kamap. 'Ol samting i bin go baksait long helt na edukesen,' em i tok.

"Wanpela bikpela samting, em long mekim wanem samting yu inap long mekim long olgeta de bikos yu no save amas taim yu bai i stap laip.

"Yu ken gat gutpela laip taim yu nogat planti ol samting. Oro em i wanpela gutpela ples, tasol i nogat gutpela helt sevis, mipela i mas pait long kisim gutpela helt sevis, tasol, Oro olsem bai i stap hap bilong laip bilong mipela," Pater Venables i tok.

## Kate i no nupela long PNG

Ol papamama bilong meri bilong Pater Venables, Kate em Pater Patrick na Adele Doulin husat i wok long dispela taim long St Martin's peris long Boroko.

Ol tu i bin stap long PNG na wok longpela taim long dispela kantri. Kate i bin stap long PNG taim em i mangi yet na olsem taim em i kam bek long PNG, laip bilong em i luk olsem i stat gen.

Kate i tok long kam long Australia, em i bungim kain kain bikpela senis.

Em i tok, long Angliken Sios long PNG, ol i save kolim ol pater "Papa" na meri bilong ol pater ol i save kolim "Mama" olsem sain bilong rispekt, we em i no inap long ekseptim inap bihain long tupela yia.

Em i tok bihain long em i karim Emily, tingting bilong em i senis olgeta.

Em i lain long kukim na kaikai ol lokol kaikai na i luksave long laipstail

bilong ol pipel bilong PNG.

Em i lain long serim ol samting wantaim ol lokol meri na skulim ol long pasin bilong lukautim bodi bilong ol we i brukim planti rot i pasim em wantaim ol lokol meri.

Kate i tok ol pikinini meri bilong em ol i go pas long brukim ol wol i banisim em wantaim ol lokol pipel.

"Samting bilong dispela graun em i no olgeta samting," em i tok.

Em i wok olsem wanpela rilijes edukesen edvaisa na raitim wanpela buk long besik skul bilong rilijes edukesen.

Em i helpim long karim aut ol liklik woksop, tasol em i no inap go het long wanem em i gat wok long lukautim famili bilong em.

Em i tok em bai kisim ol planti yia bipo ol i kam bek long PNG. Em i tok ol bai tingim bek ol gutpela laip ol i bin stap long en wantaim ol samting i no hat tumas.

## Extended

### Pablik Notis - Tracer Study

PNG - German Government Co-operation na Katolik SIOS i laik save **sapos yu bin kisim trening long vokesinel skul** long PNG

**Yu ken "winim K100" sapos yu kam long mipela.**

Mipela i laik save long wanem kain wok yu bin mekim long bihain yu bin kisim save long VTC.

Yu ken kisim fri tiket sapos yu kam givim tingting bilong wanem wok yu bin mekim bihain long yu skul long VTC.

Yu ken kam painim mipela long givim tingting bilong yu long dispela ples: *Badili Technical Vocational Centre, Port Moresby* (at the end of Pascall Avenue road leading in from Ela Motors.) Phone gtz: 3200522

I deit:


**Tunde 25/07 i go inap Fraide 28/07 Taim: 9.00am i go inap 4.00pm**

Mipela makim laki dro em German donor GTZ i sponsorim tupela ten manmeri i ken winim K100. Lukluk long niuspepa sapos yu win.

**Marianne Woeller**

Palamen nius wantaim WENCESLAUS MAGUN

## Pundari sapatim Mekere long kamapim gan lo



• John Pundari.

MINISTA bilong Lens, memba bilong Kompam Ambun, na lida bilong Edvens PNG Pati, John Pundari, i sapatim tru toktok bilong Praim Minista long kamapim ol strongpela lo long ol sotgan.

Mista Pundari i tokim Palamen aste olsem gavman i mas kamapim sampela strongpela lo long daunim hevi bilong lo na oda we planti taim i save kamap long maus bilong sotgan.

Em i tok tenkyu long Sir Mekere long tokaut long dispela tingting long wiken long Madang.

Mista Pundari i tokaut tu long hevi bilong ol samting bilong pait we i save lus long CIS, Plis, na Difens Fos banis (amori).

Em i tok gavman i mas kamapim sampela strongpela lo long stapim ol lain i gat ol sotgan taim ol i nogat laisens.

## Peipul em Ekting Oposisen Lida

LIDA bilong Oposisen, Bill Skate i kisim hevi (heart attack) na nau i stap long Intensiv Kea Yunit (ICU) wod long Mosbi Jenerel Haus Sik, Ekting Oposisen Lida, Peter Peipul i tokim ol niusmanmeri long Palamen long Mande.

Mista Peipul i tok em bai i stap long haus sik long narapela tripela de moa bihainim edvais o toktok i kam long ol dokta.

Mista Peipul i tok ol arapela memba bilong Oposisen i no save olsem lida bilong ol i stap long haus sik tasol em i ting ripot bilong ol niusmanmeri bai toksave long ol.


Em i tok tu olsem as bilong dispela hevi o 'heart attack' Mista Skate i kisim em long wari long ol plis i bin holim em na putim em long Boroko haus kalabus.

Mista Peipul i tok hevi bilong Mista Skate em i stap long han bilong Kot na em i no lukim wanpela as long ol plis i go arestim em.

"Watpo plis i ronim em. Mipela i no amamas long plis i ronim em. Larim Kot i mekim wok bilong em. Sapos lida i grisim witnes, em samting bilong Kot long glasim na tokaut. Lida i no inap ronowe," Mista Peipul i tok.

Ol arapela komyuniti lida olsem Cathy Tani, Presiden bilong Nesenel Kaunsel Ov Women long NCD, Jacob Numapo, na Michael Badui wanpela papa bilong Maiba Holdings, tu i bin kam strongim toktok bilong Mista Peipul na askim Praim Minista na Plis Komisina long glasim dispela hevi na stretim.

## Ol lida noken mekim ol politikel rot na bris



### • Minista bilong Woks na memba bilong Finsafen, Alfred Pogo.

MINISTA bilong Woks, na memba bilong Finsafen, Alfred Pogo i tokim Palamen aste olsem planti ol rot na bris long kantri i wok long bagarap long wanem ol lida i bin mekim bilong strongim ol yet insait long wok politikis tasol.

Em i tok ol dispela politikel rot na bris i no stap insait long plen bilong Nesenel Gavman na olsem taim ol dispela rot na bris i bagarap i nogat mani bilong stretim ol.

"Yumi wokim ol politikel rot we i no bihainim ol plen. Yumi bin hait

na mekim ol samting. Nogat ol gutpela plen," Mista Pogo i tok.

Em i sutim tok tu i go long ol bikipela kampani husat i wok long katim timba long sampela provins.

"Yumi gat ol loging kampani husat i katim ol diwai long sampela hap bilong kantri. Olsem Vanimo Timbers. Em i wok 15 yia olsem insait long TRP eria bilong Sandaun provins, tasol em i no mekim wanpela samting. Ol rot i bagarap tru," Mista Pogo i tok.

Em i tok: "Yumi mas stretim bek ol agrimen yumi mekim wantaim ol loging na maining kampani. Pasim ol i go daun long ol projek. Nogut taim ol risos i pinis, yumi bai i no inap kisim wanpela samting bek."

Mista Pogo i tok olgeta ol lain i gat interes long ol risos projek i mas bungim het wantaim na mekim plen. Em i tok ol papagraun na provinsel na nesenel gavman i mas lukim ol bikipela kampani i wok bung wantaim ol long kirapim ol projek long wanem ol eria ol i wok long en olsem bai ol pipel i ken kisim ol sevis gavman i no inap long givim.

Mista Pogo i tok tu olsem em i gat tingting long kamapim bek ol olupela Woks kem long ol provins we i nogat ol gutpela praivet konstraksen kampani. Bai Woks dipatmen i ken stretim ol rot na bris na helpim ol pipel long ples.

# LAND CRUISER REMEMBARENS DE

SPESOL  
BILONG DISPELA DE

TOYOTA LAND CRUISER 79 SERIES BIKPELA OFA LONG KISIM OL SAMTIN\*

## KISIM KA WANTAIM OL DISPELA SAMTIN :-

- BUL BA WANTAIM OL SPOT LAIT • WAIA LONG WINSKRIN • DAK GLAS • AM/FM REDIO KASET
- PIK - AP BA • WANTAIN SPESOL REMEMBARENS DE STICKER LONG PUTIM LONG KA.



\*LONG KISIM OL DISPELA SAMTIN YU MAS PUTIM ODA O BAIM KA NAMEL LONG 16th - 23rd JULAI, 2000.

Ela Motors

TOYOTA

OFA BILONG  
NAU NA GO  
INAP 23rd  
JULAI, 2000.

LONG KISIM MO TOK SAVE RINIM MIPELA :-

PORT MORESBY 3229400 • LAE 4722322 • KOKOPO 9829100 • RABAU 9821988 • MADANG 8522188 • GOROKA 7321844  
MT HAGEN 5421888 • WEWAK 8562255 • KAVIENG 9842788 • KIMBE 9835155 • TABUBIL 5489060 • VANIMO 8571254  
PORGERA 5479367 • KUTUBU 5496685 • BUKA 9739017 • LIHIR 9864099 • ALOTAU 6410100

LUK LUK LONG WEBSITE BILONG MIPELA - <http://www.elamotors.com.pg>

"NAMBAWAN KWALITI"

# Ol Simbu kopi groas tok lukaut long gavman

**YAMES KAY i raitim**

MOA long 1,000 kopi groas na ol komyuniti iida insait long Simbu provins i bin givim strongpela tok lukaut tru i go long Gavman long noken tru traime go insait long wok bilong kopi industri long kantri na traime senisim lo.

Ol pipel i bin bung long Migende maket long Sarere long wanpela miting long kisim tingting bilong ol manmeri long noken tru sapatim tingting bilong Gavman long senisim lo insait long Kopi Industri Koporesin long PNG.

Ol pipel i singaut tu long memba bilong Simbu provins long palamen i sapatim ol na askim Gavman long noken tru senisim dispela to we stap pinis long Kopi Industri Koporesin (CIC). Ol tok strong tu olsem sapos ol memba bilong ol long palamen i no sapatim ol, ol dispela memba bai no inap go bek gen long palamen long 2002 ileksin.

Ol pipel i tu olsem Gavman i mas larim CIC i stap em yet olsem independen i kampani. Noken larim Gavman senisim lo na bringim politik na paul pasin i go insait long wok bilong em.

Ol i tok nau yet CIC i gat ol memba bilong bod em ol kopi groas insait long olgeta sekta bilong industri em

smolholda, blokholda, plantasin na ekspota prosesa i makim. Dispela em i gutpela.

Sapos Gavman i go insait kainkain paul pasin olsem dispela hevi i kamap long NPF, POSF, Kopra Marketing Bod bai kamap.

CIC em namba wan kampani tru isnait long agrikalsa sekta long praivetais o koporetais. Em i go aps na ron gut tru long wanem samting Gavman long tude i laikim. Dispela em praivetaisisin. Ol narapela koporet bdi bihainim gutpela piksa o eksampel CIC mekim na bihainim.

Sampela komyuniti lida olsem Kerenga i bin givim ol strongpela tok tok tru insait long dispela miting bilong ol long Migende.

Plantil ol pipel i tok olsem ol i no save lukim han mak bilong Gavman long eria bilong ol. Kopi tasol i save stap na bringim mani na helpim i go long ol. Olsem na Gavman i pas noken tru traime pilai politik na senisim lo we nau i lukautim Kopi Industri Koporesin long PNG.

Sapos politik i go insait long wok bilong kopi, wan kain hevi em ol narapela agrikalsa krop olsem kopra and kakao i bungim bai kamap.

Tasol ol pipel i tok olsem kopi em i bun tru bilong ol, na ol i no laik tru Gavman bagarapim.



## Stretim rot hariap ...

• Konstraksen wok bilong Porgera maining i wok long go het yet long stretim ol rot na bris insait long Enga provins. Foto: TIMOTHY AIMS.

## Givim sapat long wok agrikalsa

RIJINOL memba na Gavana bilong Niu Ailan Provinsel Gavman, Paul Tohian i singaut i go long gavman long putim moa taim na mani long strongim wok didiman insait long kantri.

Mista Tohian i tokim Palamen olsem em i save sem long harim planti kantri i save tok PNG em i wanpela 'ris' kantri. Long wanem PNG i gat planti gol, kopa, wel, timba, pis, na ol arapela risoses tasol PNG em i wanpela 'pua' kantri long wol.

Em i tok PNG i wok long baim

planti kaikai na samting long ol arapela kantri na i no salim planti samting.

Moa yet, Mista Tohian i tok Agrikalsa em wanpela eria we gavman i no givim bikpela luksave long en.

"Yumi mas strongim wok didiman long ples," Mista Tohian i tok.

Em i tok ekonomi bilong PNG i nogat strongpela as. Mista Tohian i tok PNG i wok long kisim bikpela strong long ol risoses olsem gol, kopa, wel na ol ara-

pela minerel we ol bikpela mining kampani bilong arapela kantri i ronim.

Tasol em i tok taim olgeta kopa, gol, nikel, kobalt, wel, na ol arapela minerel long graun i pinis, PNG bai i nogat arapela rot bilong kisim mani sapos gavman i no mekim wanpela samting nau long strongim wok didiman.

Mista Tohian i tok tu olsem PNG i nogat gutpela infrastraksa olsem rot, bris, ples balus na wof bilong lukim wok agrikalsa i kamap.

# RAMU SUGAR



*The Sweetest Thing*

## Lo bilong banisim ol atis na ol save lain i kamap

**WENCESLAUS MAGUN i raitim**

BIHAIN long klostu 25 yia bilong independens, Papua Niugini Gavman aninit long ministri bilong Jastis, na minista bilong Jastis, Kilroy Genia i presentim Copyright na Neighbouring Rights Bill 2000 na Patents na Industrial Designs Bill 2000 long Palamen long dispela wik bilong Palamen i tok oraitim.

Palamen i pasim dispela tupela bil bihain long namba tri rit long Tride, dispela wik.

Astingting bilong dispela tupela bil, Mista Genia i tok, em bilong lukautim raits bilong ol atis na ol save manmeri bilong Papua Niugini husat i save kamapim ol nupela samting.

Em i tok PNG gavman i no bin gat ol kain lo olsem na planti ol atis na ol lain i save wokim ol nupela samting i no inap long lukautim wok na save bilong ol long ol arapela lain i yusim na mekim mani na i no baim ol.

Mista Genia i tokaut long wanpela kain hevi olsem i bin kamap long 1994, taim sampela save lain bilong Amerika i bin kisim blut bilong wanpela man Hagahai long Madang provins na salim i go long Amerika long wanem ol i bilip blut bilong dispela man Hagahai i gutpela long stapim olsik bilong blut.

Mista Genia i tok taim dispela save meri i salim blut bilong man Hagahai i go long Amerika, em i kisim Patents raits we i banisim ol arapela save lain long yusim dispela blut sapos ol i no kisim tok orait long em.

Mista Genia i tok taim dispela samting i wok long kamap dispela save meri bilong Amerika i no baim kompensesen long dispela man Hagahai long yusim blut bilong em. Dispela i bin kamapim bikpela hevi long PNG Gavman, we ol i bin kirapim planti toktok wantaim Gavman bilong Amerika long dispela samting.

Mista Genia i tok Gavman bilong Amerika i luksave long dispela na i bin rausim dispela Patent raits bilong dispela save meri. Bihainim dispela, PNG Gavman i kirap na kamapim dispela ol bil long pasim long Palamen bai i kamap lo bilong kantri.

Copyright na Neighbouring Rights lo i karamapim rait bilong ol atis, kava, ol lain i save mekim klos, metel wok, poteri, skalpsa, terra cotta, mosaic, handicraft, tekstail, ol lain i save raitim ol buk, stori, poem na ol musik manmeri, husat i kamapim sampela wok na i no laikim ol arapela lain i yusim wok bilong ol sapos ol i no kisim tok orait long ol.

Patents na Industrial Designs lo i karamapim rait bilong ol lain i save wokim ol nupela samting olsem marasin, o masin, ka, balus, sip, kaikai, na ol arapela kain samting olsem.

Dispela lo bai banisim ol lain husat i no wokim ol dispela samting long yusim save bilong ol long mekim ol samting.

Mista Genia i tok dispela lo i givim tok orait long Gavman long tambuim ol dispela lain long noken wokim ol marasin o kaikai o ol arapela samting we inap bagarapim laip bilong ol pipel bilong PNG.



# Momase soka taitel oraitim ausait Momase tim long go

## YAKAM KELO i raitim

MOMASE Soka Federesen (MSA) i oraitim ol Momase pilaia long arapela senta long kamapim skwat bilong ol na kam pilai long Momase rijinol soka tonamen long Septemba dispela yia.

Tonamen dairekta John Peka i tok dispela bai wanpela sans tasol ol i givim long dispela yia long ol arapela provinsel senta olsem long Hailans, Mosbi, Rabaul na Kimbe na arapela moa long kamapim wanpela tim bilong ol man na meri long go pilai insait long dispela tonamen.

Bikos dispela bai bikpela tonamen tru long bungim wanpela bikpela de bilong Papua Niugini long amamasim 25 yia bilong independens, dispela em spesel singaut tasol long wanpela taim tasol dispela yia long ol arapela Momase pilaia i ken kam pilai wantaim ol, Peka i tok.

Em i tok ol pilaia bilong narapela senta i mas ol pikinini long Momase rijon tasol na i no ken ol arapela provins. "Ol pikinini Morobe, Madang na Sepik i ken fomim Momase tim na kam

## MOMASE KAP RIPOT

traim mipela ol asples Momase long mun Septemba."

Peka i singaut tu long ol soka asosiesen insait long Morobe provins long tok klia long em sapos ol bai i kik tu long dispela tonamen. Olsem na ol i mas toktok long em long Spot Opis long telefon 473 1727. Ol i ken go baim rejistresen fi bilong ol na go givim beng risit long em. Wankain tu long ol soka asosiesen long Madang na Wewak na Vanimo ol i ken baim fi bilong ol long beng na givim risit long ol eksekutiv bilong Momase Soka Federesen long Madang, Wewak na Vanimo.

Eksekutiv i no tokaut yet long wanem hap bai rijinol tonamen ya bai i stap tasol long bikpela bung bilong ol opisel long Madang long Julai 24, 2000 bai ol i toktok na stretim ples bilong holim tonamen long en.

Peka i tok dispela rijinol tonamen i bihainim lo na straksa bilong bikpela bodi Papua Niugini Futbol Asosiesen (PNGFA).

Ol i tingting tu long pilaim Somare Kap we biknem lida

bilong Papua Niugini Sir Michael Somare bai sponsorim.

Peka i tok ol bai wetim tasol toktok i kamap long opis bilong Sir Michael Somare long dispela soka tomane. "Sief yet i bin tokaut long dispela long 1998 Momase rijinol taitel long Wewak."

Long dispela taim tu Peka i tokaut olsem wanpela soka asosiesen long Oro provins, Ijivitari Soka Asosiesen i soim laik tru long kik insait long ol Momase na Morobe soka resis. Bikos ol i no save pilai gut insait long ol Sauten rijon soka resis we i no save kamap.

Peka i tok dispela i nogat wanpela samting i asua bikos Momase rijon o Morobe i laik save gat ol tonamen i kamap na ol bai amamas long sapatim Ijivitari soka asosiesen long kamapim dispela laik bilong ol long traim developim interes bilong soka insait long Oro provins.

Peka i tok Oro provins i join wantaim Morobe provins na i isi long ron long sip i kam long Morobe provins long pilai insait long ol soka tonamen we i save kamap.

# LFA i ron bihain yet long resis

LAE Futbol Asosiesen (LFA) i ron bihain tru long soka kalenda bilong em long dispela yia. Olsem na LFA i traim long kamapim ol plen we ol i ken pulim ol gem i kam antap liklik na stap klostu long kalenda bilong dispela yia.

Vais presiden teknikel John Peka i tokaut olsem long dispela wik Sarere long 12 kilok, olgeta klap presiden o ol klap opisel i mas kamap long LFA soka graun long bung na ol i ken toktok long stretim dispela hevi.

Peka i tok ol i gat tingting long sampela rot we ol i laik traim long kamapim bai i ken bringim gem i kam antap. Tasol ol klap eksekutiv na opisel i mas kamap long dispela Sarere bung long tokaut long sampela tingting we ol i ken bihainim long stretim dispela hevi.

Peka i tok LFA i ron bihain yet long kalenda bilong gem long dispela yia olsem na wanpela tingting nau em long dabolim ol gem long wiken. Ol tim i ken pilaim tupela gem long wiken.

Em i tok dispela em wanpela tingting tasol ol klap eksekutiv yet i mas kamap long Sarere miting na skelim dispela tingting pastaim.

Long dispela miting tu, ol arapela toktok tu bai ol i toktok long en. Wanpela bikpela

## LFA RIPOT

toktok em long rentim LFA klap haus.

Peka i tok bikpela lukluk em ol bai givim long ol klap insait long LFA yet long ronim. Olsem na ol i mas kamap long bung na toktok gut long dispela samting.

Ol klap husat i gat laik long ronim LFA klap haus i mas raitim pepa bilong ol na salim i go long LFA edministresen long lukim na skelim. Bikos ol i laik givim long ol LFA klap pastaim long ol ausait lain.

Narapela toktok bilong toktok long en tu long dispela Sarere miting em long stretim rejistresen bilong ol pilaia. Planti klap i no stretim pilaia rejistresen yet na ol i mas toktok long dispela. Nogat bai LFA i stat long saspenim ol klap husat i no baim yet ol pilaia rejistresen, Peka i tok.

Pilaia rejistresen bilong wanwan pilaia em, ol sinia K7.00 na ol junia K4.00.

Ol klap afiliesen fi em nogat hevi bikos olgeta klap i stretim pinis. Tasol hevi i stap yet long pilaia rejistresen, Peka i tok.

Peka i tok i gat planti wok na hevi i stap long stretim long sait bilong menesmen. Olsem na ol klap i mas kamap long stretim ol toktok na wok bilong ronim na lukautim LFA soka resis long dispela yia.

# Kitaka wimens volibal kompitisen soim gutpela stail long pilai

## FINSHAFEN VOLIBAL RIPOT

KITAKA Wimens volibal asosiesen insait long Kote eria long Heldsberg, Finshafen i statim pinis kompitisen bilong em.

I gat wanpela ten siks (16) i givim nem pinis long stap insait long dispela kompitisen. Kompetisen ya i gat A gret na B gret we i pulim ol tim i kam long bus na namba bilong Kote. Nem bilong ol tim ya em Mixmates, Wanza, Buza, Wantoks, Lelengo, H Beri, Ziox na Koreo.

Ol lain opisel bilong dispela asosiesen em kodineta Mista Francis, presiden Ota Bayokio, sekreteri Mista Bob na tresera Mista Grace. Ali, man husat we givim

taim bilong em na stretim skoa shit, gretim points, kontrolim pilai na sentrel referi bilong ol em Mista Lamu Mike. Em i tok dispela olgeta klaps nau kamap long bikpela impruv tru long pilai na soim taim Mista Lamu i mekim Kitaka wimens skwat long bai i go insait long sampela volibal tonamen we bai kamap long dispela yia 2,000.

Mista Lamu tok em i bin selektim ol pilai bilong em pinis na sambai tasol long go aut long pilai long sampela hap long Finshafen.

Kitaka Wimens Volibal Skwat seleksen skwat ya em Christer Z., Limbeco O. Cathy M., Yambu K., Mista Ota. B, Lina Everlyne - Mista Pongu, Lowenga, Monika, Madelyne, Merrah,

Ana, Afrah, Julien, Y., Margret S., Grace A., Gimao K., Bafeke na Moncia.


Mista Lamu tok bai em stap wantaim Kitaka Volibal Asosiesen ken nek's yia 2,001 long strongim na bildim na lainim spots volibal long Kitaka.

Kitaka volibal spots e nau tasol long dispela yia 2,000 bihain long kamim volibal asosiesen.

Long lukluk bilong mi em Finsafen nau traim long putim kamap planti asosiesen bilong volibal long dispela yia 2,000.

Finsafen distrik nau i gat 3-pela sap asosiesen - Kitaka Katalolo na kam long Kamlawa volibal asosiesen nau em igat 5-pela yia bilong em nau long ronim.

# Madang redi long holim Momase sempionsip



• Stat long lep sait, Bill Warap (Madang Coca Cola brens menesa), Steven Kadam (Tonamen siaman) na wokman bilong COCA COLA wantaim ol lain bilong MAVA i soim ol tropi em i givim long dispela sempionsip.

## MOMASE VOLIBAL RIPOT

MADANG Amateur Volibal Asosiesen (MAVA) bai holim namba foa Momase Coca Cola Rijonel volibal sempionsip long dispela wiken.

Dispela sempionsip i kamap bikos long gutpela helpim bilong Coca Cola Amatil long Madang.

Ol pipel bilong Madang bai i gat gutpela sans long lukim dispela nambawan gem i kamap bikos planti ol intanesenel pilai insait long Momase bai brukim bun stret. Olgeta gems bai kamap long Laiwaden Ovel na tu Divine Word Yunivesiti pilai graun long YC Hal.

Lae, Huon Gulf, Kaiapit, Markham, Ramu, Madang, Madang District, Wewak, Wewak Distrik, Aitape na Vanimo i redi pinis long pilai

insait long dispela resis.

Mista Warap i tok klostu long K3,000 olgeta kampani i spendim long baim dispela ol tropies. Em i tok tu olsem kampani bai sapatim dispela Momase volibal resis inap long 5-pela yia olgeta.

Mista Warap i tok strong moa insait long bung olsem pasin bilong pait na nogat rispek long lo bilong gem i save givim planti kampani tu bel long sponsorim na long dispela planti kampani i no save sapatim ol spot groups. Kadam i tok i no isi long painim kain sponsa olsem Coca Cola bikos em na ol lain bilong MAVA i bin traim planti rot ru inap long 12-pela mun long raisim mani bilong displa tonamen.

Mekim maus bilong MAVA na ol pilai, Mista Kadam i tok bikpela tenkyu tru na

amamas i go long Mista Warap na kampani bilong em Coca Cola long sponsorim dispela bikpela resis.

Ol arapela lain insait long Momase i gat laik pilai i mas givim nem long Mista Kadam long telefon namba 852 1393/fax 852 1389 o presiden bilong MAVA presiden Willie Bagore long telefon 852 3142. Husat lain i no peim K100 fi i mas peim nau na akaun namba em 304 6235195 PNGBC Madang. Olgeta lain i mas kamap long Madang bipo long Julai 20 bikos long nait bai i gat miting bilong kamapim ol dros. Wanem senta i no gat haus slip i mas toksave hariap long em na Willie Bagore MAVA presiden. Noken tru kamap long las minit bikos yu yet bai painim ples bilong slip.







# Semi - Enuel Monitori Polisi Ripot i kam long Gavana bilong Beng ov Papua Niugini Mista L. Wilson Kamit

Gavana bilong Beng ov Papua Niugini Wilson Kamit long Julai 14, 2000 i tokaut long namba wan semi enuel monitori Polisi Stetmen we i karamapim narapela 6-pela mun bilong yia 200 bihainim Sentrel Beng Ekt 2000.

## SANAP BILONG SENTREL BENG

\* Long go het bilong ol pipel bilong Papua Niugini, sanap bilong Sentrel Beng em-  
a) long kamapim na kariamut monitori polisi, long traime kisim na holim prais i sanap strong, na  
b) long kamapim lo we fainens i ken bihainim na wanpela stretpela sistem long lukim olsem fainensel sistem long Papua Niugini i ron stret, na  
c) long kirapim gutpela nesanel na intanesenel sistem na  
d) long bihainim ol antap, long kirapim na sanapim strong macro-economic na groa bilong ekonomi insait long Papua Niugini.

Sentrel Beng Ekt 2000, Seksen 7.

## Ol Polisi Stetmen

\* Insait long wanpela mun taim Gavman i kamap na mekim wok bihainim dispela lo, na olgeta 6-pela mun bihainim mas givim polisi we i soim monitori polisi bilong Sentrel Beng long kamapim na holim gut prais i sanap strong long narapela 6-pela mun i kam.

Sentrel Beng Ekt 2000, Seksen 11, Sab-seksen 1.

## SEMI-ENUEL MONITORI POLISI STETMEN, JULAI 2000.

### TOK I GO PAS

Semi-enuel Monitori Polisi Stetmen em namba wan aninit long Sentrel Beng Ekt 2000 we i bin kamap na wok long Jun 16. Dispela na ol arapela stetmen bai i kam aut long olgeta 6-pela mun i bilong soim wok na samting nupela Sentrel Beng Ekt i mekim we i ples klia na i stret we i bihainim dispela lo. Dispela Polisi Stetmen i stap long 4-pela hap. Namba wan i tokaut long strong bilong prais olsem objekstiv bilong monitori polisi. Namba tu seksen i karamapim ekonomik developmen na projeksen bilong 2000. Seksen tri i soim lukluk bilong monitori polisi long narapela 6-pela mun na seksen foa i karamapim wok bilong monitori polisi.

### 1. SANAP BILONG MONITARI POLISI

Beng ov Papua Niugini i lukluk nau long wok bilong prais we i no wankain long olpela bod we ol i lukluk long sanap bilong monitori. Bikpela tingting bilong setim prais i sanap strong olsem bikpela lukluk bilong monitori polisi em bikos long wanem samting i bin kamap long ol ekonomi bilong ol liklik kantri na ol bikpela kantri olsem taim inflesen daun i helpim long kirapim gutpela wok bilong ekonomi na kirap bilong en long longpela taim i kam. Ol kantri i save bungim hai inflesen i save soim olsem ekonomi i no save wok gut. Insait long kos bilong hai inflesen em:

- Ol prodak na leba maket i no wok gut. Sapos prais bilong ol prodak o leba i go antap gut, long wokim disisen long saplai na dimand long ol gud, sevis, kapitol na leba bai i no inap wok gut long ekonomi na grot.
- Wok bilong skelim bai bungim hevi wantaim eria bilong sosel sait. Pawa bilong baim ol pei bai go daun taim pei tru i go daun. Skelim inkam bai go daun bikos long ol lain i save kisim liklik pe bai i gat liklik hap tasol long yusim mani bilong ol na seavings long ol lain i save kisim antap o namel pe.
- Ova ekspensen bilong fainensel sistem taim ol wanwan o bisnis lain putim ol risos bilong ol long abrusim wanem senis i kamap long inflesen long fainensel holdings bilong ol.
- Kamapim ol sans bilong hevi i kamap long fainens. Ol pablik na ol ovasis bisnis lain bai rausim mani bilong ol i go long ovasis wantaim bikpela inflesen long abusim bikpela fainensel lus. Dispela em ol i save kolim kapitol flait, i mekim fainensel sistem i isi long bruk, na
- Kos bilong ol bisnis long senisim ol prais gen na toktok long kamapim kontrak prais wantaim ol kastoma na saplala bikos level bilong prais i no sanap strong.

Long strongim prais insait long liklik open maket olsem PNG i mas gat, gutpela sanap bilong eksens reit. Taim kina eksens reit i pundaun tumas i ken kamap long ol arapela samting insait long kantri yet. Bikpela tru em long piskal imbalans na moa praivet sekta kredit, na long ol arapela samting long ausait olsem developmen long intanesenel maket o ol bagarap olsem drai taim, ais, bikpela ren na arapela bagarap moa.

Rait monitori polisi long taim karensi i pundaun na inflesen i go antap em long taitim ol wok bilong mani. Dispela em long mekim ol lain long kantri yet i ken putim mani na bisnis bilong ol long ol bisnis we kina i stap strong long en. Dispela bai daunim domestik konsamsen na impot dimand. Liklik sait hevi, tasol tasol inap daunim impots na ol hevi we inap daunim eksens reit, em long invesmen i pundaun long kantri. Taim konsamsen na invesmen i go daun bai kamapim hevi tu long ol wok bilong praivet sekta na groa bilong ol.

Long stretim dispela hevi bilong tait monitori polisi, em i gutpela long gutupela fiskel polisi i mas

kamap. Moa dinau gavman i save kisim long Sentrel Beng olgeta taim long kamapim baset bilong em i save kamapim hevi long strong bilong mani. Kisim mani stret long Sentrel Beng bai apim level bilong risev mani na beis bilong mani, we inap kamapim pundaun long eksens reit na inflesen bai i go antap.

## Bokis 1. STRAKSAREL RIFOM BILONG BENG OV PAPUA NIUGINI

### a) Bekgraun.

Long 1990 i kam ekonomi bilong Papua Niugini i bungim bikpela hevi bikos gavman i no ronim gut wok gavman na i no kontrolim gut wok bilong tromoi mani. Wantaim tu El-Nino (drai na ais) na hevi long fainens long Esia, i daunim wok na strong bilong ol praivet sekta na ol ovasis bisnis i kam long PNG. Dispela samting i daunim tru Gros Domestik Prodak (GDP) na gavman fiskel posisen long 1997 na i kamap 3.7 % long hap bilong yia1999. Gavman difist i bin kam long risos long Sentrel Beng we i bringim go antap level bilong domestik likwiditi na impots na net opisal intanesenel risevs wantaim ektenel veliu bilong kina i kam daun.

Taim i nogat gutpela sanap long ol eria bilong polisi, na ekspot volum wantaim prais tu i pundaun bikos long bikpela drai taim na bikpela diman long wol, wok bilong Beng long foren eksens maket i no kamap gut long sapotim pundaun bilong kina na planti hevi i kamap. Mak bilong inflesen long olgeta yia i go antap long 20% long pinis bilong yia 1998 na stat bilong yia 1999.

Long namba hap bilong 1999, gavman i traime long strongim difisit bilong 1999 i go long 2.5% bilokgn GDP na i daunim tru net kredit bilong gavman i kam long Sentrel Beng. Dispela tu i kamapim ekonomik na fainensel program bilong yia 2000 we i sut long sanapim gut strong na groa bilong macro-economic na ol ke straksarel rifom. Long Mas 2000 Intanesenel Monitori Fan (IMF) i strongim dispela program na oraitim askim US\$15 milien askim bilong PNG aninit long 14 muni sanap redi program. Long Jun 2000 Wol Beng i oraitim US\$90 milien straksarel adjasmen dinau we i karamapim kain kain rifom we i opim rot bilong moa senis long sapot bilong ol arapela helpim kantri.

b) Ol Rifom long objekstiv, pawa, independens na akauntebiliti bilong Beng ov Papua Niugini.

Ol developmen long 1990, gavman i bin feil long ekspensisa kontrol, bikpela dinau

bilong gavman long Sentrel Beng na planti senis tumas long ol Gavana i soim olsem i mas gat bikpela senis long pawa na independens bilong Beng ov Papua Niugini. Ol tingting i kam long gavman na Beng em olsem straksarel rifom long Sentrel Beng bai i gutpela long kamapim gutpela ekonomi long medium tem.

Beng ov Papua Niugini i bin sanap insait long wok bilong straksarel rifom em gavman i laik kamapim. Long mas 2000 em nupela Sentrel Beng Ekt (CBA) na long mun Epril em rivais Beng na Fainensel Institusen Ekt (BFIA) ibin kamap em Palamen i pasim we i givim moa independens long Beng, Beng i ken stretim gut ol wok na lukluk bilong em na kamapim gut ol lo na wok bilong supavaisim gut fainensel sistem bilong kantri.

Aninit long nupela Sentrel Beng Ekt bikpela senis i bin kamap namel long Beng na gavman long kisim dinau long sapotim baset difisit bilong gavman. Dispela em long traime holim strong prais i sanap gut na Beng i ken sanap strong long em yet.

Ol rifom em: kamap bilong prais stabiliti olsem monitori polisi objekstiv, na brukim ol dinau o debt menesmen long wok bilong monitori polisi, daunim Sentrel Beng kredit long gavman i go long opereting ovadraf mak long K100 milien na makim Gavna long wok 5 na 7-pela krismas.

Wantaim bikpela independens na strongpela pawa bai kamapim bikpela akauntebiliti na trenspersensi (wok stret na klia) i go long Palamen na pablik long wok bilong Sentrel Beng na Gavana.

- Sentrel Beng bai putim kamap semi-enuel monitori polisi stetmen, soim ol developmen, ol polisi na ol wok bilong en we inap kariamut gut wok bilong monitori polisi.
- Wok bilong Bod bilong Beng em long givim tok stia na glasim gen ol wok bilong Gavana bilong Beng.
- Antap long en em wok bilokng enuel odit we sampela taim bai Minista bilong Fainens na Treseri bai singaut long soim ekstenel menesmen o fainensel odit bilong Beng; na
- Wok bilong ol Deputi Gavana i ron stret, klia na open.

Long sloim daun gavman long tromoi moa o kisim moa dinau long benking sistem, krauding aut long ol praivet sekta i go daun na pablik bai i go het long gat gutpela luksave yet long menesmen bilong ekonomi. Long luksave long dispela, gavman istat long stapim pasin bilong kamapim gavman dinau long Sentrel Beng na i plen long bekim ol dinau long ol yia i kam.

## 2. OL EKONOMIK DEVELOPMEN LONG YIA 2000.

Long disainim monitor polisi bilong yia 2000. Sentrel Beng i makim ol sampela developmen long

I kam long pes 1

faipela eria, na wanem samting ol bai kamapim long ol eria bilong mani, prais na eksens reit:

- a) Intanesenel Developmen
- b) Domestik Ekonomik Ektiviti
- c) Hetlain na Andalaing Inflesen
- d) Balens ov Pemen na
- e) Fiskal Operesen bilong Gavman.

a) Intanesenel Ekonomik Developmen


Ekonomi insait long wol i bin groa strong long 6-pela mun bilong dispela yia na i sanap long taget long pusim ekonomi i groa long mak osem 4.6 % dispela yia bihain long em i op long 3.3 % las yia. Gutpela fainensel na monitori kondisen i as bilong dispela gutpela groa long ekonomik. Ol dispela kondisen i go strong isi isi we i soim long go daun bilong ikwiti prais na bikpela interes reit long ol sentrel beng. Inflesen long arapela kantri tu i go antap dispela yia bikos long go antap bilong oil prais na robas domestik diman long ol planti ekonomi. Inflesen long arapela kantri luk-luk long go antap long 3.1% dispela yia long 2.8% mak bilong 1999.

Ekonomik grot i bin go antap long ol bikpela industri ekonomi bihain long ekonomi long Japan i bin kamap gutpela na tu long Yurop. Planti sentrel beng i apim interes reit bilong ol long namba wa hap bilong dispela yia long holim inflesen presa i stap daun. Japan gavman i tokaut osem ol bai stapim ol strongpela polisi bilong mani ol i save bihainim long sampela taim bihain bikos long gutpela ekonomik wok na senis we i kamap long ol. Long US, GDP igo antap long 5.5% long pes kwata bilong dispela yia egensim 4.5% we i bin go antap long las kwata bilong 1999. Ekonomik grot reit i soim sain bilong go daun long seksen kwata, bikos long sek ritel spending na bikpela tred difisit. Inflesen presa i wok long go antap namba wan hap bilong dispela yia bikos long oil prais i go antap, tait leba maket na robas domestik dimand. US Konsuma Prais Indeks (CPI) i go antap long 0.1% long mun Me bihain long em i no bin senis long mun Epril. Prodaksen i go antap long ol OPEC kantri na slo daun long US ekonomi inap pasim sampela inflesen long go antap. Long Japan ekonomi i go orait nau. Beng ripot bilong Japan i soim bikpela diman long ol Japanis eksport. Ol wok bilong manufeksaring sekta i luk osem bai i go strong. Industriel prodaksen i go antap antap long 0.2% long mun Me bihain long Epril i bin 0.6%. Level bilong nogat wok i bin go daun we i soim osem ol kopret sekta i bin orait. Bihain long mak i bin stap long 4.9% long mun Februari na Mas, level bilong nogat wok i bin go daun long 4.6% long mun Me. Long Yuro Jon ekonomi, ol wok bilong ekonomi i wok long op wantaim GDP i lukluk long go antap long 3.4% long yia 2000. Ekonomi i bin groa bikos long sapot fainensel kondisen, sek karensi, moderesen long leba kos na ol bikpela senis long wok bilong ol kopret sekta. Inflesen presa i bin kamap bikos long prais bilong oil i go antap na sek long yuro karensi. Inflesen i lukluk long go antap long 1.8% dispela yia. Long Australia ekonomik i lukluk long groa i go long 3.75% long dispela yia 2000. Slo daun long grot i bin kamap bikos konsuma spending i bin go daun bikos long kamap bilong Guds na Sevis Takis na ol kos baim ol samting we i go daun bikos long Sidni Olimpiks.

b) Domestik Ekonomi Ektiviti

Ol ripot we i sut long ol wok bilong ekonomi we i stap long Beng ov Papua Niugini i soim osem GDP i bin groa ova long 2.0 long 1999 (lukim piksa 1) bihain long 1998. Dispela groa i bikos long wok i ron orait long ol maining na petroleum sekta.

Ektiviti long agrikalsa/forestri/fiseris sekta i bin go antap long 1999 bihain long 1998 bikos long bikpela prodaksen bilong sampela bikpela agrikalsa komoditis na bikpela diman long ol diwai taim hevi bilong fainens long Asia i bin orait bihain long 1998. Long maining na petroleum sekta grot i soim haia prodaksen bilong gol long Porgera, Lihir na Misima, kopa long Ok Tedi main na krud oil long Gobe Main na Saut Is Gobe oil fil.



Long 2000 GDP bai groa long 4.5% we minerel sekta GDP 1% na non minerel sekta GDP 5.6% i go antap. Non minerel sekta i go antap bikos long impruvmen long agrikalsa/forestri/fiseris sekta, na tu ol wok long manufeksaring, konstraksen na komes sekta. Ol wok long agrikalsa/forestri/fiseris sekta i bai i go antap bikos long bikpela agrikalsa prodaksen osem long kakao, kopi, kopra oil na oil pam bung wantaim bikpela timba prodaksen. Go antap bilong ol dispela em gutpela long ekonomi bilong PNG bikos ol dispela sekta i gat bikpela spin of eria we em i bikpela samting long mani i kamap long ol. Groa long agrikalsa/forestri/fiseris na maining sekta bai i gat gutpela sapot i kam long arapela non minerel sekta na tu manufeksaring, komes na trenspot.


Groa long konstraksen sekta bai i go antap long yia 2000 na dispela em bikos long kamap bilong Lae rot projek, ol hap wok long Ramu Nikel na PNG Kwinlen ges paipain projek, Rabaul Ristoresen program, go het bilong Madang Ramu rot na moa ol wok gavman i go pas long em aninit long developmen baset.

c) Hedlain na Andalaing Inflesen

Long Mas kwata 2000, hedlain inflesen, ol i bin makim long CPI, i go antap long 2.6% bihain long CPI i bin 19.6% long Desemba na ol yia i go bek long 1999. Long skelim 2.9% long Desemba kwata long 1999 na 13.2% long ol yia igo long Desemba 1999. (Tebol 1na piksa 2). Go antap bilong CPI i kamap bikos long:

- Impoted inflesen. Ol senis long eksens reit i bin bikpela as long long hedlain na andalaing inflesen. Long Mas 1999 i go long Mas 2000, Kina i bin pundaun egensim mani bilong US na Australia long 25%. Pundaun long strong bilong kina na hevi bilong em antap long impot prais i bin kamapim tru bikpela inflesen reit bikos long bikpela impot dipendensi long PNG.
- Domestik Inflesen: I gat tripela bikpela eria we i kamapim dispela. namba wan em nupela takis mesa we i bin kamap long 1999 Sapilmentri Baset we i sut long apim prais takis long fiul, bia, spirits na ol nupela ka na kamap bilong Vellu Eded Takis (VAT). Namba tu em prais bilong sampela prais kontrol samting tu i bin go antap osem petrol na tin mit. Namba tri em potnait pe bilong ol pablik sevans i bin go antap long 5% long 1999.

Ol lukluk bilong inflesen long tebol 1 na piksa 2 we i no bungim wantaim buai na ol senis bilong polisi bilong 1999 Sapilmentri Baset na VAT, i go antap moa long hetlain inflesen long 1999 na 2000. Prais igo antap long buai i no bin stap bikos ol i sut tasol long hetlain inflesen. Planti man-meri i tromol bikpela mani long baim buai long mak osem 2.7% skelim wantaim ol samting ol i mas baim bilong haus. Long Mas kwata bilong yia 2000, andalaing infleseni bin go antap long 2.4% na 16.3% i kam bihain long 2.7% long Desemba kwata na 15.3% long 1999 i kam long Desemba las yia.



Bikos long kamap gut bilong Kina long pinis bilong Desemba i go long Jun 2000, inflesen i lukluk long go daun long 2000 bikos long drop aut bilong polisi feka bilong 1999 (eksais takis na VAT) we i bin go antap long wanwan yia inflesen reit long 1999 na namba wan hap bilong yia 2000. Dispela gutpela senis inap stretim hai inflesen bilong 1999 na inap apim pablik sekta pot-nait pe. Em i bikpela samting long save osem bai i sampela taim inap long kina i go orait na daunim gut tru inflesen taim ol bisnis i traim long stretim gut ol gen long hevi ol i bungim long yia 1999. Long 2000 wan wan yia hedlain inflesen reit i lukluk long go daun long 12% bihain long 14.9% bilong 1999. Long ol yia i kam hetlain inflesen (Desemba kwata long Desemba kwata) i lukluk long sanap osem long 5.0% long yia 2000 bihain long 13.2% long 1999.

d) Balens ov Peimens

Balens ov peimen data bilog mun Mas kwata 2000 i soim difisit mak long K91 milien wantaim moa long akaun bilong K363 milien moa we daun long difisit bilong K420 milien long kapitol akaun na K34 milien long balens aitem. Dispela akaun seples i bin kamap long haia vellu bilong ol mekendais eksport osem minerel, forestri na ol marin prodak. We moa long ol i holim pundaun bilong agrikalsa eksport na haia impot. Difisit long kapitol akaun i kamap bikos gavman na ol minerol kampani i bekim ol bikpela dinaw we i bung i stap long ol ovasis akaun balens bilong ol minerol kampani na liklik dro daun long net foren aset bilong ol komesel beng.

Tebol 1: Measures of Consumer Prices (Percentage change)

	Quarterly		Year on Year	
	Dec-99	Mar-00	Dec-99	Mar-00
Headline CPI	2.9	2.6	13.2	19.6
Underlying CPI	2.7	2.4	15.3	16.3

Boks 2. MESAS OV INFLESEN

Skelim na luksave long ol senis long prais i kamap long skelim bilong macroeconomic kondisen na wok bilong monitori polisi we Beng i makim long kamapim na strongim prais i stap strong. CPI we National Statistics Opis i soim i skelim senis long kos bilogn baim ol samting bilong haus insait long ol taun na i soim osem dispela em piksa tru bilong ol senis long prais. Dispela i bin stapinsait long makim na soim hedlain inflesen long PNG na bikos em i orait long soim inflesen long longpela taim i kam, em i no gutpela long andalaing inflesen presa we i stap long ekonomi long sotpela taim. Dispela em bikos planti samting long CPI basket bilong ol guds na sevis i bungim hat taim long ol bikpela samting osem ol polisi disisen bilong gavman na ol hevi na bagarap we i save kamap long ol mun na yia.




I kam long pes 2

Bikpela hevi long prais muvmen i ken kamap long ol bagarap olsem drai, ren na arapela moa olsem prais woa, ol wokman i strak na stop long tred. Gavman polisi disisen i save givim hevilong prais long sait bilong revenu kain olsem fakis i go antap na VAT. Hevi long ol sisen i save givim hevi long prais muvmen we ol prodak i save kamap lasol long wanpela taim long yia olsem buai, fruts na ol kaikai o bikpela askim (diman) long wanpela samting long wanpela yia. Muvmen bilong prais long ol dispela kain samting i makim undalaing o ko rett ov inflesen.

Andalaing rett bilong inflesen i save makim inflesen presa long ekonomi long maket los kain olsem long ol senis long prais we i save sut long bikpela saplai na dimand insait long ekonomi. Olsem atoriti bilong was long prais i kamap gut na sanap strong, BPNG i mas luksave long wanem kain senis long prais bihainim ol kain hevi olsem bikpela ren, bikpela san we i bagarapim ol saplai na samting olsem. Dispela luksave i mas kamap long skelim gut olsem bilong monitori polisi na inflesen. Long mekim dispela bai monitori bai wok gut na luksave long wanem senis i kamap long inflesen bai em i ken ron long wei bilong em stret.

Chart 3. Balance of Payments (Kina million)



Mak bilong foren risev long pinis bilong mun Jun kwata 2000 em US\$255.1 (K671.1) milien, inap long 2.7 mun taim i nogat mani i kam long non mineral impot.

Balens ov pemen em bikpela smating long liklik open ekonomi olsem Papua Niugini long hevi em i gat long eksens reit na inflesen. Balens ov pemen bilong 2000 we i gat ekstra odinari fainens we i kam wantaim Straksarel Adjasmen Program (SAP) i sut long soim eksta K456 milien. Dispela ekstra i kamap long akaun nau we i stretim hevi bilong difisit long kapital akaun. Kamap gut bilong karent akaun em long bikpela non mineral eksport bikos long eksport i go antap. Bikos gavman i tu i bekim bek bikpela dinau na ol kampani long kantri yet i no kisim moa dinau, dispela i mekim ol wok bilong mani i stap gut i orait nau long akaun.

Ekstra helpim mani we i no bungim wantaim bilong IMF na SAP i lukluk long total mak olsem US\$180 (K474) milien long 2000. Dro daun wantaim US\$90 (K237) milien bilong Wol Beng US\$50 (K131) milien bilong Japan gavman na US\$40 (K106) milien bilong ol arapela helpim kantri. Balens ov pemen sapot long IMF long 2000 em US\$65.5 (K172) milien wantaim hsp mani i stap US\$49.5 (K130.3) milien bai dro daun long 2001. Olsem na opisel foren eksens risev bai sanap samting olsem K995 (US\$378) milien long dispela yia, inap long 5.9 mun bilong no mineral impot kava.

e) Fiskal operesen bilong gavman

Fiskal data bilong mun Me 2000 i soim olsem gavman i kamapim K37 milien baset seples. Total revenu na grens i makim 34% bilong mak bilong mani insait long baset taim total ekspendisa i soim 30% bilong baset long wanwan yia mak. Baset seples na net ripemen i go ausait em K54 milien we lusim total domestik fainens long K17 milien we i bin kamap long gutpela fainens bilong non benk fainens sistem na arapela domestik fainens moa long ofsetim net ripemen i go long beng sistem. Go antap bilong non benk fainens sistem i soim sels bilong treseri bil go long pablik long tep isiu we i daunim holdings bilong Sentrel Beng.

Fiskal plen bilong 2000 nesenel baset i go long palamen em long Novemba 2 1999 em bilong stretim na strongim ekonomi na benking sistem bilong bringim balens baset i kamap. Dispela plen i soim olsem olgeta wok bilong mani i go long ol bai kam long revenu na grens na i no mani i no ken kam long dinau insait long beng long hia yet. Antap long 2000 baset ekstra mani US\$200 (K526) milien i bin kam long SAP wantaim IMF/Wol Beng na ol pren kantri bilong PNG.

2000 hedlain baset difisit long K215 milien em 1.7% GDP, skelim wantaim rivais difisit K232 milien long 1999. 2000 hedlain Baset difisit i kamap long K100 milien long wanpela aria pemen long 1999, K101 milien long straksarel adjasmen pemen na modes K14 milien andalaing baset difisit. Em i bikpela samting long save olsem mani bilong difisit bai i kam long revenu, grens na Wol Beng straksarel adjasmen lon.

Long kamapim hedlain Baset difisit long K215 milien na andalaing baset long K14 milien, gaman na sanap stronglong holim strong rikarent ekspendisa long olgeta dipatmen. Interes long dinau wantaim Beng ov Papua Niugini tu bai i kam daun bikos long balens i stap long Mineral Resources Stabilisation Fund (MRSF) long 1999 na inap daunim ol dinau i kam daun moa long 2000. Ekstenel interes pemen bai i go antap we bikpela ekstenel fainens i stap long 2000 baset na pinis bilong gres period long sampela lon. Dvelopmen ekspendisa long baset bai i go antap

long 0.8% bilong GDP long 2000 we i sut long Australia eid i kam long PNG. Antap long dispela 2000 baset i gat mani i kam long Wol Beng bihainim straksarel adjasmen lon we bai i go long ol straksarel rifom bilong gavman. Ekstra odinari faines wantaim SAP bai i kamap olsem K526 milien taim komesel lon ripeimen bai inap stap olsem K44 milien.

3. MONITORI POLISI BILONG 2000

Table 2: Summary of Fiscal Operations of Government (Kina million)


	1995	1996	1997	1998	1999	2000 Budget	May-00 Prelim.
Total Revenue & Grants	1722	1898	2024	1991	2569	2867	977
Total Expenditure	1756	1860	2009	2129	2801	3082	939
Deficit/ Surplus	-34	37	15	-137	-232	-215	37
Percentage of GDP (%)	-0.6	0.5	0.2	-1.7	-2.5	-2.1	0.4
Financing (net)	34	-37	-15	138	232	215	-37
External	-44	10	-73	-116	178	343	-54
Domestic	78	-47	58	254	54	-128	17
Of which:							
BPNG	-185	-243	177	410	-35	-128	-346
Commercial Banks	266	325	-77	-350	9	0	161
Other Domestic Financing	-3	-129	-42	194	80	0	202

Source: Quarterly Economic Bulletin, Bank of PNG.

Sentrel Beng i sanap strong long strongim wok bilong em long taitim monitori polisi long 1999 long holim bek pundaun bilong kina na ol presa long eksens reit we inflesen i bin go antap long las yia. Dispela hevi i kamap bikos long eksens likwiditi long benking sistem we i opim fiskel polisi long 1998 na hap bilong 1999. Opisel reit i pundaun (Piksa 5) wantaim 182treseri fil reit i pun daun long 20.44% long Desemba 1999 i go long 16.28% long pinis bilong mun Jun 2000. Dispela i bin kamap long laikim bilong maket we i sekim monitori kondisen we eksens reit i bin kamap strong liklik long mun Desemba 1999 na 6-pela mun bilong 2000. Olsem na long dispela as, mak namel long leding na diposit reit i bin pundaun (Piksa 5)

Kredit i go long benking sisem na ol praivet sekta, opisel kampani na non monitori fainensel institusen i no bin senis long 1999 i kam. Tasol i bin go antap long 6-pela mun bilong yia 2000. Net domestik kredit i go long gavman i bin go antap long 11% (K110 milien) long 1999, na i go daun long 22% (K235.2 milien) long 6-pela mun bilong yia 2000.

Chart 4: Monetary Aggregates (Kina million)



Level bilong brod mani (M3) i bin go antap long 6% long 1998 na 199 (Piksa 4) bikos net foren aset i bilong benking sistem i bin go antap we i daunim total domestik kredit we benking sistem i bin surukim. Dispela i bin kamap bikos long US\$80 milien we i kam aninit long swap fasiiti namel long BPNG na Risev Beng ov Australia long Desemba 1999. Pundaun bilong domestik kredit tu i kamap bikos long net kredit i kam long praivet sekta, ol opisel kampani na non monitori fainensel institusen.


Insait long 5-pela mun bilong 2000 level bilong brod mani i bin pundaun long 5%. Dispela em bikos long pundaun long net foren aset bilong benking sistem na net domestik kredit. Pundaun long net foren aset bilong benking sistem i kamap bikos haia ovasis lon ripeimen bilong gavman. Punduanlong net domestik kredit i bikos long bikpela pundaun long net kredit bilong gavman. Dispela tu i daunim sait bilong net kredit i go long ol praivet sekta, opisal bisnis na non monitori fainensel institusen. Pundaun long net kredit bilong gavman i makim pundaun long Sentrel Beng holding bilong treseri bil bikos go antap bilong sels long pablik aninit long tep isiu. Long Jun na Julai net kredit bilong gavman i bin go daun taim gavman i rausim K76 milien long treseri bil we Beng ov Papua Niugini i holim.

Tait sanap bilong polisi we Sentrel Beng i bin holim long 6-pela mun bilong yia 2000 i kamap taim ol i yusim open maket instramen na Kes Risev Rikwaimen (CRR). I bin nogat sens long CRR na Minimum Likwid Aset Resio (MLAR), Sentrel Beng i salim bikpea treseri bill aninit long tep isiu long pablik. Dispela i taitim risev mani wantaim benking sistem na holim maket interes reit level i stap antap.

Wantaim tait mani polisi, US\$115 milien kredit bilong IMF na gutpela lukluk bilong ekonomi, Kina i bin ron gut egensim mani bilong ol arapela bikpela treding patna. Kina i bin go gut long 10% mak egensim US dola, 20% egensim Australia dola, 14% egensim Japanis yen na 16% egensim Yuro (lukim Piksa 6) long Desemba 1999 na Jun 2000. Eksens reit i ken hat tru olsem na beng i holim rait long go insait long taim nogut na ol senis nabaut insait long ol maket.

i kam long pes 3

Chart 5: Interest Rates: Lending, Deposit & Treasury Bill (Weighted Average)



b) Monitori Polisi Stens

Long holim na strongim prais. Sentrel Beng bai go het long sekim maket developmen na ol mein macroeconomic indiketas na mekim wanem kain senis em i laik mekim bihainim wanem senis i kamap log monitori polisi. Dispela i sut tu long ol eria bilong inflesen long bihain olsem; Muvmen bilong eksens reit.

- Mentenens insait long taim bilong gutpela interes reit
- Developmen long ol mani na sait bilong kredit.
- Karimaut gutpela Baset bilong yia 2000
- Dro daun long baset taim ol ausait helpim i kam.
- Pinisim dinau bilong gavman wantaim Beng.


Taim inflesen i bin tambolo long mak bilong 1999, em i stap antap yet long Mas kwata na dispela em long bikpela impot prais eksens reit muvmen long 1999 na 2000. I gat seken raun ol senis long prais long ol dispela eria olsem domestik wej kleims.

Sapos i nogat ol sampela kirap nogut o ol hevi nabaut Sentrel Beng i ting inflesen long dispela yia bai kamap gut bihainim ol samting kantri i kamapim na salim o eksport long maket. Long dispela, lukluk bilong maket bai kamap bikpela sans long daunim level bilong interes reit. Tasol beng i mas sekim na lukim tru olsem inflesen i wok long go daun o nogat bipo em i ken opim sampela rot long maket.

Sapos i nogat ol arapela hevi long yia 2000, dispela i givim gutpela sans bilong Sentrel Beng long go het long stretim monitori kondisen long daunim opisel intres reit. Dispela bai go daun yet taim inflesen i wok long go daun. Arapela developmen long kredit na mani inap sapotim prais long sanap strong.

Long ol yia i go, hedlain inflesen (Desemba kwata long Desemba kwata) bai pundaun

Chart 6: Kina exchange rate against US\$, Aus\$ and Import Weighted Index



long level 5.0% na everes yia hedlain inflesen long level olsem 12%.

- 9% open long kredit i go long praivet sekta, bihainim stret lukluk bilong grot long non mineral sekta.
- Net kredit bilong gavman long Sentrel Beng i pundaun long 60% na posisen bilong baset na foren fainensng i oraitim net ripeimen bilong domestik dinau.
- Pundaun long domestik kredit long gavman long 13%.

Dispela em hat tasol i gutpela long mekim prais i sanap strong na kirapim sapot i kam long ausait long stretim ekonomi. Hevi we inap kamap em long foren eksens maket sapos i gat sampela hevi i kamap long sait bilong konseseni fanding bikos long abrus bilong domestik atoriti long bungim taget aninit long fainensel program. Olsem na i gutpela long ol dispela program i

mas stap bihainim trek stret long nau. Sapos ol arapela samting olsem pe i go daun tu inap putim program taget long hevi we taim na monitori polisi bai i no wok stret.

I bin gat sampela gutela developmen long ki macroeconomic indiketa na tu developmen long balens ov peimen, sanap strong bilong eksens reit, sampela pundaun long intres reit, dinau bilong gavman long Beng i kam daun long K76 milien long Jun na Julai wantaim plen long kam daun na inflesen inap kam daun long 6-pela mun bihain.

Sentrel Beng nau i laik stretim sanap bilong monitori polisi bilong emlong 6-pela mun bihain. Mak na level bilong wok em i go long en bai bihainim sapos i nogat hevi long lukluk na wok bilong prais long Papua Niugini.

4. Kondak ov Monitori Polisi

Box 3. POROMAN WANTAIM GAVMAN

Long nupela CBA, pawa independens bilong Beng ov Papua Niugini i bin kamap bikpela long mekim prais i sanap strong. Dispela senis i bin kamap bikos long poroman, namel long gavman na Sentrel Beng long abrusim ol hevi inap kamap taim beng i givim moa mani long Baset bilong gavman.

Brukim dept menesmen long wok bilong monitori polisi. Long Januari 2000 interes reit bilong treseri bil i bin stap long maket. Long opela sistem Sentrel Beng i save baim interes tupela taim long olgeta stok bilong treseri bil long reit we ol i makim bihainim wanbel bilong gavman. Sentrel Beng i baim interes long maket reit i go long ol lain bilong holim bil. Olsem na husat bai lukaufim debt menesmen polisi i go bek

gen long Dipatmen bilong Fainens na Treseri. Sentrel Beng bai i go het yet long holim oksen bilong gavman sekuritis na tep insurens, tasol nau em bai sanap tasol olsem gavman ejen.

Ol tambu long givim dinau long gavman. Aninit long opela rot, gavman i ken kism dinau long Beng ov Papua Niugini bihainim limit mak bilong baset reveniu we i stap aninit long luksave bilong Benking Ekt. Tasol aninit long nupela lo, gavman i ken kism tasol hap edvens mani long karamapim ol sot insait long reveniu. Na wanem dinau gavman i kism long Sentrel Beng i no ken abrusim K100 milien na tu gavman i noken abrusim 6-pela mun long bekim. Sentrel Beng i no inap long putim mani long baset bilong gavman.

Taim bilong Gavana, Gavman bai kism wok na stap moa long 5 o 7-pela krismas long opis.

Beng ov Papua Niugini bai wok bihainim mak bilong monitori polisi bihainim risev mani long

kamapim na strongim prais. Risev mani em mani i stap raun na diposit bilong ol komesel beng wantaim Sentrel Beng, na wantaim level bilong likwid aset bihainim stetutori rikwaimen na dispela i ken soim strong bilong benking sistem long givim nupela dinau. Dispela i save muvim diman na inflesen long balens ov peimen long eksens reit. Long 2000 risev mani i bin inap go antap bikos long grot long 70% long 1999. Olsem na Sentrel Beng bai go het yet long yusim open maket instramen bilong em long kirapim ol hap risev mani insait long benking sistem.

Beng i ken mekim wanem kain senis long level bilong likwiditi insait long ekonomi long monitori polisi operesen bilong em na moa pawa em i gat aninit long nupela CBA (lukim box 3) long daunim ol dinau i go long gavman.

Long las kwata bilong 1999 na 6 mun bilong 2000, Sentrel Beng i bin go wantaim maket beis instramen bilong monitori polisi olsem treseri bil na Kina oksen na i no long ol senis bilong edministresen olsem level bilong MLAR na CRR. Long bihainim dispela polisi long daunim ol domestik dinau we i stap yet, gavman i bin daunim mak bilong dinau em i gat wantaim Sentrel Beng long K76 milien. Bikos long dispela saplai bilong treseri bil Benking sistem i bin holim i go daun long dispela yi. Na em bai i go daun yet taim gavman i go het long bekim ol dinau bilong em wantaim Sentrel Beng.

Long strongim wok bilong mani maket Sentrel Beng i bin kamapim tep fasiliti long 1998. Dispela i mekim ol wanwan lain na ol lain we i no beng i baim treseri bil stret long Sentrel Beng long intres reit we i wankain long las oksen. Dispela tu i mekim kamap resis long fans we i mekim diposit na dinau reit i bihainim tru wanem senis long treseri bil. Dispela inap mekim gut wok bilong monitori polisi na sapotim pundaun long intres reit taim inflesen i pundaun long ol yia i kam. Sentrel Beng bai go het yet long pusim sels bilong treseri bil i go long ol lain we i no beng o wanwan lain insait long publik awenes kempen bilong en.

Kina Oksen Fasiliti bai holim bek long larim smut sot tem likwiditi muvmen taim MLAR na CRR i go het long glasim na skelim wok long luksave long level we i ron stret wantaim monitori polisi. Antap long dispela Sentrel Beng bai glasim gen nupela monitori polisi instramen lokng strongim open maket operesen bilong em na mekim teknikal senis long mekim ol i ken wok strong na gutpela we i ken larim monitori polisi i go het na kirapim domestik fainensel sistem i go daun gut.

Buk bilong semi-enuel Monitori Polisi Stetmen i stap long Menesa Pablik Infomesen Yunk long Beng ov Papua Niugini. Aaktim long telepon namba 3227 326 o sailim fax long namba 3200 757.



# Madang holim junia basketbal sempionsip

## MADANG BASKETBAL RIPOT

**NOTEN** Basketbal Konfrens (NBC) bai staim nupela milenum wantaim junia sempionsip long dispela wiken long Madang. Madang Basketbal Asosiesen bai go pas long wok redi na holim dispela sempionsip bilong ol Anda 15 na tu Anda 18. Dispela

tupela sempionsip i bihain junia developmen program bilong NBC na PNG Basketbal Federeesen. Wewak bai salim tupela tim na Madang, Lae na Ramu bai salim 4-pela tim olgeta. Ol dispela tripela senta bai salim bilong Anda 15 na 18.

Nominesen fi bilong stap insait long dispela junia tonamen em K100. Wanem ol tim i laik kisim moa toksave i ken ringim Miri Aeri long 852 1379.

Namba wan tonamen bilong NBC long 1998, Wewak tim i go long fainel long winim Madang. Wewak tim nau i wok long redi gut tru long traime

winim bek dispela taitel bi'long em.

Aeori em wanpela lapun bilong basketbal insait long kantri. Em i bin wanpela gutpela pilaia, kosa na administreta long hailens tasol nau em i go sindaun long Madang na laik mekim basketbal i kamap namba tu spot long soka.

# Kiunga bai statim lig sisen gen

## IAN KAKARERE i raitim

KIUNGA Ragbi Lig bai statim gen sisen propa bilong em long dispela wiken bihain long tupela wik malolo.

Bikpela wok sensis (wok bilong kaunim pipel) insait long Not Flai eria i bagarapim tru kompetisen bikos planti ol sinia referi na pilaia i mekim wok sensis.

Dispela malolo bai skelim strong bilong ol pilaia na ol refuji bikos planti ol klab i no holim gutpela trening long taim bilong malolo.

Trena bilong Fly Storms George Yara i tok em i traime bungim ol yangpela pilaia long mekim trening tasol nogat wanpeal pilaia i save kamap.

## KIUNGA LIG RIPOT

Storm nau bai bungim primia tim, Niwaf Raiders long namba wan gme long Sande. Ol Storms i no save pilai long namba gem bikos planti ol pilaia bilong i save stap longwe na kam.

Storms i sindaun long namba tu ples wantaim 10 poin na Raiders em 14 poin. Sapos Storms i win ol bai smelim tasol as' bilong ol lain Raiders.

Kiunga Tigers bai bungim Airport Norths long namba tu gem. Tigers i no kisim bagarap long taim bilong sensis.


Pilaia na kosa Joe Kirinam i tok planti ol pilaia i no kamap gut bikos ol i save olsem gem bai i no inap

kamap. Sapos ol Tigers i kamap long trening ating ol bai putim kamap gutpela gem stret.

Kosa bilong Waliya Sowati Ole i tok olsem olgeta yangpela pilaia bilong em i stap wantaim bikos ol i save trening long op-sisen. Ol Waliya i no statim gut sisen tasol ol i piaia nau.

Ol Waliya i stap tu long namba tu ples wantaim 10 poin.

Cowboys i kisim bikpela taim nogut bikos planti ol pilaia bilong ol i go long sensis. Ol pilaia olsem Richard Aria husat i kodineta long Not Flai na senta Roba Jeipi em draiva' bilong Woks Dipatmen husat i wok long bisi tru long karim ol sensis tim raun long Kiunga na Tabubil Haiwe.



• Fowet bilong Post Puma (holim bai) i brukim difens bilong Dobo Warriors long bikpela gem bilong Pot Mosbi lig. Warriors na Puma i dro 20-20. Foto: ISSAC IKUAVI.

# Maprik holim Sir Lus spots tonamen

## EDWARD MEATA i raitim

MOA long wanpela ten siks (16) tim bai soim pes long Sir Pita Lus spots tonamen long dispela wiken.

Insait long dispela tonamen, ol tim bai salens long soka na sofbal. Dispela em i namba wan taim we ol pikinini Sepik bai traime gem bilong ol Is Nu Briten insait long bikbus bilong Maprik.

Sir Pita Lus i givim moa long K10,000 long ol ogenaia bilong dispela tonamen. Dispela mani bai bruk i go olsem, K6000 em bilong soka na ol lain i pilai sofbal bai resis long K4,000.

Presiden bilong Soka long Maprik Kelly Surum i tok olsem

## MAPRIK SPOT RIPO

planti ol tim insait long Maprik i redi tasol long brukim bun long dispela wiken. Ol i wok long hatim trening long wanwan eria na tu viles long kamap long soka tonamen.

Mista Surum i tok dispela Maprik tonamen em bilong ol tim insait long Maprik Ilekoret. Na wanem tim insait long Is Sepik laik resis, em bai mas gat gutpela risen long putim nem long tonamen.

Wanem tim sapos ol i painim olsem em i no bilong Maprik bai kisim taim stret ya.

Nau yet, ol ogenaia i no kisim wanpela toktok long hamas tim bai putim nem long resis bilong sofbal.

# Rabaul salim 6-pela tim long junia tonamen

## RABAU SOFBAL RIPOT

RABAU junia softbal bai salim 6-pela long stap insait long sofbal sempionsip we bai kamap long Lae long dispela wiken.

Dispela sempionsip i pulim ol bikpela sofbal senta olsem Pot Mosbi, Lae, Mt Hagen, Goroka, Madang na Rabaul. Tim bilong Rabaul ya em tripela bilong ol boi na tripela bilong ol meri.

Planti ol pilaia i sumatin long ol Gazelle eri na i save pilai insait long junia softbal kompetisen.

Presiden bilong Rabaul Junia Sofbal Lig Thomas ToBunbun i tok ol administreta bilong sofbal bai yusim dispela tonamen long lainim moa save. Na tu ol yangpela pilaia bai kisim moa save long pilai insait

long kain tonamen.

Mista ToBunbun i givim bikpela tok amamas i go long Peter Sharp na kampani bilong em long helpim junia tim bilong Rabaul wantaim K28.600.

Namba bilong olgeta pilaia na opisel em 130. Mista ToBunbun i tok amamas long Paul Pasen na Henry Warkia long go pas long stretim dispela sempionsip ya.

# 14 tim bai soim pes long Hailens rijonel soka tonamen

## HAILENS SOKA RIPOT

WOK redi bilong Hailens Rijonel Soka tonamen i wok long kamap gut tru long Nesenel Spots Institut long Goroka. Dispela tonamen ya bai kamap long Ogas 4-6.

Samting olsem 14 senta i soim laik pinis long salens long David Chung Kap soka tonamen. Ol senta ya em Mendi, Kutubu, Tari, Pangia, Porgera, Wabag, Wapenamanda, Mt Hagen, Simbu, Goroka, Kainantu, Unggai, North Goroka na Hekari.

Kutubu, Hekari, Tari, Pangia na Porgera bai putim tim bilong man tasol. Ol arapela senta bai salim tim bilong man na meri wantaim. Samting olsem 24 tim olgeta bilong man na meri bai resis long namba 12 rijonel soka tonamen.

Vais presiden bilong HSA Ananias Popo i tok olsem dispela sempionsip ya bai bikpela tru. Bipo 7-pela senta tasol i bin resis.

"Tasol long dispela ya, 7-

pela arapela nupela tim i memba long Hailens Soka Asosiesen na ol i laik pilai. Ol nupela memba bilong HSA em Hekari, Tari, Pangia, (Sauten Hailens), Unggai, Not Goroka na Kainantu (Isten Hailens) na Porgera (Enga).

Popo i tok namba bilong 14 senta i soim olsem soka i wok long kamap bikpela insait long hailens rijen we ol i save tingting long ragbi lig tasol.

Dispela soka tonamen i kisim gutpela helpim bilong Coca Cola, David Chung na famili na Isten Hailens Provinsal Gavman.


Chung husat i mesa spona em i presiden bilong Hailens Soka Asosiesen.

Bai i gat wanpela kos bilong referi we ol bai holim dispela bipo long rijonel tonamen. Husat i laik kisim moa save i ken ringim Ananias Popo.

Popo i askim tu wanem ol bisnis o kampani i laik mekim las minit sapot i ken ringim ol dispela laing Dimirit Milen 7322391, Mista Chung 325 6996 na Advent Melkisede 7311833.



IKEN WOKIM GUTPELA SAMTING LONG YU



• Raithan: Tupela pilaia bilong Post Puma i takolim pilaia bilong Dabo Warriors long Pot Mosbi ragbi lig kompetisen. Tupela tim i dro 20-20.

• Antap: Junia netbal resis namei long Paramana na Mermaids las wiken long Rita Flynn's Kot.

• Antap Lephon: Soka eksen bilong Pot Mosbi wimen soka resis las wiken. Kain stail ya i save kukim tru Bisini graun olgeta wiken.

• Antap raithan: Anda 10 City Pharmacy Retel tim i kisim poto bipo long gem las wiken long Pot Mosbi netbal resis.

• Raithan: Tupela pilaia bilong Enga Miok dabolim fulbek bilong Pot Mosbi Viper. Long beksait, Roi Amburi bilong Viper kam sapo-tim em.

Oi Poto: ISSAC IKUAVI & HENRY MORABANG



**IKEN WOKIM GUTPELA SAMTING LONG YU**

## Ol Solomon paitman kilim man Papua Niugini

### Solomon Allan:

WANPELA man Papua Niugini i dai long pait bilong ol Solomon Ailan long Sarere taim ol paitman bilong Malaita Eagle Fos (MEF) i go insait long Guadalcanal long pait wantaim ol birua lain bilong ol, ol Isatabas Fridom Muvmen (IFM). Opisel ripot i tok Hai Komisina bilong PNG, Ponabe Yuwa i tokaut olsem ol birua lain ya i kilim wanpela man PNG. Em i kolim nem

bilong man ya em Peter Tari.

Mista Yuwa i askim long ol Malaita paitman long kisim het bilong man ya i kam bek bikos ol i laik salim bodi bilong em i go long PNG bai famili bilong em i ken lukim na planim bodi bilong em. Ol i katim aut het bilong man ya. Ripot i tok ol Malaita paitman i bin kilim tripela man olgeta tasol bihain tok kila i kamap olsem tupela man tasol i bin dai na wanpela i kisim bagarap na i

stap long haus sik. Dispela pait i bin kamap taim ol Malaita paitman i tok ol Isatabas lain i bin rausim 20,000 lain bilong ol long Malaita long graun na wok bilong ol. Insait long dispela pait we i bin kisim 19 mun olgeta stat long Jun 5 dispela yia, namba olsem 60 lain i dai pinis.

Ol toktok bilong stretim dispela hevi na birua i wok long go het yet tasol pait na birua tu i go het yet.

## Ol Fiji lida sainim pepa bilong stretim gavman

### ...Ol bikman long kalabus i kamaut pinis

### Fiji:

Wanpela wanbel pepa em Fiji Interim Het ov Stet Komanda Frank Bainimarama wantaim George Speight, man husat i bin go pas long straik long rausim Gavman bilong Fiji i sainim na rausim olpela Praim Minista Mahendra Chaudhry na 26 arapela palamen lida long kalabus ol i stap long en.

Dispela wanbel pepa i orait long ol Kaunsil Sief i ken go het na bung long makim presiden na vais presiden. Na long dispela taim tu bai olpela Praim Minista na 26 arapela palamen lain ya i kam aut fri. Komanda Bainimarama bai givim ol eksekutiv pawa i go long nupela presiden na nupela Praim Minista Laisenia Qarase wantaim edministresen bilong em i ken risain.

George Speight i tok em bai wanbel long nupela edministresen we ol lida bilong Fiji stret i makim. Mipela i amamas long dispela rot, em i tok. Mista Speight i tok dispela rot nau i kamapim tru wanem as dispela hevi we ol i bin mekim long rausim olpela gavman na sanapim rot stret bilong politiks long Fiji i kamap bihainim long tupela krismas i kam.

Em i tokaut moa long bikpela wok ol bai mekim long stretim gut nem na ol bilong wok bilong kantri. Mausman bilong ol ami, Lutenen Kenel Filipo Tarakinikini i tok bai ol rebel grup i mas go long Bareks na givim olgeta samting bilong pait ol i holim taim olpela Praim Minista na olpela Minista ya i kam aut long kalabus ol i stap long en. Dispela wanbel tu bai bringim bek olgeta

wok bilong lo na oda na tu putim bek olgeta wok na sistem na ron bilong kantri bihainim mama lo bilong kantri. Tasol long dispela taim yet ol lain Fiji husat i bin go pas long rausim olpela gavman i go het yet long go pas long ol distrik edministresen na plis stesin insait long wanwan hap bilong kantri.

Man husat i go pas long dispela tekova bilong ol plis stesin em pikinini bilong biknem sief Ratu Tevita Vakalalabure. Em i tokaut olsem dispela eksen bilong ol em long lukim olsem gavman bilong Fiji stret i mas kamap long sevim na lukautim sindaun bilong ol. Long Mande narapela grup i tekova long olpela kapitel siti bilong Fiji long Levuka long kukim ol haus na samting.

## Pait namel long Solomon Ailan i go het yet

Tupela memba bilong Isatabu Fridom Muvmen (IFM) long Solomon Ailan i dai taim ol birua bilong ol i go na kilim tupela long haus sik taim tupela i wok long kisim marasin i stap. Wanpela nes meri i tok ol birua em ol lain bilong Malaitan Eagle Force (MEF).

Dispela nes meri i tok ol dispela MEF paitman i go insait long haus sik long taim olsem 2 kilok apinun na sutim tupela IFM man ya long haus sik taim tupela i slip long bet bikos tupela i bin kisim bagarap pastaim na i kam long haus sik long kisim marasin.

Ripot i tok dispela pasin ol MEF lain i mekim long tupela IFM man ya em bikos ol i laik bekim bek long dai bilong tupela lain bilong ol tupela wik i go pinis we ol IFM lain long Guadalcanal i bin kilim tupela lain bilong ol.

Dispela bikpela pait o trabel i kamap bikos long bikpela kros namel long tupela lain grup ya we ol i tok ol lain bilong Malaita i kam sindaun long bikpela hap graun na ples. Na tu ol tasol i wok long kisim planti bikpela wok long kantri na i no ol IMF lain.

Long dispela wik tu ol Malaita paitman i bin go insait long banis bilong Katolik sios na holim wanpela pater na lokim em i stap, plis ripot i tok.

Solomon Ailan Gavman i wanbel long baim kompensen long ol bagarap we i kamap long bikpela pait na kros we i bin pusim olpela Praim Minista i go aut na nupela Praim Minista i kamap na kisim ples.

Praim Minista Manasseh Sogovare i tokaut olsem dispela SI\$10 milien gavman i laik baim olsem kompensesen igo long ol birua lain i kam long Sentrel Beng bilong Solomon Ailan na ol arapela eria we mani i kam long en insait long kantri yet.

Mista Sogovare i tokaut olsem i nogat wanpela samting i nupela long dispela kain pasin.

Tasol em i tokaut olsem dispela kompensesen pemen em bilong mekim rot bilong tupela birua grup i ken sindaun wantaim na toktok long lusim ol samting bilong pait na stretim gut toktok.

Praim Minista i tok gavman i wok long kisim inap mani i kam insait nau na dispela i soim olsem ol bisnis i gat bilip na strong long go het long wok bilong ol. Em i amamas long lukim olsem gavman i bin kisim SI\$12 milien dola long las wik.

Deputi Praim Minista bilong Solomon Ailan na Minista bilong Nesenel Yuniti, Rikonsiliesen na Pis, Allan Kemakeza i tokaut olsem dispela pait long Solomon ailan em olsem luksave ol pipel bilong Solomon i gat bikos long ol senis na developmen kantri i wok long go long en tude.

Wanpela gavman grup i bin bung wantaim Guadalcanal Provinsal Primia Ezekiel Alebu long dispela wik long traim bungim ol Isatabu Fridom Muvmen (IFM) long sindaun toktok wantaim gavman na lusim ol samting bilong pait.

Praim Minista Manasseh Sogovare i tokaut olsem ol lain bilong Malaita Eagle Force (MEF) i orait long bungim gavman na sindaun toktok long dispela hevi.

MEF lida Andrew Nori i tokaut olsem olgeta IFM komanda i mas kamap long dispela bung sapos ol i laikim trabel na pait long pinis. Praim Minista i laik dispela bung i mas kamap dispela wik tasol long wanem taim na long wanem hap, em tupela birua grup ya i mas wanbel long en.

NIU  
PELA

# Colgate


Toothpaste bilong PNG Stret!



Strongpela, waitpela helti tit na gutpela smel  
long liklik prais tasol - nau em bai givim yu  
**Colgate Strongpela Tru Smael.**

HRD SAVI 3362

# LAIPSTAIL




• Antap lephan: Ol mama long Mosbi i soim bel hevi bilong ol taim ol i givim petisen pas i go long Mosbi Saut memba, Ledi Carol Kidu bikos NCDC i stapim ol long noken salim ol kuk kaikai long Godens maket.

• Antap raithan: Dispela tupela sumatin ya i kamautim ol Kung-Fu stail ol i bin lainim. Dispela mangi i bagarapim stret poro bilong em wantaim sait kik.

• Namel lephan: Ol mama na pikinini long Samaging viles long Boana i hatim skin long paia i stap bihain long witnesim Sankwep bris i op.

• Namel raithan: Ol kofi groa bilong 5-pela provins long Hailens i mekim protes utsait long Highlander Hotel long Hagen Rijinol Forum na Konsutativ Implementesin na Monitoring miting.

• Lephon: Niusman bilong Amerika Gil Griffin i kamap long PNG na toktok wantaim ol nius manmeri bilong Word Publishing Kampani. Em i soim sampela nius em i bin raitim long Amerika. Potos: ISSAC IKUAVI.



# Yangpela meri trikim tewel man

Sapos sampela samting kamap long yu bai yu kam sindaun long em na bai em i harim yu i go antap long dispela longpela kwila na bai yu go sindaun antap tru long het bilong em.

Tanget bilong em i karim em i go sindaun gut tru long het bilong diwai Kwila. Em i laik lukluk i go antap long het bilong maunen, ren win wantaim i kam. Man nogut hia em i kam kamap long ples em i lukluk i go insait long haus na em i no lukim meri hia.

Em i lukluk i go antap long het bilong Kwila em i lukim meri i sindaun gut tru i stap. Nau em i singaut i go antap long meri na em tok olsem. Hia yu go antap olsem wanem? Em mi kam antap long ol hol, yu holim ol rop na yu kam antap long mi. Man i kolim ol rop tasol na i go antap long namel tasol ol rop i bruk tasol.

Baga i i go daun bamim em nabaut long bel bilong Kwila diwai, em i hap idai i stap. Em i slip longpela taim tru, na em kirap tasol i singautim meri i go antap ken, yu go antap olsem wanem?

Meri lukim na tok olsem mi kalap long liklik diwai i kam antap long han bilong Kwila na mi kamap hia. Nau man hia i traim ken i go stap ken long diwai na diwai i bruk tasol em i go daun, em hap idai i stap em i kirap na em i kisim spia bilong em na i go bek long maunten long ples bilong em.

Em i slip tu ken em i tromoi spia bilong em i kam pundaun stret long dua long haus bilong meri ya. Nau Galibi o meri i lukim spia i pundaun long dua bilong haus bilong em. Em i redim ol kaikai, buai, daka, kabang bilong em na em i sindaun antap long tanget bilong em na tanget i karim i go antap ong het bilong diwai Kwila na em i sindaun na em i lukluk i go antap long het bilong maunten em ren na win, em man nogut i kam em i kam kamap long ples bilong Galibi na em i lukluk i go antap na em i lukim Galibi na em i no moa tingting long kaikaim Galibi, em i laik tru long maritim Galibi nau.

Nau em i singautim Galibi na em tok olsem sori tru meri bilong mi na mi laik tru long maritim yu na noken pret bai mi go kaikaim yu.

Yu kam daun na bai mi kirap na em i kisim spia bilong em na i go bek long maunten long ples bilong em.

Na Galibi tu em i lukluk i go long ples Kanu bilong papamama i kam klostu pinis. Nau man nogut i singaut i go antap long Galibi olsem yu singsing sori long husat em mi man bilong yu mi stap hia.

Kamdaun bai mi tupela i go long ples bilong mi. Tasol Galibi i no harim toktok bilong em, em i wok long singsing na singautim papamama bilong em.



Nau papamama bilong em tupela i kam pinis long nambis na papa i karim spia bilong em na mama i harim diwai bilong kilim man long en. Taim Galibi i wok long singsing em i toktok i stap.

Orait nau Galibi i giamanim em, yu kam antap long liklik diwai salat na i kam antap long mi. Baga i harim tasol Galibi tok olsem na em i go antap long diwai salat, diwai salat i bruk go daun, ol han bilong diwai i bamim em nabaut.

Em i hap i dai na em i go slip idai i stap. Papa i ron wantaim spia bilong em putim tru long em, mama i ron wantaim stik bilong kilim ol man i kam tasol putim het bilong em, em idai olgeta nau.

Galibi i kam daun nau long papamama bilong em. Nau ol i stap na ol amamas long ples.

Andrew Tarao  
Ruango Village  
Kimbe, Wes Niu Briten  
provins.



Nem: Allan Noel  
Krismas: 18 man  
Adres: P.O. Box 31, Maprik, East Sepik Province.

Save laikim: I go waswas long raunwara, lukim vidio, harim pop musik, raun long taun na painim ol pren na mi bai bekim pas bilong husat meri i rait long mi.

Nem: Maxson Maika  
Krismas: 13 man  
Adres: Wangbin Community School, P.O. Box 636, Tabubil, Western Province.

Save laikim: Pilai soka, ragbi na tenis, harim gospol musik o singsing na raitim pas go kam wantaim narapela brata susa long narapela hap provins na sensim presen nabaut wantaim ol.

Nem: Jenny Kundipa  
Krismas: 16 meri  
Adres: Tindua Primary School, P.O. Box 52, Ialibu, SHP.

Save laikim: Pilai basketbal, tok stori, singim singsing bilong prais, huk long wara na laik tok long lnglis, helpim mamapapa na ritim buk.

Nem: Philip Jekonaiah  
Krismas: 25 man  
Adres: Eastern Rock, P.O. Box 667, Kavieng.

Save laikim: Harim o gospol musik, go long lotu olgeta Sarere o sabat, go wok gaden, helpim papamama na ol lapun bubu na mi laikim tru mekim penpren wantaim ol yangpela manmeri bilong narapela ples, mi promisim long bekim gutpela pas i kam long yu.

Nem: Applonia Aruma  
Krismas: 15 meri  
Adres: Josephstaal Catholic Mission, P.O. Box 750, Middle Ramu, Madang Province.

Save laikim: Go long lotu long Sande, mekim penpren long narapela kantri o provins na senisim presen na salim i go bek.

Nem: Servina Karukai  
Krismas: 16 meri  
Adres: Josephstaal Catholic Mission, P.O. Box 750, Middle Ramu, Madang Province.

Save laikim: Harim ol PNG musik na go long danis, harim ol tumbuna stori na senisim ol presen i go kam long ol narapela provins na kantri na mekim penpren long ol arapela husat i stap long narapela provins na kantri. Na tu mi save laik long harim tok bilong God na go long lotu olgeta Sande.

Nem: Yalamu Joe  
Krismas: 17 man  
Adres: Antir Community School, Isiuwain Street, P.O. Kaiapit, Muizing Station, Markham District, Lae, Morobe Province.

Save laikim: Mi save laik tru long wokim penpren long Wantok niuspepa.

Nem: Natex Aturam  
Krismas: 14 man  
Adres: Wangbin Community School, P.O. Box 636, Tabubil, Western Province.

Save laikim: Pilai boksing, ragbi na pilai gita, harim gospol singsing na raitim pas i go kam wantaim narapela brata susa long narapela provins.

Nem: Jobson Chako  
Krismas: 20 man  
Adres: C/o - P.O. Box 57, Ambunti, East Sepik Province.

Save laikim: Harim gospel musik na go lotu, pilai soka na raitim pas long ol penpren na senisim ol poto.

Nem: Billson Apexsie  
Krismas: 19 man  
Adres: P.O. Box 31, Maprik, East Sepik Province.

Save laikim: Olgeta gems, mi save laik pilai ragbi tas, soka, volibal, na sampela moa, harim pop musik, painim pis long raunwara na raitim pas long ol pren.

BIPO bipo tru long Vitu ailan i gat wanpela man nogut i save kaikai ol man na meri long olgeta ples. Sampela man na meri i ronawe i go long bikpela ples.

Tasol wanpela man na meri bilong em na pikinini meri i tasol ol i hajt gut tru long ples bilong ol.

Na man nogut hia i no save long ol. Ol i stap na ol save kukim kaikai bilong ol long nait tasol. Ol i stap na pikinini meri i kamap bikpela meri nau.

Dispela man nogut hia em i save stap antap long het bilong wanpela maunten.

Taim em i laik go daun long kilim ol man em i save kam wantaim win ken i kam wantaim em. Galibi na papamama bilong em ol i stap gut tru long ples bilong ol na ol i save kukim kaikai bilong ol long nait tasol.

Bipo ol i save pretim dispela man nogut. Ol i stap na papamama bilong Galibi tupela i tingting long lusim Galibi na go long bikples bilong painim sampela samting bilong ol.

Nau papamama i go na Galibi tasol i stap long ples bilong ol: Em Galibi i no moa pret long dispela man nogut. Em i save lukautim gut ol pik na dok bilong ol.

Na long nait tasol em i save kukim kaikai bilong em na het bilong paia i kisim em na em i tuat na em i rapim tuat long ples bilong em na em i tromoi i go long paia.

Nau win i kisim smel bilong em i go long maunten nau dispela man nogut i smelim nau. Man nogut i kirap tasol em i tok o gutpela smel tru i kam we, olgeta man mi kaikaim ol pinis na dispela gutpela smel kam we tru.

Nau em i kirap tasol putim nus bilong em i go olsem long hap bilong we em painim pinis.

Orait em tok gutpela kaikai yu wetim mi bai mi kam orait dispela meri bai tokim em tu olsem tanget bilong yu i stap mi tupela i wokim puripuri pinis long em.



Dia LAIPLAIN,

Mi gat wanpela pikinini krismas bilong em 6, tasol nau mi nogat bel gen. Dispela i mekim man bilong mi i save kros na paitim mi.

Mi save harim olsem taim ol man i save dring planti bia tumas, wara bilong ol i no save strong tumas long wokim pikinini.

Man bilong mi i save dring planti taim na em i save paitim mi we i nogat as long en. Inap yu tokim mi long sampela lo we i save

## Man i save paitim mi bikos mi nogat pikinini

tambuim ol man long paitim meri bilong ol olsem.

### BEATEN WIFE

Dia PREN,

Ol dokta i save tokim mipela olsem taim wanpela marit i no save kamapim pikinini, sampela samting i rong long bodi bilong meri o long bodi bilong man. Long sampela rot, ol dokta i save stretim dispela kain hevi long tupela i ken gat pikinini.

Tasol long sampela, em i save hat na tupela marit i no save gat pikinini long marit laip bilong tupela long bihain taim. Wanpela rot tasol long sekim sapos i gat sampela samting i rong long bodi bilong yu o long bodi bilong man em long yutupela i go lukim dokta long sekim bodi bilong yu na bodi na man bilong yu.

Long sampela man, ol i save dring planti bia na dispela i save bagarapim wara bilong ol long kamapim pikinini. Sapos yu laik save sapos bia i bagarapim wara bilong man bilong yu long kamapim pikini-

ni, orait yutupela i mas go lukim wanpela dokta long sekim.

Long pasin bilong paitim meri, mipela i laik tokaut olsem, bikos long wok bilong Lo Rifom Komisin, plis i oraitim lo olsem paitim meri em i brukim lo.

Long pastaim, ol plisman i no save kari-maut gut dispela lo, tasol nau ol i mas kisim eksen bikos sapos ol meri i go komplek long ol.

I gat ol toksave long buk we yu ken kisim long luksave long wanem kain helpim yu ken kisim taim dispela kain hevi i kamap long yu.

Yu ken raitim pas i kam long Lifeline o Law Refrom Commission, PO Box 3439, Boroko, NCD long kisim ol dispela pepa o buk we i gat ol dispela toktok na lo i stap long en. Provinsal welfea opisa, wimens ogenaisesen na sampela sios i save gut tu long dispela lo long givim yu gutpela tok stia bilong bihainim.

LAIPLAIN



**Morobe Provinsal Gavman**

Morobe Provinsal Gavman em i was papa bilong Morobe Sevings na Lons Soaiti;

• Em i givim mani long Sosaiti long karimaut wok olsem:

(a) Peim ol wokmanmeri long lukautim wok bilong sosaiti.

(b) Peim Opis Rent bilong Sosaiti.

(c) Peim ol arapela ekspens bilong Sosaiti olsem ol pepa bilong opis, opis masin na ol tebol na sia.

(d) Peim wok long bringim wok bilong Sosaiti we bai i ken kamap klia long ol manmeri long asples.

(e) Gavman bai peim wok long bringim na kamap benk klostu long ol asples.

**Wok kamap long Sosaiti Stat long mun Mas 99 inap Mas 2000**

Namba bilong ol memba long Ssoaiti 2,526. Sea mani ol memba bungim K802,000.00

Namba long ol dinau Sosaiti givim K1,671

Hap dinau mani stap long han bilong ol memba K 457,652.00

Strong bilong mani ol memba bungim K1,013,109.00

Sosaiti tokaut long wok bilong givim dinau:

Brukim ol dinau stat long man Jan 99 i go Mas 2000

(a) Ekonomik Dvelopmen - 1020 lons K 371,365.00

(b) Sosel Dvelopmen 425 lons

K154,735.00. (c) Ol arapela wok- 226 lons K2,841.00

Bungim olgeta dinau Sosaiti givim long Mas 99 inap Mas 2000 K 618,941.00

Rausim bekim dinau long mun Julai 99 i go Disemba 99 (K 44,713.00)

Rausim bekim dinau long mun Januari i go Mas 2000

(K 116,576.00) Hap dinau mani stap long han bilong ol memba 457,652.00.

# Morobe Sevings na Lon Sosaiti

## Stia tok "A2000" na kaikai bilong tingting

Mipela ol Bod ov Dairekta bilong Morobe Sevings na Lons Sosaiti i makim pinis Edukesen Komiti. Tripela dairekta na Pablik Rilesen Opisa bilong Sosaiti i kamapim ol memba bilong dispela komiti. Dispela komiti bai mekim na karim aut wok long tok save na givim stia long ol memba. Bai o i mekim dispela wok na yusim redio, niuspepa na TV na tu ol bai yusim stia tok "2000" niuspepa bilong sosaiti long toksave na tu skulim olgeta memba na ripot long Morobe

provins.

Edukesen komiti bilong sosaiti i laik ol memba i mas kisim stretpela na gutpela tok klia long wok sosaiti i wok long mekim long dispela taim stat long Mas 1999 i kam inap long Disemba 1999. Toktok bilong stretim tu bel o tupela tingting bilong sampela manmeri i stap tu long Stia Tok pepa wantaim tingting o plen bilong ol wok bai Sosaiti laik wokim long yia 2000 na ol yia i kam bihain.

## Projek na wok plen bilong yia 2000 na ol yia i kam bihain em long:

- Lukluk na bringim benk i go klostu long ol sosaiti memba insait long ol wanwan distrik;
- Lukluk long helpim ol memba long helpim ol yet long kamapim na strongim wok long Sosel na Ekonomik Dvelopmen long ol asples;
- Lukluk long skulim ol memba long stretpela pasin long ronim bisnis, bihainim pasin na astingt-

ing bilong God husat i papa long olgeta hap graun na ol manmeri;

• Mekim moa wok long skulim ol memba long gutpela rot na stretpela pasin long kisim na bekim dinau;

• Lukluk long helpim ol Sosaiti memba long kamap gut ol Ikonmik projek bilong ol long Agrikalsa Komes na Bisnis Dvelopmen.

## Toksave long wok bilong mani long mun Januari i go Mas 2000

**Mani i kam insait**

Memba putim sia mani  
Memba bekim dinau  
Olgeta mani kam hait  
K384,540.00  
K116,576.00  
K501,116.00

**Mani i go ausait**

Memba kisim sia mani  
Memba kisim dinau  
Olgeta mani go ausait  
K 79,572.00  
K349,238.00  
K428,810.00

## Ol polisi bilong sevings na lons Sosaiti

Hia em haphap polisi bilong Sosaiti long helpim ol manmeri husat i laik kamap memba.

**Membasip**

Membasip em i op long ol manmeri i stap long Morobe na ol pikinini bai ken kisim gutpela skul long dispela dinau mani papa "o" mama i bin kisim long sosaiti.

- Fi bilong kamap memba

K 2.00

• Mak bilong mani long opim nupela akaun K20.00

**Toksave long Sevings**

- Memba bai kisim pasbuk.
- Pe didaksen long ol wokmanmeri.

Kisim dinau long wanem as?

- Baim skul fi.
- Kago bilong tred stua.
- Baim kopra, kakao na kopi.
- Kisim pis.
- Ol samting bilong wokim haus slip.
- Ol kos bilong planim ol daiman.

- Ol kos bilong baim ol ka na trak.

- Wokim kakaruk banis.
- Ol kain samting bilong wok didiman.
- Bekim ol dinau.
- Baim meri na kos bilong marit.
- Dokta na marasin samting.

## Pasin bilong sevings

As wok bilong Morobe Sevings na Lons Sosaiti em long kirapim tingting na helpim yu long sevim mani. Na sapos yu wantaim famili bilong yu i bungim o painim sampela hevi, dispela mani yu sevim i ken helpim yu taim hevi i kamap. Ol kain samting olsem skul fi bilong pikinini na haus sik na ol marasin na wok bisnis o haus slip em yu laik stretim na kamapim gut.

Dispela kampani yu wok long en inap helpim yu long katim pe long olgeta insait na salim stret long sosaiti.

Ol wokmanmeri bilong sosaiti bai i ken givim yu stia na gutpela tingting long sevim gut mani bilong yu. Wanem mani yu laik putim long sosaiti em stap long laik na tingting bilong yu yet. Gutpela pasin na tingting em long redim yu yet long kainkain hevi we bai i ken kamap long yu long bihain taim.

Morobe Sevings na Lons Sosaiti em i no benk. Em i wok bung tasol bilong ol manmeri husat i memba.

**Dinau**

Ol memba husat i solim gutpela pasin long redim em yet. em tasol inap long kisim dinau mani long sosaiti. Hamas dinau memba i laik kisim em i wankain tasol long sevings memba yet i bungim pinis long sosaiti. Yu noken tekewe sea na sevings bilong yu. Kisim tasol dinau na bekim long mak yu ting yu inap. Larim sevings bilong yu i wok long sosaiti na yu i ken kisim dividen o win (interes) mani.

Interes o likdik pe bilong bekim dinau em wan pesen long wanwan mun. Bilong wanwan yia em i 12 pesen (12 pesen).

Nau yet Memba Sevings na Lons Sosaiti i wok long givim planti helpim i go aut long ol pipel husat i wok long kamapim ol gutpela projek long ol komyuniti insait ong Morobe provins. Ol helpim olsem lukautim na kamapim ol laipstok samting olsem kakaruk na pik, helpim i go long likdik tred stua na tu sapotim long kamapim wanpela skul projek.

## Toktok bilong dinau

PLANTI askim na toktok i wok long kamap long pasin na we nupela Sevings na Lon Sosaiti long Morobe provins i wok long mekim. Planti i wok long amamas olsem ol i wok long pulmapim aplikesen pepa bilong kisim dinau na wan tu tasol ol i kisim mani na wokabaut i go long mekim wok bilong ol.

Ol i no save wet planti wik na mun na kisim dinau olsem ol i save mekim long ol bikpela benk. Tu ol bikpela benk i no save givim dinau long ol kastoma bilong ol sapos dinau mani ol i askim long en i wankain olsem mani ol i gat long benk.

Sampela i wok long askim long wanem taim bai Morobe Sevings na Lon Sosaiti bai apim mak bilong kisim dinau.

Ansa bai mipela givim long dispela tok piksa: I olsem: nau yet sapos memba i putim K600.00; em i ken kisim dinau long K600.00; na wanem taim bai sosaiti bai litimapim mak bilong kisim dinau; olsem Sevings i sanap long K600.00 na dinau bai sanap olsem K1,200.00 na antap moa long dispela mak long wan (1) tu wan (1).

Sosaiti i laik tok klia long ol memba na ol man na meri husat i laik kamap memba long Morobe Sevings na Lon Sosaiti, olsem:

(1) Sosaiti i wok long wokabaut yet long wok dvelopmen o mekim ol wok long mekim na kamapim Sosaiti bai

kamap bikpela. Laip bilong dispela wok boi faivpela yia, stat long dispela yia 2000 na bai i go pinis long yia 2005.

Long dispela taim Sosaiti bai lukluk na wok long lainim ol memba bilong em long luksave long gutpela pasin long kisim dinau bai famili "o" mama papa na ol pikinini bai ken kisim gutpela skul long dispela dinau mani papa "o" mama i bin kisim long sosaiti.

Sosaiti i mekim dispela tok long wanem lukluk long piksa bilong ol. Olpela sosaiti i no bin kamapim gutpela kaikai. Olgeta olpela sosaiti i bin dai pinis long wanem papa i bin save kisim dinau long laik bilong em yet na famili i no bin kisim kaikai long dispela dinau mani. Pasin nogut tu bilong dispela graun i bin pulap insait long ol dispela dinau ol memba i bin save kisim.

Long ol dispela pasin nogut bilong bipo; dispela nupela sosaiti bai glasim gut ol kain dinau ol memba i wok long kisim; insait lor.g dispela taim bilong wok dvelopmen.

(2) Sosaiti tu i bin lukluk long hevi bilong mani; kantri bilong yumi i wok long bungim long dispela taim.

Olsem na menesmen bilong sosaiti i no bin laik long hariap long putim mak bilong dinau i go abrusim mak bilong mani memba i putim long sevings akaun bilong em.

(3) Sosaiti menesmen i bin luksave tu; long hevi bilong ol olpela sosaiti long pasin bilong givim dinau we mak bilong dinau i bin abrusim mak bilong sevings long ol bikpela namba. Dispela pasin tasol long givim bikpela dinau long memba we sevings bilong em i no bin givim em gutpela as bilong strongim dispela dinau; i bin mekim na olgeta olpela sosaiti i bin pundaun na dai pinis.

(4) Planti memba long ol olpela sosaiti na planti moa memba long sampela bikpela sosaiti long dispela taim i wok long mekim pasin sin long ai bilong God; long kisim dinau long wokim samting olsem peim Skul Fi bilong pikinini; na ol go lusim mani long mekim narapela wok olsem "Hos Reis na pilai long Beting Shop."

Sapos sampela memba long dispela nupela sosaiti i wok long mekim dispela pasin; menesmen bilong sosaiti i mas givim yupela strongpela tok lukaut olsem God papa i wok long lukluk long pasin sin ol dispela kain memba i wok long mekim.

Dispela kain pasin sin bai brukim poket bilong ol na bai i nogat mani long bekim dinau bilong ol.

Blesing bilong God bai lusim man na meri husat i wok long giamanim wok mani bilong em yet.



# KANAGE



**K**anage em i save go long lotu long ol Sande tasol em i no save long pre. Taim bilong lotu ol i makim Kanage bai i mekim pre. Orait olgeta manmeri i pasim ai bai Kanage i pre nau. Taim olgeta kongrigesen i pasim ai ol i putim ai tasol bai Kanage i lotu. Tasol samting tru em Kanage i go ausait long haus lotu isi tasol na i tekov na klostu wan hawa na pasto i opim wanpela ai na i lukluk i go long ples. Kanage i sanap long en na i no lukim Kanage. Samting tru Kanage i no save long pre olsem na em i tekov pinis.

**Ruth Barth Kimbe**

Kanage bilong Bogia na em stap long liklik ples long Mugumat insait long Almam eria Madang provins. Wanpela taim em kros wantaim lapun meri bilong em. Kros bilong tupela lapun meri bilong em stat long Fraide na Sarere long Sande na em nã em go long bus long painim tulip. Taim em laik kam bek long ples na em katim wanpela limbun bilong tromoi ol pipia. Lapun meri ting olsem papa Kanage lusim kros pinis. Kanage em wok long kros. Em nau lapun meri putim ol bilim samting pinis, na em tromoi limbun pinis long graun na sindaun antap long limbun na em tokim paps Kanage olsem, yu wanpela tit bruk man tru. Olsem na yu save kros olsem ol nupela marit, save kros klostu, klostu, nus bilong yu olsem nus bilong manki bilong Tazen. Em nau paps Kanage i no wanpela long dispela tok lapun meri bilong em tokim em olsem, man paps Kanage lusim bet mambu na kalap i go daun long graun na em i ron long baksait na i kam. Taim em kam kamap klostu long meri bilong em na em taim long fran na em ron. Wantaim na kolim nem bilong masalai na em singaut "A" repeimau. Em nau lapun meri bilong em harim olsem na em tok tete mi dai nau, em givim liklik spes tasol long em kam pait. Baga man ya kalap tasol antap long limbun long paitim meri bilong em nogat em siksti go antap tasol long limbun na go sindaun antap long Sakana bilong lapun meri bilong em na kros bilong tupela pinis wantu stret.

**John Dee Wau Nada Bogia**

Kanage bilong Makam. Kanage i wanpela hetman we olgeta Sande em i save autim tok long ol manmeri i harim. Wanpela Sande Kanage i autim tok na em i lukim wanpela naispela na yangpela meri tru i sindaun long kona bilong haus lotu.

Kanage i bin i gat tingting long dispela yangpela meri ya. Na taim lotu i pinis olgeta manmeri i go ausait. Kanage i giaman long lewa bilong em i pen. Kanage i tokim meri ya olsem kisim wara na givim mi. Lewa bilong mi i pen. Trangu yangpela meri ya i sori long Kanage i pilim pen wantaim lewa bilong em. Na em i go kisim

wara i kam givim Kanage. Long dispela taim Kanage i autim wanem tingting em i gat long en. Meri i tok em i gutpela tingting bilong yu. Tasol mi pret papama ma bilong mi bai kros long mi tupela i pren. Kanage i tok hey yu harim. It's our like and we friend don't talk it out. Stay for you and stay for me. Meri harim olsem na kilim long lap na das i go ausait.

**Aifexil Binas Markham**

Kanage i bilong hap bilong ol kol ples. Sik pekpek wara na het i pen i kisim Kanage. Nau Kanage i go long haus sik. Apo i askim Kanage yu sik olsem wanem? Na Kanage i tok. Ronta het bilong mi i pen. Na as bilong mi i traut. Kanage i ting yumi save traut long maus na taim yumi pekpek wara em as i save traut tu hia.

**Clespas Barth Kimbe**

Bikman Kanage bilong Tambul, em i wok long rot. Tambul tu-Tomba rot. Em wok wantaim wanpela poroman. Dispela poroman i kam long Kompiam long Enga provins. Dispela poroman i kirap na tok olsem. Mipela long Kompiam mipela isi long maritim ol meri. Mipela givim liklik pe tasol na marit. Mi lukim pe bilong meri long Tambul i go antap tumas. Poroman i tok, Kanage bikman olsem yu bai yu maritim 4 o 6 meri long Kompiam. Nau Kanage i kirap na tok, sapos mi no Luteran bai mi traim meri bilong mi na kristen bai mi inap traim sampela meri long hap. Em abrus na tok, sapos mi no Luteran bai mi traim meri bilong yu.

**Pundu Napa Tambul**

Kanage bilong Markham insait long Morobe provins. Kanage krismas bilong em 9-ya boi. Kanage em wanpela batri pes bilong ka. Wanpela apinun ankol bilong Kanage i laik go raun long maket. Na Kanage i putim was i stap. Taim ankol bilong Kanage i statim ka. Kanage i kalap long ka. Taim ol i kisim ka na tekov stret em bikpela hevi ren stret i pundaun. I no long taim Kanage wantaim ankol bilong en i planim long graun malo malo. Tupela i mekim long ka i kam antap i go na nogat. Ankol bilong Kanage i kisim wokitoki na traim long ringim menesa bilong Ramu Cattle Fam long kam pulim ol. Baga Kanage i sanap long sait na harim. Ankol bilong Kanage i putim redio na go long sait bilong ka. Kanage i apim redio sem taim menesa i toktok long Ingliis na Kanage i no save tu. Kanage i kirap tasol em i tok Leron One! Leron one! I'm pashing to the mad one car for you come and bring me up. Taim ankol bilong Kanage harim olsem em idai long lap.

**Aifexil Binas Markham**

Kanage em bilong Bogia, long Madang provins. Em i maritim wanpela meri Bogia yet. Tupela i stap amamas oltaim wantaim na long wanpela de, meri bilong Kanage idai. Nau nius bilong dai bilong meri bilong Kanage i go raun long olgeta manmeri long dispela ples. Na ol manmeri i kamap sindaun krai sori wantaim Kanage. Long dispela taim Kanage i pasim laplap na sindaun fran long het bilong meri bilong em na han bilong Kanage i go holim het bilong meri bilong em na em i wok long krai i stap. Long dispela taim em i wok long krai i stap wantaim ol manmeri na em i no luksave olsem laplap bilong em i lusim posisen pinis na tupela wil bilong balus i hangamap i stap. Nau wanpela traipela mama bilong Guma i wokabout i kam. Em i makim stret Kanage na i kam. Kanage i no bisi long lukluk nabaut na em i mekim save long krai olsem . . . Hi . . . .Hi..Hi..Hi..Hi i stap nau traipela mama bilong Guma i kam tasol na pilim stret pen bilong tit bilong Guma long tupela wil bilong bilus ya na em i sekim bodi bilong meri i wok long sindaun krai sori wantaim em i stap. Taim ol manmeri i lukim bodi bilong meri bilong Kanage i pundaun namel stret long ol, ol i ting tewel bilong meri bilong Kanage i kirap na ol i stopim krai na ol i pret na ronawe nabaut.

**Roger Ramax Bogia**

Kanage em wanpela asples manki long Wau. Bipo long taim bilong tumbuna ol bikman bin mekim hol long nus bilong Kanage na em i no save raun long ol taun, em i save i stap tasol long Wau. Kanage i stap i go na wanpela taim em i go daun long Gabensis maket long Makham na baim 2-pela buai bek na em i go salim buai long Wau maket. Em i stap i go na em pilim hangre na em kisim koins bilong buai na wokabout i go long Pukari Haus Kaikai na baim 2-pela banana wantaim wanpela hap lem sop. Kanage kisim na em i go sindaun namel stret long ragbi fil. Taim Kanage laik putim tit stret long mit, blu lang long kam i go insait long nus na go aut long narapela sait. Long namba tu taim Kanage gat wantaim wanpela gutpela aidia. Kanage tokim blu flai! "Yu ting mi manki bilong yu na yu laik pilai long mi, ya." Long namba tri taim blu lang kam i go insait stret long hol long nus bilong Kanage na em bin hariap stret putim finga long lep sait hol long nus bilong em na blokim blu lang. Hariap tasol Kanage kilim blu lang na rausim i go daun long graun na putim lek antap long blu flai na tok. "Yu ting em sot kat rot bilong yu na yu laik sot kat i go kam, ya." Nau Kanage go bek long maket na salim buai.

**James Munefa Wau**

Kanage bilong Arowe. Liklik ples Gasmata. Na em i laik go raun long Kokopo taun. Em nau kisim balus long Hoskin kamap long Tokua eapot. Em i no save gut long tokpisin em nau em paul bai tok wanem bai ol i helpim em long kisim bas i go long Kokopo taun. Liklik tokples Tolai em i save liklik tasol em lukluk raun long luksave long wanpela pes Tolai sem taim em lukim wanpela

wokman Tolai wokabout i kam long em. Kanage kirap na tok long Tolai bai helpim em long kisim bas i go Kokopo taun. Em nau Kanage tokples Tolai au-vaah. Tobras una koe iau arama tara bas arurut. Tolai i harim na tok hei Kokopo iau les. Kanage i strong arut una bilibili iau ma una koe iau arama tara bas tuk uro Kokopo taun. Tolai kirap na tok long Kanage. Iau les tara bisket. Kanage harim na tok long Tolai man iau iauo una kau ma i na bisket tam. Tolai harim na tekov go bek long wok.

**Ratz Marava Kokopo**

Kanage bilong Yongs Lumi. Wanpela taim long moning Kanage i go long skul em i skul i go inap long apinun taim ol i go bek long haus. Kanage i hangre nogut tru tasol Kanage i pilim pispis na em ron i go long toilet. Taim Kanage i ron i go em i askim em yu go we yu save pispis tu em i kamaut olsem raun wara. Gelpren bilong Kanage i tokim em poro yu save pispis wan awa. Kanage tokim gelpren bilong em yu lukim tasol na stap long tingting bilong yu. Kanage tok Ingliis long gelpren bilong em olsem poro isi to see but hard to touch. Don't tok.

**Rodney Melu Yongs Lumi**

Kanage bilong Sandaun provins. Wanpela taim em stap na em pilim olsem em hangre. Na ausait long haus bilong em i gat wanpela banana i sanap i stap. Kanage i no westim em kisim naip bilong em na em i go katim banana i go daun. Kanage katim pinis na kisim i go na kukim insait long liklik haus kuk bilong em. Taim banana i kuk em wok long rausim skin na kaikai i stap. Taim wanpela boi bilong em i lukim smuk bilong paia i kam antap long haus kuk bilong Kanage em isi tasol i go na i laik spai long Kanage. Taim em kamap em stap long wanpela liklik hul na lukim. Kanage i kaikai banana isi isi i stap. Boi bilong Kanage i no wetim em nok long dua na Kanage kirap nogut na Kanage kirap na daunim hap hotpela banana stret i go. Boi ya pusim dua na kam insait na askim Kanage wanem ya! Kanage kirap na singaut basket wara wara, basket wara wara na boi bilong Kanage kirap na kisim wara i kam givim Kanage.

**Aron Jauku Aitape**

Kanage em bilong Bogia, Madang provins. Paps Kanage em man nogut. Em i gat T/Hi-Luks L200. Tasol em nogat draiva long draivim ka bilong em. Wanpela wantok draiva kam kamap long paps Kanage na tok apinun tru poro, olsem wanem. Yu sik ha. Na Kanage tok nogat mi wari long ka bilong mi sanap nating, nogut draiva, "Ho" sori tru poro man yu no laik askim mi ha. Mi ken draivim ka bilong yu mi nogat klas 6 laisen ya. Em nau poro bilong em kisim ka na tupela tekov. Wanpela taim em tokim poro bilong em long lain long draiv. Em nau draiva bilong em stap long sait na papa Kanage draiv. Paps Kanage draiv isi go yet na draiva bilong em slip idai. Kanage putim long No. 2 gia na painim bensin stret, em man em laik putim long No. 3 Gia na em krungtim klats na em tromoi han long spetim gia na nogat em

holim nek bilong bikhet pikinini bilong draiva. Man draiva em guria nogut tru na singaut krangi na tokim Kanage long stopim ka. Kanage stop pinis na draiva tokim Kanage olsem taim yu draiv yu save pinis long gia em stap we, maski long tromoi han nabaut nogut yu brukim gia boks na bagarapim Madang, Bogia haiwe. Yu mas brukim gia bilong ka stret.

**John Dee Wav Nada Bogia**

Kanage musik man bilong singsing stret insait long Kabwum distrik, Morobe provins. I no malolo long singsing tumbuna bilong narapela provins na bilong em wantaim em i gat i no inap sot long singsing tumbuna. Olgeta de, moning karim kundu bilong em i go antap long het bilong maunten singsing i bruk stret. Singsing i go apinun em save kamdaun long ples em tu i no malolo na slip liklik long nait paitim kundu i go i kam long ples ol manmeri i no slip gut long bik-nait. Ol manmeri kilim skin long wok gaden bilong ol i stap. Em i paitim kundu na singsing i go i kam long ples i stap ol manmeri i no wanbel long em singsing i go tulait i bruk long ai bilong em stret. Ol ples lain kolim nem bilong em musik mentel man. Kanage wanpela taim ren wantaim waswas kilim skin wokim wok gaden bilong em i go apinun i kam bek long haus slip idai stret musik mentel man i kam paitim kundu singsing i stap arere long haus bilong Kanage. Kanage i go tokim musik mentel, tumora memba bilong yupela musik mentel man i kam lukim singsing tumbuna bilong yupela husat man i kam pas em kisim pes prais man i kam bihain em seken prais tumora memba i kam givim yupela. Kanage tokim em na harim i no isi kalap kalap wantaim singsing i go brukim flai bilong em na krai long flai bilong em i stap i go tulait i bruk na singsing em stap olgeta.

**Sinduk Baniara Kimbe**

Paps Kanage i bilong liklik ples Kondo insait long Kange kantri. Wanpela de em i go raun long wara Wahgi long painim pis. Sori Kanage kisim taim tru long smuk. Em sekim bilim na em painim wan ins hap smuk. Em laitim pulim wan na tu, smuk i ron siksti i go insait long win paip stret. Kange het win i go insait long wara long kilim idai smuk insait long win paip, wara bruk nating tru, ol pisin singaut na ronawe.

**Mista Wilson Kup Banz**

Kanage em bilong lalibu na em i no save long tokpisin. Wanpela taim em i go wok long kop plantesen long Hagen. Em i wok i stap na em kisim pe bilong em na em laik kam long ples gen olsem na em save olsem long haus bilong em i pulap long rat. Olsem na em i laik baim trep. Tasol em i no save long nem trep. Em save tasol long ples nem. Ples nem i "sarap." Em i go long stua na em i askim stua kipa olsem, "sarap i stap na stoa kipa tok olsem." Yu tok wanem?" Na Kanage tok "Sarap" stoa kipa tok wanem na Kanage tok sarap. Tupela toktok i go na stoa kipa i singaut na tok yu tok wanem. Kanage pret na tok "rait". Man stoakipa lap nogut tru na save

• I go moa long pes 26

# KANAGE



Lukas Apinur Ambunti

Kanage em bilong ples Simbai long hap bilong Madang provins na em i save stap long Rabaul. Long taim bilong Pepsi Fun Run em i tok em bai go long stua na baim yunifom bilong em long ron. Em i min yunifom em Hulfom. Em go long

stua na askim stoakipa olsem yupela save wanem stuakipa hai i no bilong PNG. Em bilong Kongkong. Kongkong i askim Kanage wanem em liklik haus. Kanage i tokim Kongkong olsem liklik haus tasol hai. Kongkong i paul olgeta na i tokim wokboi bilong em long kam na stretim laik bilong Kanage. Wokboi i askim Kanage wanem em liklik haus. Na Kanage i tokim wokboi olsem. Liklik haus tasol hai ol save karamapim tripela brata long en hai? Man wokboi i harim dispela hap tok hai na pundaun long kaunta na kilim dai skin stret long lap.

Fox Y.P Kokopo

Kanage em bilong ples Marup long Karkar ailan. Long wanpela de ol meri long ples tokim em long i go putim umben bilong pik. Orait Kanage ron i go long haus na kisim umben bilong em. Em kisim uben pinis na ol i go long bus ol i go long bus nau ol putim umben. I no long taim ol man i gat dok ol i go insait long bus na ol dok ronim ol pik nau. Kanage harim ol dok singaut na em was gut tru long umben bilong em.

Kanage lukluk i stap na wanpela pik ron i kam boi kirap ronim pik na pik i go pas long umben bilong em. Na long dispela de tu Kanage i no putim trausis nogat em pasim laplap tasol em i no putim liklik trausis em as nating. Taim Kanage kalap na holim pik man laplap bilong em lus nating i go na boi as nating slip antap long pik i stap. Ol dok i ron i kam na ol i ting ol kaikai pik nogat wanpela dok kirap daunim tupela kiau bilong em. Kanage i pilim olsem tupela kiau i stap insait long maus bilong dok бага singaut nogut tru na ol man i kam na holim nek bilong dok na em lusim tupela kiau bilong Kanage. Ol man i kam lukim em olsem na ol lap idai stret long em na Kanage belhat tru long ol.

Magudang Kadum Karkar

Kanage bilong ples Kamu Not Kos rot long Madang. Em wantaim Misis bilong em na Junia Kanage i stap na long wanpela apinun Misis Kanage tokim papa Kanage na Junia Kanage long tupela i go painim pis long solwara. Papa Kanage na Junia Kanage tupela i go daun na pulim kanu bilong tupela i go long solwara na tupela pul na i go i stap na laik huk. Na papa Kanage i pasim ai na stat long beten. Bikpela papa long antap, yu yet wokim olgeta samting long bus na long solwara. Mi beten long yu long givim mipela pis. Bikpela pis em bilong yu. Yu givim mipela liklik pis. Junia Kanage harim papa Kanage i tok olsem na em hariap tru na tokim papa Kanage olsem. Mama i no tok long liklik pis. Em tok long bikpela pis. Papa Kanage bekim

na tok Junia Kanage olsem mi trikim yu tasol.


Thomas Nineng Madang

Kanage i bilong Simbu long liklik ples Sinex. Wanpela taim Kanage i laik go long bus sekim lain string bilong em, na Kanage em i wanpela fit abus klia stret olgeta taim em i save go long bus man em i no save pilai long abus em bai kisim pik tasol. Orait wanpela taim nau em i stap 5 des em i no sekim na siks long em Kanage i go serim. Orait em i go nau i sanap longwe na lukluk i go wanpela pik ya em i hangamap i stap. Pik ya i traim lusim string tasol yu save i hat na string ya i bruk i go na hangamap long liklik hap tasol sem taim Kanage go kamap, em kisim spia bilong em i laik swim, pik i traim las string na string i bruk. Pik ya i makim Kanage na kam. Kanage laik sut tasol i leit pinis. Pik ya i givim Kanage long bros. Trangu papa Kanage i pundaun pik ya i wok mak long em na bagarapim em olgeta na i slip stap na singaut long las nek stret na sampela lain i harim na ol i go painim em. Ol i kisim em i go long haus sik na ol dokta na nes i askim papa olsem wanem na yu kisim kain bagarap olsem? Kanage i tok mi em bai sekim string na pik tu bai was i stap long mi bai kaikai em mi sekim string nogat pik sekim mi. Taim pik i kam painim mi. Mi pundaun em laik keke mi! Mi givim han, han keke pik. Mi givim hapsait lek hapsait lek tu keke pik bolbol bilong mi laik bai mi kisim tingting olsem em mi bai dai olsem na mi haitim.

Henry Hubert Kimbe

Kanage bilong Gena insait long Simbu provins. Na nau em kisim wanpela blok oil pam long Buvussi long Kimbe na em stap. Wanpela taim meri bilong em i go long maket long Kapiura oil mil. Na Kanage wantaim pikinini man bilong em i stap long blok. Nem bilong pikinini bilong Kanage em Ben. Orait apinun nau na Kanage i wet long Misis long kam tasol Misis i no kam. Orait em tokim Ben sani luk olsem mama bai no inap kam hariap maski mi tupela kuk na Kanage stat long sigarapim kokonas. Pikinini bilong Kanage i save gut tru long tok pisin. Tasol Kanage nogat. Pikinini ya i kirap pasim dua bilong haus na yu save Kanage mekim kain haus olsem long ples bilong em nogat windo insait ya i tudak stret. Orait pikinini ya i pilai long dua i go na dua ya i pas. Kanage i tokim pikinini ya olsem, Ben pasim, em bai gat tudak ya pasim. Ai em bai tok pasim Ben kirap kisim ki bilong dua em opim olgeta. Kanage lusim kokonas stap em tait i go long pikinini bilong em. Em pulim yau bilong pikinini bilong em na tok Ben mi tok pasim olsem. Em opim dua bilong haus. Sani bilong Kanage i hatim krai stap.

Henry Hubert Kimbe



# Skelim gut memba bilong Menyamya

**Dia Edita,**

Mi wanpela manki Savayaka insait long Menyamya. Tasol nau mi stap long Lae, Morobe provins. Mi laik autim bel hevi bilong mi long ol pipel bilong Monex kantri olsem klostu 2002 na yupela mas lukim man gut na makim.

Yumi putim han long Thomas Pelika em slip long

hotel long Boroko i stap olsem na lukim gut man na votim. Mi lukim olsem Menyamya i go insait long ol liklik han rot tu ya i no gutpela tumas. Mi i no harim wanpela toktok bilong membã bilong Menyamya. Nogut em i stap long hait na yumi i stap sampela hap i develop wantaim Bomana. Olsem wanen long

Menyamya.

Yumi gat memba o olsem wanem? I stap yet orait yu mas tok olsem mi i stap. Nogut yu hait pinis na yumi i stap. Sapos yu memba em inap long pulim planti kampani o bisnis i go insait long Menyamya. Yu mas karim hevi bilong papa na mama long ples na mekim samting. No

taim bilong slip.

Kirap na mekim wok stretim Bulolo i go long Menyamya haiwe, putim kolta, stretim ol liklik han bilong Menyamya. Yu husat egens o sapot welkam.

**Michael W MKS  
Menyamya**

## Mi wetim pemen bilong Mani Ren

**Dia Edita,**

Mi wanpela man i putim olgeta seving bilong mi long kwik mani skim ol i kolim mani ren. Nau mi no harim wanpela toktok long bos man bilong mani ren Sanau. Dispela bosman Sanau i lusim kantri pirfis o em i stap? Toktok bilong U-vistrak tasol mi save harim. Inap yupela ol niusman i go toktok wantaim Sanau na raitim sampela tingting bilong em. Wanem taim tru bai em i peim mipela investas bilong em. Em tasol

**John Lucas  
Lae**

## Alfred Pogo i no tingim ol promis

**Dia Edita,**

YES mi laik askim Alfred Pogo i stap we nau. Nau mi laik tok stret olsem mas wara bilong Pogo i no liklik taim em i laik sanap long ieksen em bin grisim mipela gut stret olsem em bai wasim tuhat kilim ai wara na rausim kago long baksait bilong mipela. Tasol nau em kisim sit na i no moa tingim mipela na em i go mekim praivet bilong em i stap na mipela ol apa Kuat i stap yet long tudak. Olsem na nau mi laik tok Pogo em i laik kam kempem em mas kam long ka na bai em mekim kempem wantaim ol komiti bilong em. Em tasol sapos husat laik egensim o sapotim rait i kam long Wantok niuspepa na bai mi lukim.

**OU Jeinge Mero  
Finschhafen**

## Noken konim ol man long siti

**Dia Edita,**

Mi no save wanbel long ol man husat i save stap long strit nabaut na konim ol manmeri long givim mani long ol i ken baim buai o smok. Ol dispela man i nogat wanpela wok tasol ol i no laik salim buai smok ol yet o mekim sampela liklik wok bilong helpim ol wantok bilong ol. Ol dispela konman i save raun nabaut long laik bilong ol i go na taim bilong askim tu, ol i no save sem liklik.

Planti taim bai ol i sanap long Waigani o Gordons maket na askim, askim tumas. God i givim sampela tingting long ol dispela kain man tu o nogat. Sapos i gat tingting, yusim. Mi save raun na lukim ol yangpela man Tari na Simbu i salim buai smok na save mekim bikpela mani stret. Ol i save winim ol wokman meri tu. Ol wokman i save wetim tasol tupela wik i kam i go pinis na ol i save kisim pei bilong ol tasol dispela ol maket lain i save mekim K50, K60 o sampela taim K100 nabaut long wanwan dei.

Mi save lukim planti man husat i save stap nating na askim ol wantok long smok buai ya em sem pasin tru. Ol longlong man husat i nogat gutpela het i mekim olsem bai i orait tasol tingting i stap na askim askim ya, mi les pinis. Traim na stapim dispela pasin. Ol man husat i save givim long en i les pinis tu ya. Traim salim kaikai long maket o sapos yu no save long mekuim dispela samting, painim balus tiket na go wokim gaden kaukau long ples.

I gat planti sans long mekim mani long maket, ino skul save man tasol i gat mani. God givim yumi wanwan tingting na yumi mas sampela taim traim na sanap tingting long painim rot bilong mekim mani. Yupela lesman, plis noken konim mi moa long smok na buai.

**Les Pinis  
Joe Taiye  
Moskito Street. Morata 1.**

## Napo bai kam bek long 2002

**Dia Edita,**

Mi wanpela manki long ples na mi laik bekim pas bilong dispela man husat i kolim em yet olsem grasrut lida bilong Bulolo husat i bin rait i kam long Wantok niuspepa long Me 4, 2000.

Mi laik bekim pas bilong em long em i bin egensim nesenel memba bilong Bulolo Hon. Samson Napo. Na mi laik egensim dispela man husat mama bilong em karim na kolim grasrut lida bilong Bulolo wantaim nogat nem bilong papa bilong em.

Olsem na mi laik bekim pas bilong em na mi laik tokim em olsem, yu wanpela sikman, lesman, aipas man na wanpela konman stret insait long Bulolo ilektoret olgeta we yu no bin lukim wanpela strit lait bilong ol waitman bipo, olsem na yu wokim planti nais nating, nating long niuspepa long kisim sapot tasol mi laik tokim yu olsem, yu westim olgeta taim, save na strong bilong yu long rait nating, nating long niuspepa.

Grasrut lida bilong Bulolo, yu wanpela lesman stret insait long Bulolo stret we yu yet i no inap kamapim wantaim samting long strong, na tuhat bilong yu yet olsem na yu tok olsem Samson Napo em stap tasol long Mosbi tasol na em i no save kam raun long Wau, Bulolo liklik na tu yu no save lukim pes bilong em long 1997 i kam inap nau 2000. Ating Samson Napo em lida bilong yu wanpela man tasol olsem na yu komplem long niuspepa long ol liklik wari bilong yu olsem ol liklik mangi i save krai long sispop.

Olsem na yu komplem long niuspepa long ol man i lukim stori bilong yu tasol mi laik tokim yu olsem em

lida tru bilong olgeta pipel bilong Bulolo ilektoret.

Na mobeta yu pasim maus bilong yu na wetim taim bilong bikpela ieksen bilong 2002. Olsem na yu stap isi tasol.

Na tu em i tok olsem, em bai lukluk long ol nupela kendideit na makim ol man olsem Matyu Bendum, John Muingnepe, Dr Peter Simba na Masta Sam.

Tasol mi laik tokim dispela man grasrut lida bilong Bulolo olsem, yu wanpela konman insait long Bulolo ilektoret we yu wok long painim mani long olgeta kendideit na olgeta hap long Bulolo ilektoret na tu em i tok olsem bas vot bilong Samson Napo i bruk. Tasol mi laik tokim yu dispela man grasrut lida bilong Bulolo olsem, Bes vot bilong Samson Napo i no bruk na ol Buang i no ol longlong manmeri i stap, em ol manmeri we ol i gat gutpela save na tingting na i no olsem yu yet i wok long paul, paul i stap long Bulolo ilektoret i stap olsem na mobeta yu go dring dispela deti wara bilong Bulolo na bai ai bilong yu bai op na tu het bilong yu bai klia tu olsem na yu stap isi tasol bikos Samson Napo bai kam bek long sia bilong Bulolo long 2002.

Olsem na mi laik tokim dispela man grasrut lida bilong Bulolo olsem yu pasim maus bilong yu na lukluk long ai tasol na maski toktok planti.

Na em tasol em mi gat na sapos dispela grasrut lida bilong Bulolo o sampela ol sapota i laik sapotim o egensim dispela pas bilong mi, em welkam tasol long rait i kam bai mi ken lukim.

**Lamong Nawi  
Buang, Morobe province**

## Gutpela samting gavman i sanapim

**Dia Edita,**

Mi i no inap long tok olsem gavman i no wokim samting nogat, i tru wanem ol gutpela ol samting i kamap long kantri tude em gavman i wokim. Tasol ol samting we mipela pipel i save oltaim krai na toktok planti long en, em ol pasin nogut na ol arapela ol gutpela samting we i no kamap yet.

Dispela toktok ol i save tok olsem long tok Inglis, Equal distribution of basic goods and services which is fundamentally essential to human lives,

condition and environment to exist in the world in proper standard of livelihood.

Kain ol sevises we i mas i go wantaim pasin bilong tilim long long inapim stret laip bilong ol pipel so ol i ken i gat dispela laip God i givim long ol long i stap laip long dispela graun.

Long provins bilong mi yet Sandaun provins ating sampela we i gat kain ol sevis olsem i orait, tasol long ol ples we kain ol sevis olsem i no i stap i namba wan taim nogut tru long ol.

Tru ol gutpela samting we gavman i mekim na nau i givim yumi pipel sevis o laip mi i laik tok olsem makim maus bilong ol pipel, mi tok tenkyu tru na God i ken blesim yupela long taim bilong en na tu inapim ol gutpela ol driman na hatwok bilong yupela long developim provins na kantri olgeta wantaim.

Mi laik tokim gavman olsem mipela pipel bai i no inap komplem sapos ol kain sevises we i gutpela long laip bilong mipela i kamap.

Sapos gavman i no kisim pe bilong en em bai i no laikim o wanem, nogat em i mas kisim yet bikos em i rait. So mipela pipel tu wankain mipela laikim bilong mipela stret.

So mipela i asua long dispela o nogat.

Mi liptimapim gavman long gutpela wok em i sanapim pinis na moa yet bai kamap

**Philip Pais  
Vanimo**

## Kerevat haus sik no kisim sevis

**Dia Edita,**

Mi wanpela manki Baining we mi save go i kam long kisim helpim long Kerevat helt senta. Bipo i kam inap nau mi no lukim wanpela senis liklik long Kerevat haus sik.

Ol haus i olpela pinis insait na ausait i no luk nais nogut olgeta. Na tu haus bilong ol sik manmeri na ol pikinini i bagarap olgeta. Nau mi laik askim dispela helt senta gavman i papa long eno?

Sapos gavman i papa long dispela helt senta bilong wanem na em i luk daun long dispela bikpela samting, em laip ya.

Em tasol mi bai amamas long sapotim o egensim rait. Tasol i kam bai mi lukim.

**Misiel Bani  
Kerevat, Rabaul**

**Dia Edita,**

Mi wanpela manki Sandaun mi laik autim bel hevi bilong mi i go long memba-bilong Nuku na Drex olsem. Tupela memba nating. I no bin lukluk long haiwe rot i go long Nuku na Drekkia.

Mekim na ol kastoma bilong yumi long ples ol painim hat tru long kam daun na baim ol samting.

Stat long Drex na i go olsem long Nuku rot em i bagarap tru.

I nogat gutpela lida long lukluk na stretim dispela rot bilong yumi nogat tru

Traim hat nating i nogat luksave

tru. Kaikai mani na raun long balus na tu dring amamas wantaim ol pren long Bam Lords em ol save.

Helpim ol pipel long ples nogat tru. Traim na tingim ol lapun manmeri long ples. Strong bilong yu yet bai yu i no inap sanap olsem memba na kaikai bikpela mani. Em bai yu lus.

Maus bilong ol lapun yet yu kamap olsem memba. Traim na tingim pastaim. Em tasol husat brata o susa i laik egensim o sapotim em orait tasol.

**Francis Akma  
Nuku, Sandaun provins**

# Ol meri Sepik long Kimbe i save bagarap long ol plis

**Dia Edita,**  
Mi wanpela manki Sepik mi stap nau long Kimbe, Wes Niu Briten provins. Papa bilong mi i gat oil pam blok long Tamba seksen (9). Mi save raun long Kimbe taun na lukim ol meri wantok Sepik i save mekim. Taim ol meri wantok Sepik ya lukim ol polis ron long ka i kam stop na i go raun long stua. Dispela ol meri wantok save suruk suruk olsem kindam i kam klostu klostu na taim ol boi wantaim yunifom i tro-moi het long ol meri ya, man join bilong ol i lus nating long dispela ol yunifom.

Mi raun long taun na lukim sampela meri mi save gut tru long ol. Dispela ol meri wantok sampela karim pikinini na lusim

long haus o blok na go join lus nambaut long taun. Sampela meri Sepik ol i skul long Kimbe hai skul, ol tu save bagarap long ol plis. Mi laik tokim dispela ol skul meri olsem, yupela westim taim long skul na tu yupela westim mani bilong papamama bilong yupela. Dispela pasin yupela mekim i no gutpela tumas bikos bagarapim nem bilong sampela gutpela Sepik na tu bagarapim nem bilong komyuniti.

Yupela o dispela meri papa bilong yupela i gat blok o nogat? Sapos papa bilong yupela i gat blok orait yupela stap gut long blok na mekim gaden na lukautim famili bilong yupela. Maski long werim sotpela liklik trausis i

go pas long lek na raun long taun.

Na yupela ol plisman maski long so ov wantaim yunifom na hap gan bilong yupela. Ating yupela kam wantaim hap gan bilong yupela, em bilong pulim ol meri tasol ya.

Wanem wok yupela kam long em, yupela mas mekim stret na i no bilong painim ol meri nambaut. Sapos yupela pikinini bilong man bai yupela harim tok na yupela pikinini bilong pik dok bai yupela mekim sem pasin yet. Em tasol na husat brata o susa i laik sapotim o egensim, welkam tasol.

**Michael Otto  
Kimbe**

## Lakayu bai join wantaim Enga provins

**Dia Edita,**  
Mi wanpela manki we mi save laik tru long ritim Wantok niuspepa. Olsem na nau mi laik autim liklik wari bilong mi long Wantok niuspepa na ol pablik ken luksave.

Mi yet mi wanpela lida man bilong ol Auli Pori Lakayu komyuniti manmeri. Tasol liklik ples bilong mi em ol kolijm Hauwinda.

Tasol mi i no lukim wanpela han

mak bilong Gavman insait long 5-pela yia olgeta. Olsem wanem tru? Yupela SHP mas les long mipela Lakayu pipel o? Olsem orait mipela laik join wantaim Enga provins. Em tasol liklik wari bilong mi na yu husat laik sapotim o egensim rait tasol long Wantok na yumi lukim.

**Nelson Koyawa  
Hauwinda Lake Koplago**

## Ol lapun sista na nes wok yet

**Dia Edita,**  
A yo mama mi les pinis long lukim ol lapun sista na nes long Kerevat helt senta ya.

Bipo bipo i kam inap nau yu no inap long lukim wanpela nupela pes, nogat tru sem pes tasol ol lapun.

O pes mani stret. Mi laik askim yupela, olsem wanem yupela i no laik givim sans long ol yangpela manmeri na go i stap nating long ples.

Traim na yusim het liklik na tingim narapela long kisim ples long wok.

Maski gridi o pinisim mani bilong gavman na nilim i stap. San i go daun ia go long ples bilong yupela na wokim bisnis wantaim ol famili bilong yupela bai rait olgeta. Bikpela hap long dispela em i olsem yupela i no save wokim gut wok bilong yupela. Em tasol liklik toktok bilong mi.

Rait tasol i kam bai mi lukim sapos yu sapotim o egensim mi bai amamas tasol.

**Misiel Bani  
Kerevat, Rabaul**

## Memba bilong Ambunti Drekkir i stap yet?

**Dia Edita,**  
Mi wanpela man bilong Ambunti. Mi laik save, memba bilong yumi long Ambunti Drekkir em i dai pinis o i stap laip yet. Mi no bin lukim pes bilong em liklik inap long 13 yia em i sindaun long sia olsem memba, na tu mi no bin lukim wanpela wok Mista Akesim i wokim insait long ilektoret bilong em long Ambunti na Drekkir.

Bikpela bagarap i stap long Ambunti na Drekkir. Olgeta gavman sevis i no wok gut, olsem pos opis na benk long Ambunti na ol arapela gavman dipatmen tu i bruk daun na stap nogut tru.

Tasol Memba Akesim em i hait gut tru long Mosbi na stap. Ating em i memba bilong Mosbi stret ya.

Mi laik tok olsem sapos Judah Akesim i no luksave long bikpela hevi bilong yumi ol pipel bilong Ambunti, maski long votim em long 2002 ileksen. Yupela ol pipel bilong Ambunti na Drekkir bilong wanem bai yupela i votim em na bai yumi amamas long votim em. Lus tingting long em na makim wanpela gutpela man we husat i gat gutpela save long inapim wari bilong ol pipel.

Yupela ol pipel bilong mi long Ambunti yupela i mas save olsem mipela i gat bikpela hevi long distrik bilong yumi. Memba Judah Akesim na, distrik administrata bilong yumi long Ambunti bai i no stretim dispela hevi. Nogat tru.

Mi nau apil long olgeta yangpela manmeri bilong Ambunti olsem long 2002 ileksen, yupela mas lukim na makim man we husat i gat save bilong mekim wok na i no man i gat save long kisim biknem na pulapim poket.

Maski long planti kenidet i kamap long Ambunti distrik. Tupela tasol em inap. Wanpela long wara na narapela long maunten.

Mi nau laik strongim tok bilong mi olsem, long 2002 bai mipela ol pipel bilong Ambunti Drekkir i dropim Judah Akasim na sanapim wanpela nupela pos (man). Sapos yu husat i laik sapotim mi o egensim rait i kam long Wantok niuspepa na bai mi lukim.

**Lukas Apinur  
Ambunti, Sepik**

## Ol meri, inap yupela senisim stail

**Dia Edita,**  
Mi wanpela manki Morobe mi laik sapotim pas bilong susa ya Sylivea Joshua, em bin putim komplem bilong em long niuspepa long Jun 8, 2000.

Em i tok inap yupela PNG meri putim sket o dres long sikuru bilong yupela?

Em i tru insait long PNG yumi lukim nau pasin bilong ol meri i go narakain olgeta. Mi save lukim ol meri save putim sket o dres em sotpela tru abrusim skru bilong yupela na i go antap klostu mit bilong yu save kam aut.

Em wanem kastom bilong yumi PNG o yupela ting man bai lukim na aigris? Komon PNG meri.

Inap yupela senis? Tude yumi lukim pasin bilong reipim ol meri em i go bikpela tru long kantri na wok long opis o sampela save eking na raun nating.

Yupela tasol mekim na ol gutpela mama na susa long stelemen o strit save kisim bagarap nating long han bilong man nogut. Bikos nau ol mangi holim 2 o 3 botol na simuk mariwana het bilong ol paul em nau ol bagarapim gutpela meri nating.

Yupela yet bai go hait long sampela hap.

Ol meri yupela save apim i go antap em maski lusim na rausim i kam daun long sikuru bilong yupela na larim i stap olsem. Em pasin bilong yumi PNG i olsem. Em tasol.

Mitupela susa ya bai amamas sapos husat brata o susa laik sapotim o egensim mitupela long niuspepa bilong yumi. Tenkyu tru na God blesim yupela.

**David Mana  
Port Moresby**

## Save gut long graun na pait

**Dia Edita,**  
Mi wanpela manki long ples Ramo insait long Aitape distrik, Sandaun provins i laik bringim sampela bel wari bilong mi i go long Wantok niuspepa nau. Yes, nau long dispela taim mi bin lukim long Aitape distrik nau ol i wok long kros pait long graun na mi lukim na mi no amamas.

Long dispela pasin ol i bin mekim. Plis sapos yu save olsem tumbuna o papa i tokim yu olsem graun bilong yu, orait yu ken kros na pait long em.

Olsem ol pipel bilong Ramo i save wokim. Bikos, ol i save olsem em graun bilong ol, olsem na ol i kros pait long em.

Yupela i mas save olsem graun em bikpela samting na yu papa o mama brata na susa i mas kros pait long graun bilong yu em i bikpela samting tru. So, graun i stap na yu stap, sapos nogat graun bai yu stap o nogat.

Yu save graun em i olsem mamapapa bilong yu i save lukautim yu gut na yu amamas na stap gut. So graun tu em i wankain olsem papamama bilong yu.

Em tasol yu husat brata o susa i laik sapotim o egensim mi amamas tasol long lukim.

**John Kruwi  
Sandaun provins**

## Noken stil long yu yet

**Dia Edita,**  
Mi laik putim wanpela komplem bilong olgeta manmeri bilong OK plentesen long Kimil olsem. Yupela harim OK plentesen em kampani bilong yupela olsem na yupela i noken kros na stilim kopi o pait nambaut wantaim ol wokman nogat.

Harim moa gutpela em yupela mas rausim ol wokman bilong narapela hap na yupela yet mas wok na lukautim kampani bilong yupela yet.

Maski long kisim naip na tamiyok na raun nating nating long Kilim ples. Yupela harim sampela hap ol wok long winim yupela na yupela asples em nogat strong.

Em tasol na sapotim o egensim rait tasol i kam.

**Jeffery Kombagit  
Lae**

Sapos yu laik salim ol pas bilong yu i kam long dispela niuspepa. Salim i kam long dispela adres:  
The Editor  
Wantok Newspaper  
P O Box 1982  
Boroko, NCD

## Teptep em stesin bilong Madang

**Dia Edita,**  
Mi pikinini Yupna long Nayudos eria bilong Raikos distrik, Madang. Mi laik egensim pas bilong brata Doi Essing i bin kamap long Wantok niuspepa bilong Jun 1, 2000.

Het tok bilong em i tok Madang i leit long kirapim Teptep. Mi tokim yu brata yu painim pipia long Lae na noken pairap nating long niuspepa. Teptep em stesen bilong Madang na yumi ol pikinini Raikos yumi kisim bikpela sevis long Teptep olsem, Helt senta, skul, ples balus na ol arapela samting tu bai yumi kisim na yu Doi Essing yu tok MP Ginson na Morobe gavman bilong em kirapim pinis Teptep na Madang leit ya em we memba bilong yu em tu i pikinini Teptep tasol hamas yia tru nau long Teptep.

Em i gat save long wok mentenens na ol liklik projek olsem lokol level presiden inap long mekim i mak olsem K500 - K100 em sevis bilong em na bikpela mani gavman givim long Kabwum distrik i stap we.

Doi Essing mi tokim yu ting olsem yu arere bilong Teptep na yu i stap long han bilong Morobe gavman noken tru toktok long Teptep, em stesen bilong Madang. Yu laik toktok long dispela orait tokim memba bilong yu MP Ginson long bildim Isan olsem stesen bilong em long Morobe sait

bikos ol i gat ples balus bai strongim na wokim stesen bilong ol arere lain bilong Teptep na Raikos distrik. Memba bilong Kabwum MP Ginson i bin promis long wokim Wantoat, Teptep rot ya em i no mekim na yia kilim em long paiamen na wanem taim tru bai wokim dispela rot.

Sapos em i lida tru na man long dispela hap em i wokim pinis. Tasol nogat ya baim ka na bilasim nating nem long Lae na wanem taim stret bai kisim dispela ka i go bai krugutim Teptep.

Mi olsem pikinini Nayudos nau mi amamas long lukim plen pepa bilong MP bilong mipela Hon Stahl Musa long Wantok niuspepa bilong Jun 1, 2000 we i tokaut stret long mipela olsem RAP mani bilong distrik bai yusim long wokim rot bilong mipela long Saidor-Malalalai-Teptep na ol arapela ples tu insait long Raikos distrik. Mipela i bin i stap aipas long independens we nau yumi lukim lida tru we bai helpim tru ol grasruts i no long narapela samting nogat long rot tasol. Dispela em mein sos bilong projek we mipela i laikim long en-pastaim bai yumi i gat sans long ol narapela samting. Em tasol.

**Koron Not  
Teptep, Madang**

## Noken salensim Arop long lagun

**Dia Edita,**  
Mi laik bekim pas bilong brata ya, Andrew Tekepa. Olsem sapos yu laik rait na tok pait long dispela lagun? Yu mas helpim mi, na salensim ol Sissano, i no long Arop. Na sapos yu salensim ol Arop, mi tu bai mi salensim yu.

Harim sapos yu Barupu tru, mi askim yu

brata inap yu tokim mi long mining bilong Arop?

Olsem mi save long en, na sapos yu no save long stori. Noken salensim ol Arop nating. Brata, mi amamas long stori bilong yu. Tasol mi tok pinis, noken salensim ol Arop nating. Sapos yu save long mining bilong Arop, orait yu salensim ol.

Na sapos yu no save, plis yu stap isi tasol. Em bilong mipela sampela husat i save tasol bai mipela i salens. Na sapos yu ting yu save tu. Orait mi askim yu, inap yu tok klia mi long mining bilong Arop?

Olsem mi papa graun mi save long en. Harim brata, tok nating noken traim long mekim.

Sapos yu papa graun em bai yu save long mining bilong Arop. Na sapos yu save tasol long Barupu, em yu olsem wanpela kam yu. Sapos i klia long tingting bilong yupela, rait tasol long Wantok.

**Gabriel Antei  
Aitape**

## DEPARTMENT OF LANDS

## POFITIM OL STET LIS

Long Epril 2000 732 Stet Lis i bin kamaut o edvetais long ol lis-bilong propeti we i no baim Stet, mak long 10,000 o moa long len lis o rent. Dispela em long gimv ol lain i stap long ol dispela graun fainel sans long stretim ol olupela rent bilong ol long Jun 30, 2000.

Insait long dispela toksave o edvetismen, 449 Stet Lisholda i abrus tru long kamap na stretim ol dispela samting. Olsem na long dispela as, mi nau sainim ol pepa (Instrument for forfeiture) long kamap insait long neks Nesenel Gaset long ol dispela propeti daunbilong.

LOT	SEC	TOWN	TOTAL O/S (K)	LOT	SEC	TOWN	TOTAL O/S (K)	LOT	SEC	TOWN	TOTAL O/S (K)	LOT	SEC	TOWN	TOTAL O/S (K)
9	0002	GRANVILLE	74,700.00	23	0093	HOHOLA	11,197.50	27	0007	BOROKO	22,000.00	17	0089	LAE	13,367.95
10	0002	GRANVILLE	84,750.00	30	0093	HOHOLA	15,282.05	7	0008	BOROKO	13,250.00	12	0089	LAE	12,080.00
11	0002	GRANVILLE	74,200.00	31	0093	HOHOLA	29,800.00	22	0008	BOROKO	15,892.47	17	0082	LAE	22,300.00
33	0002	GRANVILLE	87,500.00	41	0104	HOHOLA	11,415.00	7	0008	BOROKO	13,250.00	4	0086	LAE	17,375.00
25	0003	GRANVILLE	150,000.00	2	0105	HOHOLA	12,400.00	22	0008	BOROKO	15,892.00	12	0086	LAE	14,850.00
6	0004	GRANVILLE	30,000.00	11	0105	HOHOLA	16,125.00	3	0009	BOROKO	10,800.00	2	0088	LAE	34,900.00
500	0007	GRANVILLE	21,000.00	11	0106	HOHOLA	13,700.00	11	0012	BOROKO	23,353.58	20	0089	LAE	10,850.00
17	0008	GRANVILLE	17,250.00	12	0106	HOHOLA	14,985.00	15	0012	BOROKO	15,770.00	94	0083	LAE	11,250.00
4	0009	GRANVILLE	25,300.00	5	0108	HOHOLA	14,250.00	11	0014	BOROKO	35,550.00	2	0101	LAE	15,950.00
5	0010	GRANVILLE	12,000.00	15	0108	HOHOLA	14,150.00	6	0018	BOROKO	41,340.00	3	0101	LAE	15,575.00
1	0012	GRANVILLE	12,380.00	19	0108	HOHOLA	14,150.00	11	0019	BOROKO	14,395.00	20	0093	LAE	10,850.00
11	0012	GRANVILLE	11,500.00	21	0135	HOHOLA	95,010.00	8	0020	BOROKO	12,650.00	94	0083	LAE	11,250.00
12	0012	GRANVILLE	12,000.00	56	0139	HOHOLA	11,840.00	26	0020	BOROKO	21,120.00	2	0101	LAE	15,950.00
11	0013	GRANVILLE	22,050.00	70	0139	HOHOLA	11,200.00	24	0021	BOROKO	24,500.00	3	0101	LAE	15,575.00
16	0015	GRANVILLE	13,080.00	49	0142	HOHOLA	15,654.00	38	0021	BOROKO	11,200.00	7	0108	LAE	15,575.00
3	0018	GRANVILLE	14,000.00	5	0143	HOHOLA	12,450.00	1	0026	BOROKO	24,782.81	19	0127	LAE	10,370.00
7	0018	GRANVILLE	11,300.00	1	0145	HOHOLA	15,270.00	5	0032	BOROKO	24,740.00	14	0128	LAE	10,820.00
8	0018	GRANVILLE	33,750.00	33	0146	HOHOLA	11,100.00	26	0032	BOROKO	17,325.00	10	0130	LAE	14,200.00
7	0019	GRANVILLE	22,300.00	48	0146	HOHOLA	14,150.00	38	0032	BOROKO	18,750.00	30	0130	LAE	21,510.00
3	0020	GRANVILLE	18,700.00	1	0147	HOHOLA	11,100.00	40	0032	BOROKO	16,500.00	6	0143	LAE	43,380.00
5	0020	GRANVILLE	56,100.00	10	0147	HOHOLA	16,210.00	41	0032	BOROKO	16,199.04	3	0158	LAE	13,145.00
11	0024	GRANVILLE	19,800.00	52	0147	HOHOLA	11,100.00	16	0035	BOROKO	31,575.00	13	0161	LAE	13,055.00
12	0025	GRANVILLE	27,600.00	53	0147	HOHOLA	13,205.83	26	0035	BOROKO	100,100.00	15	0181	LAE	10,805.00
3	0027	GRANVILLE	13,050.00	1	0219	HOHOLA	13,200.00	39	0038	BOROKO	14,200.00	1	0183	LAE	12,208.00
18	0027	GRANVILLE	12,300.00	2	0219	HOHOLA	14,200.00	4	0039	BOROKO	16,912.00	2	0183	LAE	24,000.00
30	0027	GRANVILLE	21,000.00	3	0219	HOHOLA	12,500.00	19	0039	BOROKO	17,120.00	34	0188	LAE	22,000.00
31	0027	GRANVILLE	27,000.00	12	0219	HOHOLA	15,837.38	29	0039	BOROKO	16,580.00	16	0188	LAE	14,000.00
32	0027	GRANVILLE	26,325.00	13	0219	HOHOLA	14,200.00	33	0039	BOROKO	22,500.00	18	0186	LAE	18,000.00
33	0027	GRANVILLE	27,000.00	14	0219	HOHOLA	14,550.00	5	0040	BOROKO	11,925.00	1	0280	LAE	11,745.68
34	0027	GRANVILLE	26,325.00	37	0225	HOHOLA	22,700.00	9	0040	BOROKO	16,275.00	10	9000	WAU	11,745.68
36	0027	GRANVILLE	42,000.00	153	0228	HOHOLA	49,076.43	23	0040	BOROKO	17,000.00	1	0024	BULOLO	10,495.00
36	0063	GRANVILLE	49,800.00	18	0229	HOHOLA	10,500.00	30	0040	BOROKO	12,920.00	4	0001	MT HAGEN	52,401.00
39	0063	GRANVILLE	26,994.00	25	0230	HOHOLA	11,170.00	32	0040	BOROKO	13,335.00	6	0004	MT HAGEN	15,780.00
6	0064	GRANVILLE	77,834.88	12	0237	HOHOLA	10,230.00	32	0040	BOROKO	38,229.51	2	0007	MT HAGEN	52,000.00
1	0030	GRANVILLE	17,550.00	18	0237	HOHOLA	14,910.00	39	0041	BOROKO	19,215.90	8	0007	MT HAGEN	20,824.00
34	0032	GRANVILLE	18,750.00	48	0237	HOHOLA	15,440.00	45	0042	BOROKO	19,729.42	9	0007	MT HAGEN	52,000.00
38	0032	GRANVILLE	18,900.00	49	0237	HOHOLA	15,160.00	108	0042	BOROKO	22,843.42	2	0007	MT HAGEN	52,000.00
43	0032	GRANVILLE	16,400.00	66	0237	HOHOLA	15,200.00	20	0046	BOROKO	13,820.00	18	0000	MT HAGEN	11,728.87
9	0037	GRANVILLE	55,800.00	1	0238	HOHOLA	14,995.00	24	0046	BOROKO	13,350.00	43	0009	MT HAGEN	29,879.00
10	0037	GRANVILLE	16,000.00	8	0238	HOHOLA	15,095.00	25	0046	BOROKO	12,800.00	8	0013	MT HAGEN	16,500.00
2	0039	GRANVILLE	12,750.00	19	0238	HOHOLA	15,175.00	51	0046	BOROKO	17,800.00	2	0017	MT HAGEN	29,030.00
8	0040	GRANVILLE	11,000.00	19	0239	HOHOLA	18,050.00	6	0054	BOROKO	15,900.00	8	0020	MT HAGEN	20,650.00
9	0040	GRANVILLE	23,500.00	1	0243	HOHOLA	17,275.00	9	0054	BOROKO	18,592.55	15	0021	MT HAGEN	20,650.00
17	0040	GRANVILLE	24,474.36	5	0244	HOHOLA	15,400.00	3	0055	BOROKO	12,900.00	29	0021	MT HAGEN	13,740.00
4	0043	GRANVILLE	18,200.00	14	0254	HOHOLA	10,985.00	21	0053	BOROKO	14,288.53	1	0028	MT HAGEN	27,900.00
8	0043	GRANVILLE	13,200.00	18	0255	HOHOLA	21,070.00	36	0055	BOROKO	15,800.00	38	0041	MT HAGEN	18,939.00
16	0043	GRANVILLE	10,385.00	55	0274	HOHOLA	10,340.00	12	0056	BOROKO	22,100.00	3	0045	MT HAGEN	14,045.00
18	0046	GRANVILLE	13,286.30	1	0275	HOHOLA	30,589.80	22	0060	BOROKO	16,401.37	4	0045	MT HAGEN	11,000.00
19	0046	GRANVILLE	12,700.00	2	0275	HOHOLA	61,510.00	2	0062	BOROKO	17,107.53	30	0045	MT HAGEN	10,833.81
5	0050	GRANVILLE	25,498.51	25	0278	HOHOLA	181,200.00	6	0063	BOROKO	12,000.00	39	0048	MT HAGEN	11,400.00
21	0051	GRANVILLE	10,800.00	53	0313	HOHOLA	19,395.23	7	0063	BOROKO	15,100.00	10	0063	MT HAGEN	10,050.00
23	0051	GRANVILLE	21,900.00	54	0313	HOHOLA	14,350.00	15	0063	BOROKO	19,542.47	4	0082	MT HAGEN	26,650.00
57	0051	GRANVILLE	29,040.00	55	0313	HOHOLA	14,965.00	6	0063	BOROKO	28,725.00	11	0005	KAGAMUGA	25,000.00
58	0051	GRANVILLE	12,940.00	45	0316	HOHOLA	12,000.00	8	0063	BOROKO	74,900.00	12	0005	KAGAMUGA	12,605.00
79	0051	GRANVILLE	13,500.00	1	0340	HOHOLA	15,000.00	9	0068	BOROKO	51,520.00	20	0010	KAGAMUGA	10,500.00
97	0051	GRANVILLE	14,800.00	6	0340	HOHOLA	17,260.00	31	0072	BOROKO	25,796.64	7	0002	MINJ	10,172.85
101	0051	GRANVILLE	13,500.00	7	0340	HOHOLA	16,200.00	2	0074	BOROKO	13,940.00	1	0010	MINJ	10,370.00
2	0056	GRANVILLE	14,600.00	8	0340	HOHOLA	30,220.00	12	0076	BOROKO	16,870.00	17	0007	GOROKA	11,000.00
6	0056	GRANVILLE	22,296.34	10	0341	HOHOLA	14,345.00	36	0077	BOROKO	10,740.00	17	0023	GOROKA	13,020.00
7	0060	GRANVILLE	30,275.00	12	0341	HOHOLA	12,950.00	11	0070	BOROKO	18,750.00	60	0033	GOROKA	57,500.00
9	0060	GRANVILLE	22,500.00	15	0341	HOHOLA	12,520.00	38	0079	BOROKO	10,800.00	28	0036	GOROKA	32,160.00
14	0082	GRANVILLE	42,000.00	6	0344	HOHOLA	15,421.93	41	0070	BOROKO	12,000.00	50	0050	GOROKA	10,200.00
33	0063	GRANVILLE	30,000.00	1	0345	HOHOLA	17,700.00	44	0070	BOROKO	10,115.00	3	0082	GOROKA	79,321.00
34	0063	GRANVILLE	22,280.00	6	0345	HOHOLA	15,025.00	47	0070	BOROKO	10,500.00	4	0001	HENGANAOFI	36,390.00
35	0063	GRANVILLE	12,150.00	7	0345	HOHOLA	14,865.00	10	0081	BOROKO	12,240.00	19	0001	MENDI	10,700.00
36	0063	GRANVILLE	49,800.00	1	0347	HOHOLA	19,051.00	10	0084	BOROKO	10,560.00	30	0006	MENDI	13,800.00
39	0063	GRANVILLE	26,994.00	1	0348	HOHOLA	14,975.00	13	0084	BOROKO	10,800.00	73	0032	TARI	13,500.00
6	0064	GRANVILLE	77,834.88	1	0349	HOHOLA	35,100.00	19	0084	BOROKO	10,800.00	5	0013	TARI	14,314.00
3	0013	HOHOLA	12,750.00	4	0357	HOHOLA	39,760.00	12	0086	BOROKO	13,770.00	4	0013	WAPENAMANDA	16,450.00
6	0013	HOHOLA	11,544.00	7	0357	HOHOLA	14,646.00	2	0088	BOROKO	10,725.00	26	0011	MADANG	24,250.00
149	0016	HOHOLA	18,200.00	17	0357	HOHOLA	13,050.00	5	0088	BOROKO	10,725.00	15	0012	MADANG	21,975.00
34	0022	HOHOLA	10,795.00	3	0375	HOHOLA	39,385.67	13	0088	BOROKO	14,825.00	38	0028	MADANG	11,700.00
6	0027	HOHOLA	30,352.74	8	0385	HOHOLA	83,580.00	1	0090	BOROKO	10,725.00	39	0088	MADANG	34,614.86
9	0027	HOHOLA	15,811.78	9	0385	HOHOLA	121,578.20	8	0090	BOROKO	12,200.00	3	0121	MADANG	10,330.00
29	0035	HOHOLA	34,500.00	2	0387	HOHOLA	66,825.00	11	0093	BOROKO	11,825.00	3	0154	MADANG	14,476.85
12	0036	HOHOLA	12,380.00	2	0387	HOHOLA	66,825.00	11	0093	BOROKO	11,825.00	22	0027	MADANG	11,099.18
19	0048	HOHOLA	14,550.00	13	0409	HOHOLA	27,500.00	14	0094	BOROKO	10,				

## Kundiawa Warriors bagarapim sindaun bilong Mt Hagen Eagles

### SP KAP RIPOP

KUNDIAWA Warriors i winim Mt Hagen Eagles 24-20 long Dickson Oval long Kundiawa long las wiken.

Dispela wiken, ol bai bungim ol boi Waghi Tumble. Gem namel long Kundiawa na Waghi sapos long kamap long Minj tasol PNGRFL i senisim na putim i go long Kundiawa long dispela wik.

Kosa bilong Warriors Bal Numapo i tok em i amamas tru long win na redi long traim winim gem long Sande.

Gem long las Sande, Numapo i tok ol boi bilong em i bihainim stret gem plen bilong ol. Dispela i helpim ol na ol i win.

Em i tok tenk yu long Mt Hagen Eagles long putim kamap gutpela gem

Randal Kaupa bilong Warriors i putim namba wan poin taim referi Alphonse Pu i givim penalti long ol.

Siwai Tagai i skoarim arapela poin gen taim em i putim trai. Skoa bilong Kundiawa Warriors nau i surik i go long 6-0.

Pilai i strong na Pu i givim wanpela penalti long Mt Hagen Eagles na habbek Abraham Henao i kikim na skoa sanap 6-2.

Kaupa i putim arapela trai na skoa i go antap na skoa sanap olsem 10-2. Orait ol i pilai go na Kapua i katim wanpela pas bilong Eagles na givim i go na skoarim wanpela trai aninit long pos. Dispela i surikim poin i go 14-2.

Insait long namba tu

hap, Grsai Sine i katim wanpela pas na skorim trai long surikim skoa i go long 20-2.

Kepten bilong Eagles na winga James Kops i katim wanpela pas gen na skorim. Stakii Akino i kikim konvesen na skoa i sanap olsem 20-8. Dispela trai i helpim ol lain Eagles long kirapim gutpela pilai.

Ol lapun pilaia olsem Max Tiri, David Gomia na James Kops i kamapim gutpela pilai stret. Ol i stat long tromoi bal i go i kam na ol i paulim difens bilong Kundiawa Warriors na fulbek bilong Eagles Augustine Justin i putim wanpela trai. Akiino i kikim na skoa nau i sanap olsem 20-14.

James Kops i skorim arapela trai gen na Henao i kikim konvesen long mekim tupela tim i dro 20-20

Tasol ol boi Simbu i paia lait long las minit na Thomas Kale i sko-

# Telikom bai skelim fowat bilong Defence

### POM YUNION RIPOP

GUTPELA gem namel long ol fowat bai kamap taim Telikom i skelim strong bilong ol boi Defence long Pot Mosbi ragbi union long dispela wiken.

Ol boi long Murray Bareks i malolo las wik na ol bai kamapim paia lait stret taim ol i bungim hevipela fowat pack bilong Telikom.

Bipo ol i malolo, Harlequins i bin memekim stret Defence 24-7, na klostu sisen i pinis, ol i no ken tingting long mekim olsem.

Ol fowat bilong Defence i gat ol pilaia olsem Andy Vele husat i gat hevi long helpim tim. Vele bai kamapim sampela strongpela gem bilong Defene we ol i no bin gat bipo. Em bai kisim sapot long Tande Tokuk na Aaron Miaia.

Defence bai nogat saiz na hevi long makim Telikom fowat olsem Peter Senat, Terence Kedea, Geoffrey Puipui. Tasol

Defence i gat gutpela bekrow pilaia olsem Able Tore, John Larry na Simon Evere.

Telikom i bin kamap gutpela pilai egensim Brothers taim liklik hevi i kamap na ol i stapim gem. Na long dispela wiken, Telikom i laik soim tru olsem ol i no save kamapim dispela kain bel hevi pasin.

Telikom i gat ol pilaia olsem Kedea, Eremas, David Pidik, Daniel Sandari, Peter Tita na olpela pilaia bilong Morobe Hammerhead Samuel Kilanget i bai kamapim gutpela na strongpela gem.

Ol boi long telepon kampani i mas kamapim gutpela gem long lain-aut. Nau yet Tita tasol i save traim hat long winim dispela lain-aut bilong Telikom.

Habpek bilong Defence Nathan Chan i mas traim long setim ol beklain bilong em long skoa.

Insait long arapela gem, University husat i lus long Harlequins nau bai mas traim long winim dispela gem egensim

1RPIR Taurama. Las wik ol Yuni i go pas wantaim skoa 17-6 tasol ol Harlequins i kam bihain na winim ol 18-17.

Yunivesiti i gat ol yangpela pilaia olsem Ella Ora, Lawrence Posu, George Hoki, George Uru, Peter Opa na Ameechie Kwokolo long kamapim gutpela gem. Wanpela samting ol i nidim tru em long kamapim gutpela disiplin pilai gut.

Taurama i winim Royals 22-6 las wiken. Ol boi long 1RPIR i gat sevis bilong Oscar Oksap husat i wanpela biknem pilaia bilong Defence ragbi lig klab bipo tasol nau em i traim ragbi union.

Taurama i gat ol yangpela pilaia olsem Sam Kilori, Patrick Waluka, Kalau Kuso, Jack Karigal, Ben Tape, Robin Suan na Patrick Pyeason.

Insait long arapela gem, Fincap bai bungim Harlequins, na Wanderers bai skelim s trong bilong ol boi Royals bihain long ol i winim namba wan gem las wiken.

## Madang holim Anda 17 lig sempionsip

### ANDA 17 LIG RIPOP

MADANG bai holim Noten Rijonel Anda 17 ragbi lig sempionsip long dispela wiken. Olgeta gem bai kamap long Ron Albert Oval.

Nesenel Junia Developmen Opisa Joe Tokam i tok olsem 5-pela tim bai stap insait long dispela junia sempionsip we bai stat long Sarere.

Hailens tim, Kundiawa na Goroka bai joinim Noten bikos Hailens nau yet i gat 6-pela tim pinis. Ol tim we bai stap long sempionsip em Madang, Lae na Wau/Bulolo.

Wewak bai i no inap soim pes bikos long hevi bilong mani.

Tokam i bilip olsem bai planti ol yangpela pilaia bai soim kain stail bilong ol long Sarere na Sande.

Kerema, Alotau na Pari i brukim bun long Sauten Rijonel sempionsip tupela wik i go pinis. Pot Mosbi i no stap long dispela tonamen bikos ol i no rejista.

Nugini Ailan Rijonel sempionsip i surik i go long Ogas 19-20. Pastaim


dispela tonamen ol i makim long kamap long 15-16 Julai tasol Bialla na Kimbe i no redi long go pilai long Rabaul olsem na ol i surikim taim.

Hailens Rijonel Sempionsip bai kamap long Ogas 5-6. Dispela sempionsip long hailens i pulim tim i kam long Tari, Kagua, Pangia, Wabag na Mt Hagen. Tupela biknem tim laibu na Mendi i no givim nem bikos ol pilaia bilong ol i no rejista.

Jenerel Menesa bilong PNGRFL Kevin Murphy i tok olsem junia em as bilong olgeta spot. Sapos wanem spot i laik kamap gut long bihain taim em i mas gat gutpela faundesem bilong em.

Ol lain asosiesen husat i nogat nem long Anda 17 i mas tingting strong long putim nem long zone lig sempionsip we bai kamap long mun Oktoba na Novembra.

Insait long arapela stori, gem namel long Kundiawa Warriors na Waghi Tumble nau bai kamap long Kundiawa. Long olpela dro, dispela gem i mas kamap long Minj, tasol PNGRFL i mekim dispela senis long las minit.



• Sir John na Sir Brian i sanap na soim sampela ol prais bilong Fan Ran.

## Sharp givim prais bilong Fan Ran

### FAN RAN RIPOP

BRIAN Bell, aninit long Sharp bren i givim K15,000 mak bilong ol prais i go long PNG Spots Federesen long holim Fan Ran.

Seketeri bilong PNG Spots Federesen Sir John Dawanincura i tenkim menesing dairekta, Sir Brian Bell na maketing na sels menesa Graham Wheatley long givim dispela ol prais.

"Brian Bell i save

givim prais long olgeta fan raising bilong PNG Sports Federesen, na mipela i amamas tru long dispela," Sir John i tok.

Ol prais bilong sharp em TV, microven, stirio mini sistem, 19 stirio sistem (CD), tupela washing masin, 4-pela stirio wokman, vakum klina na kalkulata.

"Long makim maus bilong presiden Henry Kila na ol eksekutiv bilong mi, mipela i amamas long gutpela sapot we Brian Bell i save givim long ol man insait long kantri na tu salim

ol representativ bilong mipela go ovasis.

Sir Brian i tok kampani bilong em i amamas long helpim Spots Federesen olsem samting i givim bek i go long kantri.

Sir Brian em wanpela bilong 100 man i karim Olimpik Tos long May na em i save long spot em wanpela we bilong helpim kantri i stap strong," Sir John i tok.

Dispela Olimpik Tos em bikpela eksperiens long laip taim na dispela em bai hat tru long ting lus.

## LFA i stapim gem

### LFA RIPOP

OLGETA gem bilong Lae Futbol Soka Asosisen (LFA) i no inap long kamap long wanem long dispela wiken bai i gat nesenel wimen klab sempionsip.

Siaman bilong Fainens long LFA Augustine Guarim i tok long dispela bihain long sampela pilaia na opisel bilong sampela ol klab i askim.

Dispela em bai namba foa wiken nau LFA i no hollim ol gem bilong ol. Las wiken tasol ol i statim ol gem tasol long dispela wiken long wanem long dispela sempionsip nogat ol gems bai kamap.

Mista Guarim i tok bikpela tok sore i go long pilaia's na opisel bilong ol klab long holim ol gem i stap longpela taim.

Em i tok PNGFA Tonamen em mama bodi na mipela mas

rispektim ol tonamen bilong ol i kamap.

LFA yet i gat tupela wimen tim bilong ol husat bai stap insait long dispela resis, Bara na Blu Kumuls.

Guarim i singaut long olgeta pilaia na sapota bilong LFA long kamap long dispela resis na sapotim tupela tim bilong ol.

Long wankain taim yet bai i gat wanpela spesel miting bilong ol menesa wantaim LFA eksekutiv bai kamap long St Mary's

skul long Sarere.

Dispela miting em long toktok long bihain bilong LFA klab haus we nau i sanap nating i stap.

Guarim i tok olpela man husat i save lukautim klab em ol i rausim pinis na nau klab i stap nating we ol i laik toktok long em.

I gat ol sampela lain i soim laik pisin tasol eksekutiv na ol memba i mas bung wantaim na toktok long em.



Wiken Spot Dre

PORT MORESBY SOCCER

Saturday, July 22, 2000

Blisini One 0800 D2 Nisco vs WM1 0920 D2 Duau vs Naniu 1030 W1 WM1 vs Guria 1145 W2 Orogen U18 vs HLB Pom United 1255 D3 Bipi vs Pom United 1400 Youth Cosmos vs Babaka 1900 Premier ANZ Uni vs LBC Defence

Blisini Two 0900 D2 Bavaroko vs Dokos 0920 D3 Aigob vs Sunset 1090 D1 B/Mocs vs Nomads 1145 D1 Sobou vs Kula 1255 W1 Kula vs Tarangau 1400 Premier IBS SP United vs Kurti-Andra

University 0900 D4 Kurti-Andra vs IBS SP United 0920 D4 Rapatona vs Tawala 1030 Youth Rapatona vs Tawala 1145 D4 Cosmos vs Babaka 1255 D4 Blue Kumuls vs SP Brewery 1410 D3 AIGDB vs Sunset

Sunday July 23, 2000

Blisini One 0800 D2 Wanzesi vs Eda Ranu 0920 W2 Rapatona vs Adau 1030 D1 Cyclone vs Dobo Futz 1145 W1 Murat vs W/Height 1255 D1 HLB Pom United vs Adau 1400 W1 Cyclone vs IBS SP United 1500 Youth ANZ Uni vs LBC Defence 1600 Premier Cosmos vs Babaka

Blisini Two 0800 D2 Murat vs Monier Kayaks 0920 W2 Tawala vs Madgauns 1030 W1 Sobou vs LBC Defence 1145 Youth Kurti-Andra vs IBS SP United 1255 D1 YM2 vs Bao Mitas 1400 Premier Guria vs WKia Tarangau 1600 Premier Rapatona vs Tawala

University 0800 D4 ANZ vs LBC Defence 0920 Youth Guria vs Tarangau 1030 D4 Guria vs Tarangau 1145 Youth SP Brewery vs Kurti-Andra 1255 D4 SP Brewery vs Kurti-Andra 1410 D3 Asum vs Bureong 1530 D3 Kurti-Andra vs West

\* SP Brewery vs Bavaroko (W2) games now been deferred due to women's nationals club championship in Lae.

LAE SP LAGER RUGBY LEAGUE

Saturday July 22, 2000.

Seniors Round 12, Juniors Round 8

Outside Ground 09.00am U17 Spiders v Tarangau 10.00am U17 Panthers v Royals 11.00am U19 Spiders v Tarangau 12.00n U19 Panthers v Royals

Inside Ground 10.20am B Defence v Brothers 11.40am B Magani v Royals 01.15pm B Spiders v Tigers 03.00pm A Defence v Brothers

Sunday July 23, 2000

Outside Ground 09.00am U17 Tigers v Brothers 10.00am U17 Magani v Defence 11.00am U19 Tigers v Brothers 12.00n U19 Magani v Defence

Inside Ground 10.20am B Tarangau v Panthers 11.40am A Royals v Magani 01.15pm A Spiders v Tigers 03.00pm A Tarangau v Panthers

KIUNGA LEAGUE

Sunday July 16, 2000

Points Table Club P W D L F A Pts Raiders 10 7 - 3 184 128 14 Norths 10 5 - 5 175 140 10 Storm 10 5 - 4 146 131 10 Waiya 10 5 - 5 152 152 10 Cowboys 10 4 - 6 142 152 8

Tigers 10 4 - 6 98 189 8

Draws - Sunday, July 23, 2000. Venue: Kiunga Town Oval 1.00pm Fly Storm v Niwaf Raiders 2.30pm Kiunga Tigers v Airport Norths 4.00pm Waiya v Rusa Cowboys

SP CUP 2000

Round Seven Results Gurias 20 def Mendi Muruks 12 Warriors 24 def Eagles 20 Bombers 12 def Laharis 8 Mioks 18 drew Vipers 16

Points Ladder Team P W L D F - A Pts Mioks 7 5 1 1 113 90 11 Gurias 6 5 1 - - 112 85 10 Eagles 6 3 3 - - 131 80 6 Muruks 5 3 2 - - 85 72 6

Round Eight Draw - Sunday July 23, 2000

Tumbe v Warriors (MNU) Muruks v Eagles (MDU) Gurias v Bombers (KPO) Bye Vipers/Laharis/Mioks

LAE COCA COLA

CORPORATE TOUCH - ROUND 2

Tuesday July 25, 2000 F1 Gamoga & Co v Arnots F2 NG Tablebirds v PNG Motors F1 Supa Value v Niugini Electrical F2 Lae City Council v Boroko Motors

Bye Ela Motors Wednesday July 25, 2000 5.45 Boroko Motors v Herbalife Truckit v Goodman Fielders 6.35 Toba Motors v Bellek BP PNG v Coca Cola

Points Ladder - Coca Cola Shield Tuesday Team W D L F/F P/F P/A Total B/Chemicals 8 1 - - 59 30 26 G/Fielders 6 2 1 - 54 43 22

Wednesday Boroko Motors 9 - 1 - 74 41 28 N/Electrical 7 1 1 - 56 33 24 S/Value Store 5 2 3 - 44 40 23

PORT MORESBY RUGBY FOOTBALL LEAGUE INC

Competition Points Table and Match Results Round 16 - July 15-16, 2000.

A Grade Club P W D L Pts Souths 16 13 2 1 28 Brothers 16 11 1 4 25 Paga 16 12 0 4 22

^ Denotes points awarded on technical grounds

x Denotes points deducted on technical grounds

COCA COLA PORT MORESBY NETBALL ASSOCIATION

Week 12

Saturday, July 22, 2000.

Round 16 - July 15-16, 2000. Hawks 20 Wf United 0 Waiya 54 beat Paga 20 Royals 28 beat Tarangau 14

Souths 26 beat Defence 18 Magani 48 beat West 10 Brothers 40 beat Kone Tigers 28 Warriors 20 draw Post Puma 20 Vipers 16 draw Mioks 16

Juniors U10 - 0800am

Pool A C1 CP Rebels v Chevron P. C2 L. Telstars v BB Kings C3 LB Mermaids v TST Kempa C4 Ted Diro v Holy Rosary

Pool B C5 Boreboa v Holy Rosary C6 Mase v Bavaroko C7 Rakaone v L. Telstars U13 - 0830am

Pool A C1 CP. Rebels v St. Theresa C2 Chevron P. v L. Telstars C3 BB Kings v LB Mermaids C4 June Valley v TST Kempa

Pool B C5 TST Kempa v LB. Mermaids C6 St. Peters v CP. Rebels C7 Ted Diro v St. Pauls C8 Hagara v St. Theresa

Pool C C9 St Michaels v Holy Rosary C10 Pari v Boreboa C11 Wardstrip v Sparrows C12 Kila Kila Pri v Bavaroko

Pool E C11 Rakaone v Philip Aravure C10 Tatana Pri v Mase C11 Boreboa v Bavaroko C12 Sparrows v Philip Aravure

Pool A C1 Kila Kila Pri v CP. Rebels C2 L. Telstars v Mase C3 TST Kempa v LB. Mermaids C4 June Valley v Chevron P.

Pool B C5 June Valley v Ted Diro C6 Wardstrip v St. Theresa C7 CP. Rebels v St. Peters C8 St. Pauls v Hagara

Pool C C1 Philip Aravure v St. Theresa C3 Bavaroko v Butuka C4 Tatana v Badihagwa C5 Tokarara Pri v Boreboa

Pool D C6 Bavaroko v Kaugere C7 LB. Mermaids v Boreboa C8 Tokarara Pri v St. Peters C9 Pari v Sparrows

Pool A C1 CP. Rebels v L. Telstars C3 LB. Mermaids v Tokarara Pri C4 Badihagwa v Chevron P. C5 Kila Kila Sec v Hagara

Pool B C6 Badihagwa v Hohola Youth C7 Ted Diro v Kila Kila Pri C8 Tokarara Pri v Luvoni

C9 Philip Aravure v LB. Mermaids

Pool C C10 Holy Rosary v Gavuone C11 Bavaroko v Boreboa Bye Mase U21 - 1200pm

Pool A C1 Sogeri v L. Telstars C3 Chevron P. v L. Telstars C4 Luvoni v LB. Mermaids

Pool B C5 LB. Mermaids v Mase C6 Hohola Youth v Sogeri C7 Chevron P v BB Kings

Division One - Court 2 11.00pm BB Kings v Rakaone 12.30pm CP Sparrows v CP. Rebels 02.00pm LB. Mermaids v L. Telstars

Division Two - Court 3 01.00pm Chevron P. v TST Kempa 02.00pm CP. Rebels v CP. Sparrows 03.00pm BB. Kings v Angels

Division Three - Court 4 01.00pm Kawainini v CP. Sparrows 02.00pm TST Kempa v PNGBC Kiros 03.00pm Pelagai v Luvoni

Division Four - Court 5 01.00pm Logohu v Gavuone 02.00pm Nabuaton v Warumana 03.00pm Chevron P. v PNGBC Kiros

Division Five - Court 6 01.00pm Kereibua v Luvoni 02.00pm Imulye Lele v Koki Knights 03.00pm Hall Sound v Waigani Tyres

Division Six - Court 7 01.00pm Aroma Coast v Aust High Com 02.00pm Hall Sound v Mase 03.00pm Koki Knights v Pewaila

Division Seven - Court 8 01.00pm Nabuaton v Warriors 02.00pm Rural Bank v Toba Souths 03.00pm Kila Kila Sec v Downer Lady Birds

Division Eight - Court 9 01.00pm Imulye Lele v Holy Rosary 02.00pm Sea Gulls v Downer Lady Birds 03.00pm ABO Warriors v Toba Souths

KOIARI RUGBY LEAGUE

Round 3/1 (11)

Sunday July 23, 2000.

Venue: Iarowari (Sogeri)

B Grade 11.00 Pukpuks v Ops 12.00 Warriors v Choice 01.00 Eels v Tigers

A Grade 02.00 Pukpuks v Ops 03.00 Warriors v Choice 04.00 Eels v Tigers

Note: All club players and officials are to be at the oval at 1pm.

Points Ladder As of July 16, 2000.

A Grade Club P W D L F A Pts Choice 10 6 2 2 87 83 14 Pukpuks 10 6 1 3 97 72 13

B Grade 09 7 - 2 94 40 14 Tigers 9 6 1 2 53 28 13

0800 Game 1 Winner Pool A vs Runner Up Pool B 1100 Game 2 Winner Pool B vs Runner Up Pool A 1300 C/Raisor Under 15 vs Under 17 Lae Girls 1500 G/Final Winner G1 vs Winner G2

Ops 9 1 1 7 32 61 3

NATIONAL CAPITAL DISTRICT VOLLEYBALL ASSOCIATION

Taurama Leisure Centre

Saturday July 22, 2000

Court 1 09.00 Raukele vs Mixtures MAR 10.30 Telikom vs Vailima MAR 12.00 Raukele vs Mixtures MA

Court 2 09.00 U-Mi-Yet vs Scorpions WAR 10.30 Raukele vs Mixtures WAR 12.00 Telikom vs Vailima WA

Court 3 01.00 Telikom vs Vailima MA 03.00 NCDC vs Hoppers MA

Court 2 10.30 NCDC vs Hoppers WAR 11.00 Telikom vs Vailima WAR 01.00 NCDC vs Hoppers WA

2000 NATIONAL WOMENS CLUB CHAMPIONSHIP TOURNAMENT

Pool A Telikom (Pom) Guria (Lahi) Bara (LFA)

Teachcom (Enga) Mosa Oil Mill (NSPOL) Kojo (Buka)

Pool B Elcom (Lahi) University (Pom) KYG (Enga)

National U18 Women (PNG) Blue Kumuls (LFA) Siroga Perads (Higaturu)

Friday July 21, 2000 0915 B Elcom vs Siroga Perads 1045 A Telikom vs Kojo

1215 B KYG vs U18 Women 1345 A Guria vs Mosa Oil Mill 1515 B University vs Blue Kumuls

1640 A Bara vs Teachcom Saturday July 22, 2000

0700 A Mosa vs Kojo Siks 0830 B Elcom vs U18 Women Siks

1000 A Telikom vs Teachcom Siks B University vs KYG Igam 1130 A Guria vs Bara Siks

1300 B S/Perads vs U18 Women Siks A Kojo vs Teachcom Igam

1430 B Blue Kumuls vs KYG Siks 1600 A Telikom vs Guria Siks 1730 B Elcom vs University Siks

Sunday July 23, 2000 0700 A Telikom vs Mosa Oil Mill Siks 0830 B Elcom vs Blue Kumuls Siks

1000 A Bara vs Kojo Siks B KYG vs Siroga Perads Siks B B/ Kumuls vs U18 Women Igam

1130 B Telikom vs Bara Siks B Elcom vs KYG Igam 1430 A Guria vs Kojo Siks 1600 B University vs S/Perads Siks

1730 A Teachcom vs Mosa Oil Mill Siks Monday July 24, 2000





# WANTOK SPOT



Kisim hariap!  
Goli bilong Wanzesi hariap long ketsim bal bipo birua bilong em i kikim i go insait long umben. Foto: Issac Ikuavi.

## Selekta bai makim Kumul tim neks mun

**PAPUA** Niugini Ragbi Futbal Lig-bai makim 40-man skwat long narapela mun long redi long Wol Kap 2000.

Siman bilong ol selekta John Wagambie na ol wanwok bilong em bai taitim bun tru long painim ol gutpela na strongpela pilala long makim kantri. Bihain long dispela 40-man trening skwat, fainel 22 tasol bai makim PNG long Yurop long Oktoba na Novemba long pinis bilong yia.

Dispela em wanpela bikpela toktok i kamap insait long Bot miting long las wiken long Pot Mosbi.

Siaman bilong PNGRFL Bot John Numapo i tok olsem dispela miting long wiken i bikpela tru bikos toktok bilong Wol Kap na tu saspensen bilong 4-pela ragbi lig senta tu i bin kamap. Dispela ol ragbi lig senta em Pot Mosbi, Lae, Mt Hagen na Goroka.

### PNGRFL RIPOT

Dispela miting tu i toktok long sampela ol bikpela tonamen olsem Pasifik Kap we bai kamap long Gosford, Australia na tu wanpela askim pas long salim tim i go long Arafura Gems long Darwin.

Dispela gem long Gosford em i bikpela samting tru we ol pilaia bilong NRL na tu long Papua Niugini yet bai resis long winim spot.

Siaman bilong SP Kap menesmen Jim Robins tu i tokaut olsem olgeta gem bilong SP i wok long kamap gut tru. Na yet planti ol gutpela ripot i kamap long arapela hap bilong ol senta.

"Pasin bilong pilai na tu pasin bilong wanwan ol pilaia i wok long kamap gut tru na em i amamas long olgeta lain husat i helpim long SP Kap kompetisen i ran gut," Mista Robins i tok.

## Nesenel wimens klab soka taitel long Lae

### PNGFA RIPOT

#### FRANCO NEBAS i raitim

SIR Ignatius Kilage Stadium long Lae bai paia long wiken taim Papua Niugini Futbal Asosiesen (PNGFA) bai holim Nesenel wimens soka klab taitel long dispela wiken.

Gem ya bai stat long Fraide na pinis long Mande.

Siaman bilong ogenaizing komiti na Presiden bilong Lahi Soka Asosiesen Moses Demas i tok Wantok olsem wok bilong redim ples i ron gut na ol i lukluk long lukim dispela resis i kamap nambawan long nupela milenum.

Em i tok em i makim pinis ol ogenaizing komiti long redim ol ples bilong slip, pilai na ol arapela samting.

Ol komiti husat bai go pas long wok em namba tu siaman Angu Malala, Richard Nagai (teknikol edvaisa), Mesa Chris Remunga (protokol), John Kelly, (trensport), Peter Bangin (haus slip) na John Raka (mes komisina).

Siaman Demas i tok 12-pela tim i soim laik pinis long kamap long dispela resis. Ol tims em; Elcom na Guria (Lahi), Bara na Blu Kumuls

(LFA) Yunivesiti na Telikom (Pot Mosbi), KYG na Teachcom (Enga), Soroga, na Higaturu (Popondetta), Kojio, Buka, Mosa Niu Britain Oil na Papua Niugini anda 18 tim.

Ol tim long Popondetta bai soim pes namba wan taim long nesenel soka sempionship.

Em i tok ol tim bai stap insait long tupela pul we bai ol i resis wanem tupela tim i go pas long poin long wanwan pul bai salens wantaim arapela tupela tim long narapela pul.

Tim bilong Buka i kamap pinis long Tunde we arapela ol tims bai kamap long Fonde moning na kompitisen bai kik op long Fraide wantaim opisel opening.

Demas i tok em i bilip olsem resis long dispela yia em i moa bikpela long wanem namba bilong ol tim em bikpeal tru.

Pot Mosbi Telikom husat i difending sempions bai traim gen long difendim bek taitel bilong ol.

Ol telefon meri bai go olsem feveret long dispeal resis wantaim Bara bilong LFA na Guria bilong Lahi.

Telikom i gat ol olpela pilaia bilong ol yet i stap long sait olsem, lapun Tabitha Suwai,

Fredrica Siwin na Nelly Taman long go aps long ol.

Tabitha bai go pas long midfil eria wantaim Fredrica long wing an Taman bai lukluk long brukim umben. Ol arapela pilaia husat tu bai helpim em, Margaret Aka long straiika Judith Sauto na Rose Sevese long beklain na Julie Alau wantaim yangpela Pricilla Konailai.

Bara tu em wanpela tim we bai strongpela salens bai kam long ol long wanem em ol strongpela tim bilong ol meri long LFA. Ol i gat kain pilaia olsem intanesenel swipa Wantin Yangum, Helen Nesep, Edna Thomas na Jessie Towika long go pas long ol.

Dispela ol lain i gat ol stail pilai bilong ol yet we bai mekim het pen long arapela senta sapos ol i no was gut long ol.

Guria Lahi tu em arapela tim we em bai givim strongpela salens. Ol i gat pilaia olsem Judith Butata na Monista Safti long was long beklain, Tania, Zina Kens na Ronda Watson long midfil. Long fran em Feda Nangi na Anna Sip bai go pas.

Ol arapela tim tu hsuat bai givim strongpela salens em; Yunivesiti Pom, Elcom Lahi na Teachcom Enga.

# Em i Gutpela Em i Tuna Em i bilong PNG stret...



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.